

**DISCOURS
CONTRE LES
DUELS.
COMPOSE' PAR
CHARLES...**


Charles Bodin, Giorgio Enrico
Levi



Red in 101 049

BIBLIOTECA	DUELLO		GIORGIO ENRICO
	E	2	
	F	1	
LEVI			

77



Ex libris di Giorgio Enrico Levi

DISCOVRS CONTRE LES DVELS.

COMPOSE' PAR CHARLES
BODIN, SIEVR DV FRETEIL
pres de Tournan en Brye.




A PARIS,

Chez TOUSSAINT DV BRAY, rue
S. Jacques aux Epics-Heurs, & en sa
Boutique au Pallais en la gallerie
des Prisonniers.

M. DC. XVIII.

AVEC PRIVILEGE DV ROY.




AV GRAND CARDI-
nal du Perron.



ONSEIGNEUR,

*Il y a desia longs
temps, que cōside-
rant avec douleur
& compassion cō-
me les Duels nous
seruoient de moi-
ens tres-horribles pour soïiller nos
mains et nos consciēces de nostre pro-
pre sang, remplir nostre france de cru-
els homicides, & ruiner nostre estat:
ie fus touc' é au cœur de nos miseres,
l'eus honte de nous voir diffamez par
nous-mesmes, & ne peu m'empescher
de descharger mon ame oppresse
de tristesse en escriuant contre cette ra-
ge plus que brutalle, laquelle nous ar-
moit ainsi contrenous mesmes. Et lors*

A ij



AV GRAND CARDI-
nal du Perron.



ONSEIGNEUR,

*Il y a desia longs
temps, que cōside-
rant avec douleur
& compassion cō-
me les Duels nous
seruoient de moi-
ens tres-horribles pour soïiller nos
mains ~~et~~ nos consciēces de nostre pro-
pre sang, remplir nostre france de cru-
els homicides, & ruiner nostre estat:
ie fus touc! é au cœur de nos miseres,
l'eus honte de nous voir diffamez par
nous-mesmes, & ne peu m'empescher
de descharger mon ame oppresse
de tristesse en escriuant contre cette ra-
ge plus que brutalle, laquelle nous ar-
moit ainsi contre nous mesmes. Et lors*

A ij

EPISTRE.

que mon iuste resentment me fait prendre la plume pour depeindre en quelque sorte, Et ainsi que le desordre d'une ame extrememēt affligée me le pouvoit permettre, la difformité de l'idole des duels : ie ne pensois point le faire sortir en public, n'y l'exposer à la veüe de tout le monde, Ains seulement ie m'estois proposé cette ouurage facheuse pour l'enormité de son obiect, pour souslager mon cœur desolé par la rencontre de tant de sang qu'il espandoit parmy la france, Et le faire estre en horreur à mes pensees en l'ayant sans cesse hideux, ainsi qu'il est, deuant mes yeux. Et de fait i'auois desia laissé couler quelque suite d'annees sans le faire paroistre publiquement, non de peur qu'il fust desagreable aux yeux de ceux, qui en feroient rencontre, Et feist horreur à ceux qui le considerans, decouueroient en mesme temps la pomme de discorde pour les familles, le feu

EPISTRE.

de dissention pour les Prouinces , le
 bourreau des françois, l'ouurier de leurs
 miseres , l'ennemy de leurs ames , le
 tyran de l'Estat , la ruine de l'Empi-
 re. Car au contraire c'eust bien esté la
 parfaicte guarison de ma pauvre ame
 gemissante en sa douleur, si courant pu-
 bliquement parmi la france , il se fust
 fait odieux à tous ceux qui l'eussent
 veu si difforme & hideux , il eust fait
 n'aistre en l'ame un repentir entier
 d'auoir plié soubz la rigueur de ses ini-
 ques loys , Et ainsi se fust luy mesme
 machiné vne ruine totale. Mais ie
 scauois trop bien que tous ceux , qui
 auoient escript sur ce subiect , Et mis
 en public l'image du mesme Jdole , n'a-
 uoient point cueilli le fruiet digne de
 leur charitable labeur : & qu'au cōtraire
 les françois le voyant , s'estoient rēdus
 plus opiniastrés en leurs malheurs , et
 plus que iamai assubiectis à ses sanglās
 hommages. Or voyant depuis peu que

EPISTRE.

nostre Dieu auoit ietté ses yeux pleins
 de pitié dessus la France avec dessein de
 la guarir, & bannir d'elle cette fureur
 qui la mettoit en pieces : qu'il auoit
 enuoié dedans les ames des françois un
 esclat de sa diuinité plus brillant que
 de coustume : ~~et~~ tellement aidé la lu-
 miere de leurs entendement que de leur
 faire cognoistre les Duels comme la
 cause de tous leurs maux, ~~et~~ renoncer
 à leurs maudites loix : i'ay pensé qu'il
 estoit bon de tesmoigner un contente-
 ment public, puisque le bien que nous
 auons receu en la ruine de cet idole est
 uniuersellement pour tous. Et pour ai-
 der cette ioye commune, ie me suis reso-
 lu de monstrer publiquement le tableau
 dedās lequel i'ay tiré de ma main l'ho-
 rible image de l'idole vaincu, non avec
 tous les traits difformes & hideux qui
 luy conuiennent ains seulement avec
 ceux que ma trop foible industrie a peu
 représenter, & qui sont suffisans de

EPISTRE.

consoler nos cœurs et grandement res-
 ioüir nos pensees en descouurant com-
 bien de felicité sainte & vray repos
 nous nous sommes acquis par la deffai-
 te d'un monstre si infame. Mais ce
 n'estoit point assez que ce demon vain-
 cu marchast parmi la ville comme un
 triumphe de son vainqueur, il falloit
 que celuy qui auoit l'honneur de la vic-
 toire allast deuant pour le conduire en
 triumpphant de luy, pour ainsi receuoir
 des bouches de tout le peuple des canti-
 ques de loüanges en son honneur. Cette
 seule cōsideratiō, MONSEIGNEUR,
 m'a fait oser escrire vostre non venera-
 ble par tout le monde, & reueré des
 habitans du Ciel, au commencement de
 mon tableau, & vous mettre à la teste
 de ce triumphe. Car vous premier auez
 courageusement ataqué ce superbe tyrā
 qui saccageoit la france: vous premier
 auez prins contre luy la querelle du
 Ciel & de vostre patrie: vous auez

à iiij

EPISTRE

commencé de le frapper d'agereusement
 Et creuser dans son sein des plaies
 profondes Et mortelles : et vous seul
 apres Dieu qui est la cause vniuerselle
 de toutes bonnes œures, auiez ietté les
 premiers fondemens de nostre felicité,
 dedâs les ruines de ce prodige infernal.
 Et ce fut lors que touché au vif des ru-
 des resētimēs que vous auiez des plaies
 que nous creusions nous mesmes dans
 nos entrailles, vous le bastites en ruine
 avec les coups puissans de vos predica-
 tions tant pleines de doctrine, d'exces
 de pieté, de feux de charité, qu'elles ne
 resentoiet que perpetuels miracles. Car
 la grande ame de nostre grand Henry
 qui respendoit des larmes de ioye en es-
 coutant la merueille de vostre esprit,
 reccu puissamment les effects de vostre
 zeile Et pieté : Et vos diuins oracles
 seruirēt d'une grande lumiere à ses yeux
 pour voir bien clairement cōme il estoit
 important pour l'honneur de son Dieu

EPISTRE.

le salut de son ame, & repos de son peuple de bannir cet Idole de son Royaume. De sorte que peu de temps apres il conspira contre sa tyrânie, & fit serment a Dieu sur ses saintes Euangiles de le combatre, le renuerser accablé de de sa fin, & d'effacer de la memoire de ses suiects son nom infame, en punissât par la iuste & seuerer rigueur de sa iustice tous ceux, qui luy feroient des sacrifices, & rendront des hommages. Et du depuis nostre Monarque Louys 13. (vray rayõ du Soleil qui la produit) se seruant de ses armes, & gardât inuolâbles ses Edicts sages & pleins de charité, la tellement nauré, qu'il est tombe ce mōstre des Duels gissant deuant ses piedsesclauue desõ pouuoir Royal, & mesprise de tous frãçois de sorte. Que sõ mal n'a esté que le fruiet de vos labours sa ruine n'a esté que l'effet de vos saintes remōstrâces, vos predications, autorisees par le grãd Zele qu'auetz tous

EPISTRE.

*iours en pour la gloire de celle qui vo^a a
 fait vn de ses princes & fauoris, ont ef-
 facés s^o n^ode la memoire des fr^açois; &
 vos prieres portees dans le Ciel par la
 force du feu d'amour diuin qui sans
 cesse eschauffe vostre cœur de plus en
 plus : ont attiré des mains de nostre
 Dieu les graces et faueurs, qui nous
 ont affranchis d'une seruitude si d^ag^e-
 reuse. Je confesse, MONSEIGNEUR,
 que ie m'emporte en ce discours, et
 faut que ie vous dice que le plus grand
 regret, qui ayt iamais rongé mon cœur
 et tourmenté les pensees de mon ame, a
 esté que ma trop tendre ieunesse ne m'a
 pas peu permettre de respirer parmy
 ceux, qui entendoient ces tant miracu-
 leuses predicati^ons, que ien'ay peu auoir
 quelque petite part à l'admirable doc-
 trine dont elles estoient remplies, que
 ien'ay peu estre excité par lezele qui les
 rendoit autres que humaines, et bref
 que ie n'ay ueu vn Apostre preschant*

EPISTRE

souZ vostre, nom vainqueur des ennemys du Ciel et de la terre. Mais il n'importe le peuple de Paris la entëdu, et en a entierement esté touché; nostre grand Henry la escoutë, & en a eu des resentimens, qui ne peuvent s'exprimer que par la grandeur de leurs effects; la France la bien ouy, et vous a reueré comme un vray Apôstre; l'Europe la ouy dire, & est demeuree estônée de vos merueilles; nostre saint Pere la appris, et vous en a recompensé et benî de ces doits; le Ciel vous a veu, & s'en est resiouy; les Anges vous ont veu, et en ont celebré feste au milieu de leur gloire; le grand saint Germain de l'Auxerois vous a veu, et en a faict le raport tres-fidelle à nostre Dieu, qui vo⁹ a cõblé de ses graces, & finalement toutes les choses qui se retrouuent dans le Ciel & sur terre, se sont grandement delectées à ces pieuses predications, qui ont coupé la gorge à l'Idole des Ducs. Et maintenant toutes ensemble & d'une

EPISTRE

voix vous recognoissent pour vainqueur
à vous seul elles attribuent l'honneur de
la victoire remportee sur ce monstre vain-
cu, & vous coniurent en ma faueur d'a-
greer le peu de ses despoilles que ie vous
offre, et accepter le triumphe que ie
vous ay dressé. Le triumphe vous est deu
pour auoir deffaict Et/ reduit cōme neāt
l'ennemy superbe que vous auez assailli;
mais non pas direz vous, celuy qui m'e st
offert si abiet Et/ defectueux, consistant
seulement en vn petit portraict du mon-
stre vostre esclauue grossierement represen-
tē sans la delicateſſe d'aucuns beaux traits
et lineamens subtillement tirez, sans
artifice remarquable et d'une main
ignorante en son art. Et à cela ie vous di-
ray que si vous desiriez auoir des recom-
penses, qui eussent du raport avec le meri-
te de la moindre de vos actions, il ne fau-
droit point en attendre des hommes, mais
seulement receuoir les ouurages du Ciel
seules suffisantes pour cet effect. Dauanta-

EPISTRE

ge il faut que comme le Soleil qui roule dans la voute azurée pour esclairer les surfaces de la terre, ne se contente pas de la regarder, elle qui scait fort bien mesnager le profit qu'elle reçoit de son aspect; ny mesme de darder ses rayons doux *et* salutaires sur les grands Roys les puissans princes, *et* animaux plus nobles *et* excellens: mais encore permet *et* trouue bon que les plus villes *et* moindres creatures iouissent du bon heur de ses influences *et* semble prendre plus de plaisir à les regarder à pleine face, *et* d'emploier d'auantage ses vertus pour les rendre aymables, *et* faire ainsi recognoistre ses puissances secretes. Il faut dy-ie, de mesme que vous qui estes le Soleil des sciences *et* des arts, la perle des hommes doctes, ne vous contentiez pas daider de vostre lumiere ces grandes ames, lesquelles sont apres vous leur Soleil des astres lumineux; mais souffrir aussi que les moindres

EPISTRE

nourrissons des Doctes Muses s'approchent de vous, pour bannir de leurs ames par le moien de vos rayons les tenebres d'ignorance. Outre que ce vous sera vne double victoire de triompher de vos triumphes mesmes, & d'enrichir d'honneur, ce qui est preparé pour vostre gloire; double victoire, qui n'est iamais petite & merite beaucoup, surtout quand c'est vn grand comme vous, qui la renporte en descendant comme du haut & releué de degré d'honneur (où nostre Dieu luy mesme vous a posé pour recompense de vos saintes actions) (pour recevoir le plus chetif de vos tres-humbles serviteurs, qui contribue à l'honneur de vostre victoire remportee sur les Duels ce que Dieu, la Nature & les Arts luy ont donné. Vous imiterez en quelque sorte nostre Dieu qui d'un rien fit & bastit la machine du monde, si fauorissant mes tres-ardens desirs vous acceptez cette petite pompe que ie vous ay dressée, & permetez que mon abiect ouvrage soit enrichi de vos marques, & porte sur son front vostre nom pour couronne. Car en ce faisant, vous l'aucoriez à vous par vne adoption glorieuse pour luy en l'adoptant ainsi, vous le ferez vostre; en le faisant à vous, vous changerez son Estre, & de difforme & deffectueux qu'il est vous le rederez desirable à tout le monde. D'autant que vostre nom sera son chef, & son chef

EPISTRE

estant tout beau & tout parfaict, comme venant de vous, osterà ces deffaux; où pour le moins le grand esclat de sa beauté donnât partout le corps & iusques aux moindres de ses parties, le fera paroistre grand & miraculeux. Et ainsi d'un moindre que quelque chose (ie n'ose dire rien) vous en ferez (non pas des mondes par creation, cela n'est bon que pour celuy qui est sa Volonté mesme & n'a sa Volonté distinguée de sa puissance, & sa puissance ne trouue point d'obstacles) mais un œuvre plein de merueille par la communication de vostre nom Venerable tant aux Anges, qu'aux hommes, à la difformité de sa Nature. Ce sera une action de vray pilier & prince de l'Eglise, ce sera l'imiter cette tres-chere espouse de nostre Createur, qui reçoit aussi librement & avec autant de douceur & bonté, voire mesme recompense de ces faueurs plus rares aussi souuent celuy qui luy porte sur ces autels un denier ou moins encore; que ceux qui luy presentent des tresors tous entiers, sur tout quand c'est le cœur qui luy parle, qui luy offre, qui luy donne par amour. Elle adioustera aux dons celestes qu'auuez receu de son espoux les plus grandes richesses que produissent ses graces vous voyant l'imiter en ce subiect comme en tous autres; les grands hommes, les Platons, les Aristotes, les saints Thomas vous cheriront de tous les coings de la

EPISTRE

terre habitable , quand ils scauront que vous n'avez aucun mespris pour les moindres enfans de ces Deesses, qui ont pour domicile le Parnasse fourchu. Et moy ie seray eternellement obligé d'amasser ce peu que mon esprit esclairé de vostre belle lumiere, pourra iamais trouuer de beau pour vous en faire des hommages ; de continuer par delà le tombeau ce grand excès d'affection qui me faiët paroistre trop temeraire en ce present suieët & me fait toutefois de legitime excuse contre cette temerité mesme dont ie me tiens coupable, & qui finalement fera que ie cheriray plus que ma propre vie l'honorable qualité.

De vostre tres-humble tres-fidelle,
& tres-obeissant seruiteur
CHARLES BODIN.



DISCOURS CONTRE LES DVELS.

Q Vand depuis quelque *Philon*
temps j'ay repassé les yeux *le Inif*
de mon esprit par dessus *en la vie*
toutes les sortes de sub- *de Moy*
jects, dans lesquels ils peu- *se.*

uent aucunement penetrer. j'ay trouué
finablement que cet ancien *Philon* grãd
Philosophe & personnage admirable
estoit bien fondé sur les subtiles & tou-
siours infailibles *m* aximes de la Philo-
sophie, lors qu'il disoit que toutes cho-
ses humaines trainentes encores en ce
bas monde le pesant fardeau de la mor-
talité sont sans cesse subiectes au chan-
gement; & peuuent, mesme en vn seul
moment, se veoir conuerties du tout
en leurs contraires. Et certainement

A

quand les raisons de Philosophie , les
tesmoignages des bons Autheurs , les
aduertissemens & assurances des saints
Peres & Docteurs de l'Eglise, les Edicts
& Arrests Irreuoables prononcez sur
ce subiect par la bouche de la Sapien-
ce eternelle , & contenus dans les sacrez
fueillets des saintes Escriptions , ne
forceroient point les plus farouches &
refracteres a confesser & auouer tout
ensemble ce changement és choses d'i-
cy bas; l'experience mere d'assurance
& de fidelité , est trop plus suffisante
pour le faire croire à ceux aux quels se
trouue encores quelque parcelle de
raison. Car si nous voulons ietter nos
pensées sur le tableau, non seulement de
nostre siecle , mais de tous ceux qui se
sont escoulez depuis les premiers fon-
demens iettez de ceste machine vniuer-
selle, nous sera il possible de rencontrer
quelque chose tant belle ou excellente
qu'elle ayt esté, laquelle victorieuse du
changement se soit conseruée iusques à
nos iours? Qui est ce qui se peut iustemēt
venter d'auoit eschappé les efforts , &
paré les coups de la violence de ce Tyran
indompté? Dont la rigueur ne ren-

contre personne luy voulant resister,
 qu'aussi-tost ne luy paye les salaires de sa
 temerité, qu'aussi-tost elle ne luy apren-
 ne qu'il est vrayemēt indomptable, puis-
 quel'aavarice ne le peut corrompre, la
 finesse ne le peut surprendre, la difficul-
 té ne le peut lasser, les prieres ne le
 peuuent esmonuoir, les menaces ne scau-
 roient l'esbranler. Et qu'au contraire
 deuant l'or, les pierres précieuses, & tou-
 tes les richesses, il a les mains fermées;
 contre les fineses, il a l'esprit bandé &
 tousiours vigilant; contre les difficul-
 tez, le temps glouton de toutes choses,
 est son aide ordinaire, deuant les pleurs,
 les souspirs & prieres, il se priue de l'ouye
 estoupant ses aureilles bien plus estroi-
 tement que ne fit iamais Vlyses pour
 euiter le charme des chansons des Syre-
 nes trompeuses; deuant les beautez ra-
 res & mignardises plus attraiantes, il se
 rend tout bigearre, & desdaigneux; con-
 tre les menaces, Il paroist tout boufi de
 superbe, enflé d'ire, & de fureur, mon-
 strant en fin que son ame carnaciere, &
 iamais rassasiée du sang humain, ne sera
 point paruenue au haut de ses contente-
 mens, qu'elle n'ait ruiné, & saccagé tou-

res les creatures que les Cieux enueloppent, & ne les voie cruellement traînez & précipitez dans le vague tombeau d'un aueugle neant. Et quant à moy quand ie considere que les anciens, bien qu'aueuglez dans l'erreur du paganisme, ont toutesfois amployé la meilleure partie de leur soing & diligence à edifier des temples, a dresser des autels, ordonner des sacrifices, faire des Prestres & Princes des ceremonies pour honorer iusques aux moindres de leurs fausses deitez, & que ie n'ay point encores rencontré dans toutes les histoires qu'ils ayent iamais faict mention du changemēt le laissant sans tēples, sans ceremonies, sās autels, sans sacrifices & prieres, cela me faict assez croire qu'il n'a point de pitié, qu'il est inflexible & que rien ne peut faire pencher sa rigueur du costé de la clemence. Puis quand i'arreste mes pensées sur les fureurs estranges qu'il a exercé sur tant de choses qui nous faisoient venir le nom de Dieu, voyans dessus la terre vn petit patron de sa puissance en des choses si admirables ie suis du tout contrainct de recognoistre en luy vne puissance estrange & generale sur

Nal.
com. lib
3. cap.
13.

toutes creatures, depuis les plus abie-
ctes, iusques aux plus recommandables
pour leur va leur. Car ie vous prie, que
quelqu'vn me dye maintenant ou sont
les grands Cyrus, les Darius, les Alexā-
dres, les Pompees, les Cefars, les Clouis,
les Charles-Magnes, les grāds Hērys ou
sont maintenant tant de chefs d'œuvres
ou tant d'admirables artifices, ou tant
de miracles des hommes ou sont à cette
heure les temples d'un Salomon, ou les
temples d'Ephaïse; ou les Colosses de
Rhodes ou les pyramides d'Ægipe, les
Pharos, les Mosolees, ou sont maintenāt
les admirables iardins de Babylone sus-
pendus en l'air, ou ces fourmis d'ivoire *Solin.c*
faicts avec vn tel artifice par vn Calli- 6.
chrates, qu'vn de leurs membres ne
pouuoit estre cogueu entre ceux des na-
turels, ou les amphitheatres de Rome, ou
sont ces villes si superbes; ou est Athenes
la docte, ou est Syracuse la sage, ou est car-
thage la vaillante, ou est Rome la née aux
victoires & tousiours triōphante; le sont
elles garenties des coups furieux de cet
horrible chāgemēt? ont elles en fin laissé
aux hōmes autre chose qu'vn repētir en-

tier d'auoir admitté, & finny des choses
 mortelles & perissables? O ambitieux, oë
 discours portez nres yeux & nres pensees
 vers le lieu ou vous estes, O pauures gës
 quel chemin tenez vous? l'ambicion est
 vne guide auëgle, gehenne de la vie,
 bourelle de l'ame, cruelle meurtriere de
 tous ceux qui la seruent, ennemie capita-
 le du genre humain, qui faict viure en la-
 guissant, ou mourir en viuans celuy qui
 la possede, & iamais ne permet qu'il re-
 pose sur le degre d'honneur qu'il n'a peu
 desirer qu'avec vne impudence. Neant-
 moins vous l'embrassez, elle vous em-
 porte, & non contents de vos fortunes or-
 dinaires & raisonnables vous cherchez
 des honneurs, des Royaumes, des Empi-
 res, & mesmes voudriez escheler tous les
 Cieux pour mōter au plus haut du thro-
 ne de nostre Dieu, & participer aux thre-
 fors & secrets plus cachez de sa diuinité.
 Que faictes-vous? pensez vous estre plus
 exempts du foudre du changement que
 ces grands personnages, que ces grands
 Roys, soubz le sceptre desquels tant de
 peuples ont courbé la teste & flechi le
 genouil? pensez vous qu'il ne puisse finir
 vos conuoitises sans mesure en coupant

Senec.
lib. 2. de
ben.

le fil, de vostre vie: croiez vous qu'il vous pardonne, luy qui ne veut pardonner qu'aux choses qu'il ne rencontre point, & ne laisse à rencontrer, que celles qui ne sont point encores.

Et ie dis d'auantage que quand il vous voudroit traiter plus doucement que tous les autres, il ne peut pas luy mesme, empescher que vous n'auanciez autant de vostre fin, comme vous aprocherez de ces grandeurs: car il ne peut forcer vostre nature, & cela est essentiel à vous mesmes. Il ny a rien en ce monde qui n'ayt vne inclination naturelle à ce changement, & la premiere cause qui nous faict veoir la lumiere du Soleil, elle mesme nous enuoie les tenebres de la mort, & nous pousse d'heure à autre, de moment en moment vers le tombeau nostre rendez-vous necessaire; & n'estoit que Dieu y a dés long temps mis la main, le Soleil demeureroit à cette heure produisant sa lumiere en vain, ne trouuant plus de creatures qui en eussent besoin. Mais la diuine & supreme bonté de nostre Dieu preuoiant sagement que la puissance de ce changement deuoit estre inflexible & trop puissante, s'il luy laschoit la

*Plus en
seruies.*

bride entierement & vsoit de son pou-
uoir en pleine liberté, le borna des le cō-
mencemēt du mōde pour empescher la
defaillance vniuerselle deuant son tēps,
establissant vn ordre en la Nature si rai-
sonnable , qu'il est comme impossible
que quelque chose tombe accablee des-
sous ses ruines, sans que quelque autre
prenne sa place , & ne garde son mesme
rang: & par ce moyē nous recognoissons
biē la vicissitude des choses & non pas
l'aneantissement de toutes choses. Pour
cēt effect des lors de son œuvre admi-
rable & creation de l'vniuers, elle vſe de sa
sagesse ordinaire en voulant que nous vi-
fions durant l'entier roulement des cieux
les saisons sans cesse s'entreſuiure avec vn
ordre digne de l'admiration de tous es-
prits terrestres & Angeliques, sans que
jamais l'vne ampiete sur l'autre, & que
l'vne cesse sans que sa fin soit l'assuré cō-
mencement d'vne autre. Ainsi les iours,
les sepmaines, les mois, les années, & les
siecles ne nous peuuent aucunement a-
bandonner, qu'au mesme instant les au-
tres ne paroissent pour nous aider de
mesmes faueurs que les passez : ainsi le
dernier point du iour, est le premier estre

de la nuit ; ainsi la Lune ne s'esloigne point de nostre hemisphere lassée de verser sur nos testes ses rousées doucement profitables, qu'en mesme temps ce beau flambeau du monde, le Soleil plein de lumiere ne sēble ouurir la trape des Cieux pour nous eslargir ses douces influāces. Ainsi la mort n'a pas plustost fait sa pasture des grands Cyrus qu'incontinent apres & chacun à son tour les Darius, les Alexādres, les Pōpées, les Cēsars, les Clovis, les Charles-Magnes, les grāds Hērys ont paru sur le large theatre du monde. Ainsi l'on a veu les Monarchies, les Empires se suiure de si pres, que i'aimerois beaucoup mieux dire qu'elles eussēt seulement changé leurs nōs & leurs sieges, que d'auouer qu'elles ayēt iamaïs gēmi lāguissātes en leurs ruine: ainsi celle des Perses suit celle des Assiriēs la premiere de toutes, puis des Grecs, & en fin des Romains. Et sans doute c'estoit ceste suite d'Empire sans interruption, que vouloit signifier nostre Dieu, lors qu'il fit paroistre ces quatre Monarchies au Roy Nabuchodonosor sous l'image d'une grande statue, dont la teste estoit d'or, la poiētrine d'argent, le ventre d'airain, & les iambes

Daniel

de fer: ne voulant qu'il y eust à l'auenir plus de distance entre ces quatre Monarchies, qu'il s'en trouua alors entre l'or, l'argent, l'airin, le fer; qui est à dire point du tout, puis qu'il ne s'en trouua pas plus entre le chef & le corps, qu'entre les cuisses & les jambes de ceste statue. Ou-

Arist. tre cela Dieu pour continuer son ordre
lib.1.de & d'auantage au&toriser le principe des
gen.cap Philosophes tire des entrailles de la Phy-
 3. sique, qui dit estre impossible (sans l'absolue puissance de Dieu) que rien de tout qui est entré en la condition des choses créées, puisse estre corrompu sans seruir quant & quant de moyen pour la generation d'autres seconds corps; apres que ce grād, ce né aux triumphes & tousiours victorieux Empire des Romains eut lōg-temps tenu le gouuernail de tout le monde, & voyant qu'il se dissipoit par l'vsurpation de ses propres, mais infidelles & rebelles subiets, fit naistre alors vne autre Monarchie, laquelle en fin n'a point esté moins florissante, moins grande en puissance ny moindre en estenduë, puis que ses Roys ont bien souuent porté sur leurs testes sacrées la double couronne de Roy & d'Empereur. Mais comme cette

derniere & puissante Monarchie a tiré son commencement de la fin de la Romaine valoureuse en son temps & redoutable en ses combats, & basti sa grandeur des ruines & encôbres de plusieurs Royaumes ses voisins: de mesme, il est certain qu'en suyuant la loy du monde, & l'ordre de la nature sur les choses terrestres, sa mort en fera bien tost naistre vne autre, qui cherchera sa gloire dans ses mal-heurs, & ternira le lustre de sa memoire pour faire briller aux yeux de tout le monde la lumiere de ses vertus. J'entends parler icy de la France nostre chere patrie, c'est elle seule, que ie veux dire maintenant n'auoir à sa naissance esté posée sur vne base permanente & iamais perissable, mais sur vn fondement qui deuoit à la longue s'affoiblir & se rendre incapable de la plus soustenir, qui deuoit se briser, & la faire tomber en la puissance rigoureuse du changement. C'est de nostre France dis-ie, l'œil du monde & la perle des Royaumes, que ie veux dire que tout ainsi que sa naissance surpassa la nature, & son commencement fut tout miraculeux, de mesme vn changement, (mais bien horrible changemēt

& du tout detestable, puis-qu'il sera contre l'ordre, & la loy de Nature) s'approche d'elle, & del-ia le tient d'une main prest de la sacrifier sur l'autel de la mort pour de son sang donner la vie à un nouvel Empire. C'est mon dessein, bien qu'en ce faisant mon ame pousse vers le Ciel un million de soupirs, & mes yeux versent dessus la terre des rivières de larmes: bien que ma bouche ne profere aucun mot, qu'elle ne tire autant de gouttes du sang de mon cœur affligé, & ne serve de traict durement enfermé pour naurer mon ame d'un coup mortel; car il n'importe, c'est chose bonne & sainte, c'est viure & se rendre immortel que d'employer sa vie en la sacrifiant pour la conservation de sa patrie. Je veux au peril de ma vie représenter aux François mes compatriotes bien ayez le peril grand, qui pend dessus leurs testés, la ruine qui ia commence de les accabler: je veux leur donner un tableau, dedans lequel ils ne verront pas les choses, qui leur sont demeurées apres le bris de leurs vaisseaux, mais le naufrage ou bien tost ils periront, s'ils continuent de se heurter cruellement contre le dur rocher du vice, qu'ils ont

tiré des plus profonds cachots del'enfer, pour en faire icy sur terre leurs idoles. Je sçay bien que telle representatiõ se trouuera de prime abord bien peu agreable deuant leurs yeux, mais comme aux maladies extremes la discretion des meilleurs Medecins sçait fort bien appliquer les extremes remedes , il faut donner à nostre pauvre France desolee, gisante en terre desia frappee du Ciel & couuerte de playes , vn auertissement dernier & comme desesperé puis qu'elle gist en ses extremittez: qui pourra toutefois luy servir de potion salutaire pour chasser de son ame cette fureur brutale, qui comme le feu cuisant d'une fiebure brulante luy desperit son foye, & autres parties nobles de tout son corps , & tels auertissements derniers ont souuent garanti les plus desesperes, & fait tomber les verges des mains de nostre Dieu.

Or d'autât que c'est vn argument bien fort pour prouuer que nous approchons de nostre fin , & courons à toute bride vers la mort , que de monstrier comme desia par vn long temps nous auons respiré l'air du monde, & iouy de la lumiere des Cieux (car personne n'ignore ce pe-

De se-
res.

tit prouerbe, lequel bien que commun, est toutefois tiré du milieu de beaucoup d'autres veritez, & nous apprend que nul d'entre les hommes ne peut estre, & auoir longuement subsisté) ie commenteray pour vous faire croire que le changement de la France s'auance fort à vous desduire comment, & combien il y a qu'elle a prins sa naissance. Il n'y a personne tant peu soit il versé aux histoires de nostre France, qui ne sçache qu'il y a plus d'vnze césans, que lors que la mauuaise fortune de l'Empire Romain le tiralloit & deschiroy en pieces, & que plusieurs nations coururent pour en auoir chacun leur piece, comme les Ostrogots, l'Italie, les Visigots, l'Espagne, l'Aquitaine, les Bourguignons, vne partie des Gaules, les Vandales, & l'Afrique & les francs, peuples de Franconies Prouince d'Alemagne, n'oublierét point de se ietter dans vne partie des Gaules, & furent tant fauorisez de Dieu en cét affaire & de sa diuine prouidēce, qui vouloit par leur valeur & vertu singuliere ietter les fondemēs d'vn nouuel Estat, qu'ayant chassé tout ce qui se rendoit contraire à leurs desseins, ils establirent cette grande mo-

narchie.

Et d'autant que c'est bien peu de chose que toutes entreprises soient hautes & ayent de beaux & rares commencemens s'ils ne sont accomplis d'une suite semblable, & n'atteignent leur perfection; & que la vertu qui meurt en sa naissance comme ces petits oiseaux dont a parlé Homere Prince des Poëtes Grecs, n'est pas proprement vertu, ains un auorton de la vertu, ou plustost un vice, qui se presente sous le masque d'une vertu imaginée, ces premiers fondateurs de ce Royaume ne se contenterent pas de veoir ces premieres pierres de la France posées à la faueur du ciel, mais se resolurent de faire sortir leurs hauts desseins à effect, & rendre la Monarchie Françoisse la plus florissante la plus grande qu'autre qui fust au monde, & telle que nos peres l'ont veüe. Mais comme, il n'y a point de grandes entreprises qui n'attirent apres soy de grandes difficultez, de grands perils & dangers, aussi parurent incontinent de tres-grands ennemis qui s'opposoient aux volontez de ces nouveaux hostes, qu'il falut vaincre peu à peu, & commencer par chasser les Romains de leurs

*Herod.
lib. 7.*

*Du
Hullā
lib. 1.*

*Senec.
lib. iij.
mala
honis.*

Gaules, les Huns qui sous la conduite de ce fleau de Dieu, du superbe Attila estoient entrez en nombre de cinq cens mille combattans, debeller les Bourguignons, subjuguier les anciens Allemans, de faire les Sarrazins, exterminer les Arriens, les Gots, Ostrogots, Vizigots, Alans, Huns, & les Sueues. Puis quelque suite d'annees apres, il leur fut necessaire de dompter les Bretons, les Normans, les Gascons & finalement chasser les Anglois qui s'estoient desbordez sur cette pauvre France comme vn grand deluge resolu par ses flots & tempestes luy apporter vn naufrage vniuersel. L'on veid alors comme la vraye vertu est amoureuse des perils, & que iamais elle ne iette sa veue sur les traux qu'il faut qu'elle supporte, mais seulement sur le chemin glorieux qu'il faut qu'elle tiene. L'on veit comme tousiours les ames belles & genereuses quittent l'oysieté & fuient le charme du repos, parens de tous les vices & source de tous malheurs pour cherir & embrasser les traux, qui ont rendu vn Hercules immortel; pour fuiure la vertu, qui seule les empesche de pourir au tombeau & faict sçauoir leurs

L'on

L'on voit comme ces nouveaux habitans de ce nouuel Empire, ces fondateurs de nostre petit monde se monstrent sans cesse vrayement nez aux combats , endurcis au trauail, tres-doctes en l'experience del'art militaire , accoustumez à vaincre, moderez & sages en leurs victoires , & en fin ne cedans à nul d'entre les hommes en courage & valeur au rapport mesme de tous leurs ennemis & amis. Car chacun sçait que pour demeurer vainqueurs & triumpans de tant, de si grands & si belligueuses nations , il ne faut oublier d'employer les peines , les veilles , les iours , les nuicts , les sueurs, les trauaux, le courage, la force, le vaillamment combattre, & tout ce que la victoire veut veoir aux enfans & nourrissons de Mars auant de leur liurer l'auantage sur leurs ennemis qu'ils cherchent au grand peril de leurs vies.

Certainement il faut que ie confesse librement que ie demeure grandement estonné, & comme du tout hors de moy-mesme quand ie m'amuse à contempler la grandeur & puissance de tant de peuples effroiables en guerre & redoutables en leurs armées, que ces premiers Athle-


Tit. Li
lib. 4.
dec. 1.

tes François ont terracé & dissipé comme foudre de guerre, ie m'en estonne, & ne la pourrois croire, si quelque bon auteur ne m'apprenoit que la bonne fortune suit bien souvent pas à pas la vertu. J'admire comme ce Mars, qui iamais n'a voulu endurer de cōpagnō parmy les armes, leur a neātinoys permis pour leurs beaux gestes & heroïques faicts meriter de prēdre place au plus haut de son thron. Mais i'admire encores d'auantage comme ces hommes au milieu de leurs plus grandes victoires, & plus agreables prosperitez, n'ont iamais manqué d'yser d'vne prudence & sagesse admirable, cherchans dans le bruit & remuement des armes les moins de conseruer vn iour en pleine paix, ce qu'il s'acqueroient à la pointe des espées & au pris de leur sang. Car bien que ie sçache que c'est l'ordinaire de la Nature bonne mere commune de ne laisser prendre naissance à rien, qu'elle ne luy produise aussi tost les moyens propres & conuenables pour se conseruer en son estre vn raisonnablement long espace de temps: & que pour cēt effect la mere n'a point plustost conçu, & receu dans ses entrailles les

effects d'un sainct mariage, qu'incontinent toutes les parties de son corps, depuis les plus nobles, iusques aux plus abiectes, ne conspirent ensemble pour enuoyer dans ses doubles mamelles cette douceur du lait, aussi tost preste d'alimenter l'enfant, qu'il aura veu la lumiere du monde. Et la terre iamaïs ne pousse hors de son sein les animaux, les arbres, les plantes, & les herbes, qu'elle aussi tost n'ordonne vne bonne partie d'elle mesme pour les nourrir, & non contenté de leur donner sa propre substance pour leur viande ordinaire, perce son corps de toutes parts pour en faire sortir les sources des fontaines, qui cōme son sãg coulēt dedans ses veines, pour les soullager en leurs chaleurs excessiues & rassasier leur soif. Bref que soit au Ciel, soit en terre, soit la profondeur des mers & par toute la grande varieté des creatures de nostre Dieu il ne se rencontre rien, qui ne s'acquitte avec ardeur & feu d'amour des devoirs qui sont requis en ceux, qui portent le charirable nom de pere & mere. Si est ce toutefois que ie trouue vne grande difficulté, & me semble comme impossible, que nos ayeulx ayent peu quel-

quefois recueillir leurs pensées du feu de la guerre pour les amplier aux constitutions des bonnes lois, & les armes sur le dos, les espées traittes au poing faict de saintes ordonnances pour establir parmi eux de bonnes mœurs, songent à résister, & à vaincre leurs plus cruels ennemis par les armes, & à se maintenir & conserver leurs victoires tout ensemble par les loix & bonnes mœurs. Neantmoins il est certain que tout ainsi qu'ils ont engendré la France par la force de leur courage, sans laquelle aucune chose grande ne peut estre entreprise : de mesme ils l'ont nourrie & esleuée par le délicieux aliment des vertus morales & bonnes mœurs, sans lesquelles les choses les mieux establies sont mal asseurées, ils l'ont conservée par leur moyen & garantie des coups de tant de cruels ennemis, tant de corruptions, tant de reuolutions de siècles, & tant de causes vniuerselles, qui ruinent les Empires. De sorte qu'il semble que peu apres que cette Monarchie veint a esclorre du precipice de la grandeur & puissance de tant de nations, la bonté & la faueur du Ciel conseilla à nos premiers François de se servir principale-

ment de cette vertu de bonnes mœurs pour nourrir leur Estat, & l'entretenir en son estre long-temps le plus remply de toutes perfections, qu'autre qui fust au monde. Et certainement ce ne fut point sans raison qu'ils receurent vn tel conseil de la part de nostre Dieu & s'en rendirent fidels obseruateurs puis que nous auons veu que par ce moyen la France a esté cōme vn grand monde plein de tous contentemens, de iustice, de vaillance, & de bon-heur: comme vn grand temple plein de diuers autels, ausquels on a peu veoir les vrays images de la religion & pieté: comme vn grand domicile de doctrine & de science d'où sont sortis tant de Platons, tant d'Aristotes, tant de saincts Augustins, & tant de saincts Thomas: cōme vne grande maison illustre, qui a produit tāt de Martels, tant de Philippes, tāt de Clasquains, tant d'autres qu'il me seroit impossible de les nombrer, comme en fin vne maison Royale & grand Louure, d'où sont sortis tant de grands Princes & genereux Monarques, tant de Clovis, de Charles magnés, de Capets, de saints Louys, de François, de Grāds Hērys Toutes lesquelles grādes ames suscitées & choses



de Dieu dans son sacré conseil pour exécuter ses hautes pensées de la grandeur de cet Estat se sont tellement & avec tant d'excès d'amour employées à son établissement à l'augmentation de sa force & grandeur, à son ornement & à sa beauté, à son soubstien & sa conseruation, qu'elles l'ont rendu le chef d'œuvre, le miracle du monde, l'amour mesme de ses voisins, l'honneur de tous les peuples, & en fin le mignon & fils aîné de nostre Dieu.

Mais cōme il arriue ordinairement que le Soleil apres s'estre roulé du plus bas lieu de nostre horison, iusques au plus haut point de nostre hemisphere, se sent après couler de ce degré pour estre, se semble, précipité iusques hors le centre de la terre: & que le traitt, bien que parti de la main d'un archer avec violence, & soit apres monté iusques au plus pres de la voute des Cieux, est toutefois contraint de finir son vol par vne chute honteuse, donnant du nez en terre: de mesme ie preuois, mais hélas avec regret: que nostre France cette grande Monarchie apres auoir monté iusques au plus haut du thron de l'honneur, se verra, & en bref, violentee & renuersee au plus bas lieu de la

terre, pour estre la plus abiecte de tout le mōde pour seruir de iouet au chāgemēt, de pasture à la mort. Il est vray qu'il se rencontre en cela quelque chose de dissemblable, parce que le Soleil ne descend point de dessus nos testes, que pour accomplir la course, qui luy est cōmendée des sa premiere cōstitution par l'eternelle prouidence, pour illuminer successiuelement toutes les faces de la terre, & les faire participantes de ses graces chacun en leur tour. Quant au traict, ce n'est rien contre sa nature, si lors que la force empruntée de son archer luy manque, & ne luy reste plus que son corps chargé de soy-mesme & appesenti d'une grauité naturelle, il tire vers le centre de son repos: puis qu'au contraire c'est auouër les Philosophes naturels, lesquels disent fort à propos que comme les corps legers ne peuuent descendre sinon forcez par la violence de quelque contraire; ainsi ceux qui se rencontrent grossiers & pesans, ne scauroiēt quitter le centre de la terre, que par force & malgré eux. Mais la chute de la France Princesse de l'Europe, le changement & la fin de nostre Estat le Royaume des Royaumes du monde, est d'autant plus

violent & esloigné du naturel, qu'il est directement contraire à la volonté de son souuerain Seigneur, & repugnante aux lois tant naturelles qu'humaines.

Quand ie dis cecy la parole me manque, & ne sort plus de ma bouche que des souspirs, le contentement & la ioye abandonnent mon cœur, & liurent entierement leur place à la tristesse & aux regrets, qui s'y rendrôt les maistres pour vn lōgstēps cette pensee me donne grand subiect de dire ainsi que dit autrefois le bō lob affligé; ma feste est bien maintenāt chāgée en deuil, les doux accords de ma musique en pitoyables cris, & mes cantiques de ioye en lamentations accompanees de larmes bien ameres. Ce discours me faict veoir clairement les miseres qui talonnent sans cesse les imbecilles habitans de ce bas monde, & comme ils n'entrent iamais si tost en la possession de quelque contentement, qu'au mesme instant ils ne ressentent l'inconstance du monde & la malice de la fortune ennemie iuree du long repos des hommes, l'arracher de leurs cœurs pour y fourrer mille languissans desplaisirs. Ce discours me faict aussi suffisamment cognoistre, qu'il ny a chose en

terre, qui ne donne cent fois plus de subiect de la plaindre, & desplorer son estre en la considerant d'un esprit meur & sans passion; que de la louer, & se resjouir de ce qu'elle a de beau & de plus reloué. Le changement de mon discours me servira de preuve suffisante, & rendra les plaintes que ie fais discrettes & raisonnables: car l'on veoit que tout ainsi que mon cœur forçoit ma plume, tout à cette heure, descrire des choses toutes pleines de ioye parfaite, qui monstroient bien que mon ame estoit plongee comme au milieu d'une mer de contentement, ainsi au mesme instant mon ame contrainst la mesme plume de tirer sur le mesme papier l'image de son affliction, & représenter par mes cris & souspirs l'amertume de mon cœur. La France auoüra mes paroles, laquelle m'a maintenant fourni subiect de rire & de combler mon ame de belle resjouissance en parlant de son commencement, & auacent en public la grandeur de ses merites, & à cette heure me fait precipiter dans des abymes de tristesse, & tire de mes yeux des fontaines de larmes quand ie pense aux moyens, qu'elle a avec tant de mal-heur & de danger choisi pour

finir sa vie , & rendre les hommages au changement. Et me semble à propos de dire, que tout ainsi que c'estoit chose tres-belle à veoir, que le grand & venerable temple de Hercules, & qui faisoit tomber en agreable admiration en contemplant l'artifice admirable ; avec lequel il estoit fait, les richesses & beaux ornemens d'oit il estoit paré ; mais la sortie en estoit effroyable & hideuse pour la rencôtre d'un Sphinx, qui estoit à la porte & vous faisoit horreur.

De mesme apres la consideration de nostre France vray temple de sa valeur , de son merite de ses victoires, de ses miracles qui a esleué mon ame iusques au comble de la ioye , iettant maintenant mes yeux & mes pensees vers la porte de sa vie par laquelle elle en doit sortir : ie demeure pâmé, & comme demy-mort à la rencontre d'un monstre espouventable , qui se presente à moy toute souillie du sang François, & portans en son front le nom de l'Idole des Duels.

Monstre hideux, & qui peut seulement me fournir subiect de rendre mon ame desolee & affliger mon cœur : Monstre qui fait repasser mes yeux sur le tableau

de nostre temps , & considerer demy-tranfi & languissant comme les François insensez , las de viure en honneur cheries chez les nations voisines & barbares comme l'espreinte de toutes les vertus commencerent eux mesmes de machiner leur ruine , comme ennuyez de se voir la perle & l'œil vnique l'vniuers , ils ont dressé , ainsi que des Phœnix , le bucher ou sera bien tost consumée leur Monarchie. Ou plustost comme ennuyez & depitez contre leurs vies pour iamais n'auoir peu rancontrer ennemys capables de leur oster , ils ont eux mesmes & de leur propre sang , pestri cét idole , contre lequel ils ont desia brisé l'image de leur félicité , & donné la vie a ce monstre effroiable en respandant leur sang sur ses Autels infames & inhumains. Et scachans bien asseurement que la France ne peut rien craindre , que la France seulement , rien redouter que ses bras & ses forces , tout le grand nombre de ses voisins & mille fois autant n'ayant pas le pouuoir de l'attaquer & battre en ruyne , c'estant du tout semblable au Phœnix ce premier , ce plus beau , ce Prince des oyseaux que le Ciel enuironne , qui ne peut

mourir, ne peut quitter ce mode que sur le bois qu'il se prepare, qu'au milieu du bucher, que luy mesme a dressé: Ils ont eux mesmes conjuré contre leur vielles ont fait naistre le mōstre qui les deuore, & forgé de leurs mains les glaiues dont ils s'escorgēt. Helas: & qui pouroit douter à cette heure que les Frāçois peuuēt tōber biē tost enseuelis dedans leurs ruines puis qu'ils cherchent leur mort, puis qu'ils se fourent parmy les Duels, qui sont biē plus mortels & pestiferés, que ne furēt *Plut. en ses vies.* jamais ces peuples du Royaume de Ponts nommez Thibiens: lesquels de leurs halaine, de leur parole, de leur regard faisoient tomber hōmes, femmes, & enfāns en d'extremes douleurs: puis qu'ils percent eux mesmes leurs poitrines & frappent iusques dedans leurs cœurs, Qui dis-je doutera que nostre France ne perisse, & soit bien tost changée? puis que l'Euan-gile nous enseigne que tous Royaumes, qui seront diuisez entre eux mesme tomberont en telle desolatiōn, que les maisons chairōt les vnes sur les autres & que nous voyons la diuision si grande entre tous les Frāçois, que les maisons sont ramplie de querelles & meurtres,

que la paix & bienueillāce particuliere ne trouuēt point de place qui leur soit asseuree pour vn moment , & bref que tous les hommes s'entretuent mutuellement & sans subiect , & transportez d'vne fureur plus que brutale, conspirent rudement contre leur coeur principe de leur vie. Mais aussi d'autre part qui le plaindra ce peuple qui aura dans son cœur vne douleur conceuë de de son malheur, puis qu'il le cherche, & n'est cōtent qu'a sa rencontre. Car il est certain qu'encores que la volōté de nos François se laisse amporter par la violence effrenece d'vn desespoir, qui les traine bien souuēt sur le chāp de cōbat, neantmoins Ils y cōsentēt & cherissent la mort : & sçachant bien que la vie ne nous est point eslargie par nostre Dieu de soy trop courte, & qu'il despend de nous de l'accoursir ou continuer selon que nous en voulons bien verser ou mal à propos, ils se delectent d'auoir puissance sur elle, & se resiouissent grandement en la sacrifiant pour rendre honneur à leur Idole. Et bien qu'ils perissent puis qu'ils le veulent ie cōfesse ingenuemēt quant a moy que ie ne regretteray iamais tant leur perte & leur mort,

*Senec.
lib. de
breuit.
dita.*

comme ie desplorera y (& Dieu le sçait, & est tesmoing fidelle si le coeur ne m'en seigne) le genre de leur mort , les moyens dont ils vsent pour se ruiner eux mesmes. Car de songer que l'Empire françois, qui a esté par l'extraordinaire abondance de ses merites le soleil des Empires, le premier des Royaumes, tombe maintenant en la puissance du changement qu'il subisse les loix de sa rigueur pour l'aguir accablé de ses ruines, & estre, apres enseuely au tombeau de l'oubly, c'est à la verité chose bien estrange & lamentable: & neantmoins c'est chose infallible & du tout necessaire comme arriuant par la loy de nature exacte & rigoureuse en tous ses droicts. Il faut que tout perisse & que chacun luy rendel'estre qu'elle luy a donné avec crât de liberalité à son comement. C'est vn ordre estably par la sagesse infinie, qui veut que toute chose vienne à son tour pour enrichir ce monde belle oeuvre de ses doigts, qui voulut autrefois que cette grâde Monarchie, qu'il institua luy mesme & benist de ses mains sacrees au milieu d'Israel, cét Empire ambulatorie & long-temps vagabund par les deserts, finist en fin pour faire place aux Assyriens, les

1. reg. 10

Assyriens aux Perses , les Perses aux Romains, les Romains à la France. Ordre diuin qui merite de tirer de nos bouches des loüanges immortelles en sa faueur , puis que sans luy iamais le monde n'eust peu iustement se uenter d'auoir tenu entre ses bras, d'auoir nourry & esleué ce grãd & renômé royaume François. De penser dis je que les François qui ont au temps passé serui de miroir & de miracle au monde pour contenir en eux toutes les plus rares vertus , ainsi qu'en la pierre nomme Opale, se retrouuent toutes les belles couleurs, qui sont en toutes les autres pierres precieuses; pour auoir contrainct la vertu mesme de rendre hommage à leurs perlonnes: que les François dis je, seruent de pasture à la mort , c'est à la verité chose suffisante d'esmouuoir vne iuste douleur es coeurs les plus diamantins. Et toute fois chacun sçait que le commencement de nostre estre , est vn large chemin qui mene vers la mort, chemin qui est inéuitable & que toutes creatures doiuent tenir les vnes apres les autres. Pour preuue suffisante de mon dire l'on a veu tous les grands hommes & miracles de la terre rendre les derniers souf-

pirs & payer le tribut à la mort ; Moysé ce grand Roy & sage conducteur du peuple d'Israel, ce venerable legislateur , ce Prestre pieux & saint Pontife, ce Prophete admirable ne fut il pas en fin visité de la mort ? la rigueur de ceste Parque impitoyable ne l'empescha elle pas d'entrer en la terre de delices pour y iouir du repos merité des longs-temps par ses sueurs & trauaux ? Dauid ce Prince des grands Roys, ce vray amy de nostre Dieu apres tant de hauts faicts, tant de diuerses louanges & saintes operations, ne laissa il pas son corps passe & glacé pour estre enfermé sous la lame & ietté dans la terre ? Salomon ce fils aîné de la sagesse, ce pere possesseur de toutes sciences, ce Monarque sans per ne fut il pas frappé du glauiue de la mort pour luy faire eschanger sa vie à vne eternelle recompense ? Et les Cirus, les Darius, les Alexandres, les Pompées, les Césars avec tout leur courage, leur valeur, leurs vertus singulieres, leurs conquestes, leurs victoires sans nombre, n'ont ils pas esté reduits en vn peu de poussiere & de mauuaise odeur apres le coup mortel receu dans leurs poitrines ? Nos Roys mesmes les Clouis , les Charles

Charles-Magnes, les François n'ont ils pas esté rencontréz par la faux de la mort & réuersez au tombeau pour estre nourritüre des vers? Mais que veux ie dire, à quoy tant de discours, n'auons nous pas veu de nos yeux propres & à nos faces ce Roy des Roys terrestres, ce Monarque tousiours victorieux & triumphtë, ce Prince redouté de l'Europe & au delà de tous costez, nostre Grand Henry enfant d'honneur & de victoire estre esgorgé des mains d'une furie infernale, inspirée des plus sales demōs no^e estre rauy & arraché d'entre nos bras pour estre mis parmy les cendres de ses ayeulx? Ne l'auons nous pas veu au milieu mesme de ses triumphes, au comble de sa ioye, pendant que les cantiques de ioye sortoient des bouches de ses subiects, & retentissoient par tout le monde à son honneur, au cœur de son Royaume, au milieu de son peuple bien aymé, parmy ses Fauoris, estre attaqué de la Parque ennemie de la vie des hommes, estre frappé de son glaiue funeste, & demeuré gissant en terre palle, sans vie, & propre seulement à tirer des larmes des yeux de tout le monde, & le rendre confus & desolé en considerant la rigueur de la mort,

C

ne peut respirer l'air du monde ou mesme *Lib. de*
 receuoir sentiment es parties de son corps *Euch. c.*
 & commencer de viure, qu'à l'instant il *86.*
 ne soit tributaire de la mort: C'est l'asseu-
 rance qu'en donnoient les anciens, qu'ad-
 selon leur coustume ils faisoient vendre *Plut. en*
 les choses necessaires pour les funerailles *ses vies.*
 & pompes funebres dans le temple de Ve-
 nus Deesse de generation & de naissance,
 apprenans par là que tout ce qui a quel-
 que cōmencemēt de naistre aura pareille
 mēt fin de mort, cōme estāt le naistre & le
 mourir sous vne mesme deité: C'est l'ad-
 uis du sentētieux Senecque, lequel enco- *Senec. in*
 res|qu'il eust les yeux esblouis des brouil- *Epist.*
 lards de fauce religion, n'a laissé toute fois
 de parler diuinement des choses natu-
 relles & humaines, & principalement en
 ce lieu ou il dict avec hardiesse, que c'est
 vn tesmoignage de peu d'esprit, que de
 craindre la mort, puis que la crainte n'a
 pour obiet que les choses douteuses, &
 que la mort est seure & certaine à tous vi-
 uans: & puis, dict-il, personee ne doit
 douter, nul ne se doit plaindre de ce que
 la mort a puissance sur luy, & de se veoir
 en la condition, de laquelle nul de tous
 ceux, qui ont part à la nature humaine, ne

se rencontre exempt.

Mais il faut prendre garde de bien prendre quel chemin l'on choisit pour courir à la mort; il faut que le cours entier de la vie, que nostre Dieu nous a donnée, soit l'unique chemin, qui nous guide au mourir: il faut que nos corps seruent si longuement, que venant à s'vser & affoiblir par le travail, & ne pouuant plus seruir à noz ames d'organes & d'instrumens capables pour exercer leurs charges & fonctions naturelles, ils les forcent de les abandonner ne voulant demeurer inutilles en ce monde: il faut en fin que ce ne soit qu'à force de viure par vn long-téps qu'on attrappe la mort. Ou du moins si quelquefois nous auançons nos iours, & semblons comme contraindre cet instant, qui doit veoir nos ames quitter leurs corps sans vie & sentiment, de se haster, il faut que ce soit en nous fourans parmy les iustes armes, dans les combats ordonnez par les hommes sages & vraiment prudents, permis par les loix tant naturelles qu'humaines, & dans le Ciel approuuez par nostre Dieu dans son sacré conseil. Car d'vser de moyens illites & contraires à toutes bonnes loys,

comme font nos François, qui transportez de passion & fureur infernale se iettēt sur eux mesmes comme Loups ravisans sur l'innocent Agneau, le frappent & transpercent le cœur de leurs espees, & souillant leurs mains de leur sang propre forcent leurs miserables ames de sortir goutte à goutte de leurs corps: c'est a mon aduis chose bien horrible & desplorable & qui non seulement peut effroyer le reste des humains, mais estonner aussi la saincte troupe des ames bien-heureuses qui sont maintenant en repos dans le sein du fils de Dieu. Et c'est icy ou i'aduouē derechef que la perte de nos François ne m'est point tant fascheuse, puis-qu'il faut que tout meure & que tous les grands Royaumes & signalez Empires, qui nous ont deuancez, ont finy & sont tombez en ruyne apres estre desmembrez & mis en pieces par leurs voisins: & que tous les hōmes dignes de memoire & Princes plus remarquables n'ont en fin laissé que leurs cēdres froides pour recevoir les larmes de leurs amis, cōme ie desploreraï a me remēte le chemin maudit qu'ils tiennēt, les moins horribles & du tout detestables, dont ils se seruēt pour courir à la mort, &

passer de ceste vie en l'autre. Car ce sont des moyens incognus à tous viuant sinõ depuis quelque suite d'annees, que tout les Demons ensemble les ont tirez des plus sales cachots de leurs enfers pour les fourer par tous les lieux de nostre pauvre France, les rendre les superbes tyrans de nos François, & en faire leurs agens tres-fidelles pour attirer a eux, & faire tresbucher les ames a millia-ces en leurs griffes & puissance inhu-
 maine. Des moyens qui font voir que la France produit, & esleue des monstres, dont elle estoit exempte par tant de tẽps entre tous les Royaumes de la terre, & la rendẽt coupable d'vne ferocitẽ, que les bestes les pl² farouches & cruelles de mes-
 me espee, ne scauent point. Des moyẽs, qui me font bien à ceste heure approuuer les visions, qui m'ont estẽ suspectes par vn long temps, qui parurent vne nuit à Childeric l'vn de nos Roys, quand il veit au deuant de sa maison Royale des Lycornes, puis des Lyons, & en fin des Ours & des Loups se battans & deschi-
 rans eux mesmes. Des moyens, qui me font admirer le iugement qu'en donna lors la grande Royne Basine, disant au

De
 H i lã
 lib. 1. de
 Seres
 Tom. 1.

Roy son espoux & Seigneur que cela luy vouloit figuifier les diuers naturels des François les subiects; & que comme ils ne quitteroyent point en leur premier & second aage en courage & vertu aux Lyons, & aux Lycornes, aussi ne pourroient ils estre surmontez sur la fin de leurs iours en cruauté & felonnie par les Loups, & les Ours. Et de fait quicōque ar- restera tāt soit peu ses pēsées sur la contē- platiō de la cruauté & Barbarie de nostre siecle, iugera que cette sage Roync estoit vraiment inspirée de Dieu, & reçeut lors du Ciel au trauers des nuées espais- ses de l'infidélité, le don de Prophetie: vo- yans que comme nos François ont esté par le passé, & en la fleur de leur Empire de vrais Lyons en grandeur de courage & des lycornes par l'abondance de tou- tes leurs vertus; de mesme par la Me- tampsychose tant celebrée par le diuin Platon, ou changement des ames plei- nes de raison en des brutales, ils se sont faiçts en leurs vieillesse & au desclain de leur Estar des Loups & des Ours pour se deschirer eux mesmes, & mettre en mille pieces.

Mais que disie, ie me trompe grande-

ment & abuse mes esprits quand je dis cecy : tels animaux n'ont iamais eu tant de cruauté pour chacun d'eux en leurs especes . iamais Ours ne fut si felon que de jeter sa pate lourde & assommante sur ses sœurs, sur ses freres, sur ses peres & autres, si telle distinction se trouue entre de telles creatures : iamais Loup pour rauissant qu'il fust ne s'oublie tant que de blesser de ses dents meurtrieres, ceux qu'il a rencontrez estre de son espece. Et pleust à Dieu que tous ces miserables, qui ont l'ame enuenimée de ce poison, qui ont enraciné dans leurs peruerses volontez l'opiniastreté de se jeter dans le hazard des Duels, feussent par la bonté diuine, comme des Lycaons & autres Calistons, transmuez en des Loups & des Ours. Au moins contens des animaux & creatures que Dieu a destiné pour leur carnage iournalier, ils passeroient leurs iours en fuians & bondissans parmy les mons, les vales & forests plus desertes; craignans de jeter seulement leur regard sur la face du moindre d'entre les hommes, reuerans par leur fuite celuy qu'ils recognoistroient estre le vray image de leur Dieu & createur. Mais non,

ce sont des hommes, & mourront tels ; ce sont des hommes, mais des hommes, qui despoillez de leurs rares beautez , de la douceur grande de leurs mœurs, de leurs vertus anciennes & transcendentes demeurent des carcasses laides, & difformes, ennemies de la vie de leurs freres (ie dis freres, puis qu'ils respirent tous vn mesme air de la France, & sont nourris dans le sein d'une mesme patrie qui sans respect aucun se ruent sur eux furieusement pour exercer les funestes devoirs des Parques infernales. Des hommes, ô grand Dieu, qui foulans aux pieds la sainteté de leur religion, la pieté qu'ils doivent naturellement à leurs parens, le respect aux bonnes loys, l'obeissance à leur Prince, & bref qui abusans de la raison puissance principale de leurs ames, ne recoivent resiouissance en leur cœur, sinon lors qu'enragez, les espees nues au poing ils se creussent des playes mortelles de leurs mains propres. Des hommes qui n'adorent rien que leur idole, & leur monstre alteré de leur sang, qui ne reuerent rien que leurs Duels, qui ne respectent rien que les infames & prodigieuses loys de leur faux point d'honneur, qui n'o-

beissent à rien qu'à la puissance iniuste de cet inhumain tyran , qui ne cherissent rien que la pointe de leurs espèces instrumens de leurs damnables sacrileges. Et *Dan. 2.* c'est icy ou cette grande statue , ou plustost ce Colosse représenté au Roy Nabuchodonosor par le Dieu de l'yniuers , reuient en mes pensees , & me fait considerer que comme l'or d'icelle fut aux Assiriens , l'argent aux Perses , l'airain à l'Empire de Rome , ainsi le fer est maintenant le portraict de nostre Monarchie Françoise. Car de quelque part que ie regarde , quelque costé que ie iette mon esprit , ie n'apperçois autre chose que fer , rien dans nos François que le fer , rien dans toutes leurs pensees que fer , rien dedans leurs volonteiz que fer , rien dans leurs mains que fer : mais encores du fer sorti du plus creux des enfers , forgé par les demons sur les autels de l'idole des Duels , fer dont la trampe est si dure , que penetrant les corps , il donne iusques dedans les ames , & les naure iusques à la mort.

O grand Dieu redoutable en vos iugemens pourquoy tant de miraeles passez en faueur de nostre Frâce au tēps de

sa naissance, & maintenât tant de malheurs en ce malheur qui nous la raura ? Pourquoy tant de faueurs en son accroissement, qui nous forçoient d'auouer que le Docteur Angelique saint Thomas a eu raison de dire, que souuent la nature cede au miracle, & que la vertu rend quelquefois son œuvre plus parfaite qu'on eust osé souhaitter, & maintenant tant de *Diuis* menaces sur sa fin ? Pourquoy, mon Dieu *Tho. ar.* en sa ieunesse tant de faueurs du Ciel, & *1. g^{ra}. 79* & à cette heure en sa vieillesse tant de disette *3. part.* de vostre grace, que ceux qui ont autrefois receu dās leurs bras vostre force, vostre vertu dedās leurs faces, dans leurs esprits vostre lumiere, que ceux qui ont esté l'anneau de vos doigts, les hommes de vostre bras droit, les fils aînez de vostre chere Espouse, soient maintenant les sales & hideuses victimes, qui s'immolent eux mesmes, & esgorgent leurs âmes aux pieds de leurs idoles.

Mais c'est à vous, François, que j'adresse mes plaintes, qu'avez vous fait ? vous avez dressé des idoles infames par tous les coings de vostre France, des idoles qui ne reçoient contètement aucun qu'en se saoulāt de vostre vie, & voyans

leur autels begner, en vostre sang: vous avez quitté, & mesprisez tous les iour la verité de vostre Dieu pour seruir aux images de toute iniquité & adorer des monstres les plus hideux & cruels que les enfers sçauroient produire. He bon Dieu! ou est donc maintenant vostre sainteté de vie, vostre religion ancienne, & pieté? ou est vostre vertu, ou sont vos bonnes mœurs, ou est vostre grand zele vers vostre creature? Mais ou est vostre memoire? la lumiere de vostre esprit est elle tellement esteinte, qu'elle ne puisse vous faire veoir clair à vos fautes & vous faire songer aux rudes chastimēs, qui vous attendent pour punition de vostre offence? avez vous oublié que Dieu sçait bien punir les creatures infidelles, qui par legereté ou malice trop grande se sont faités apostats & ont cessé d'adorer sa puissance souveraine & vniue) pour rendre honneur aux mensonges & fauces deitez? Ne vous souuient-il pas des peines redoutables, qu'il a fait tomber sur le chef de ses fauoris, de son peuple bien aymé, de son mignon esleu entre tous les autres hommes, des enfans d'Israël, pour lesquels sauuer de la puissance tyranni-

que de leurs ennemis iurez, il feit au tēps passé tant de miracles en l'air, sur terre, & dans les eaux, & ce pour auoir dressé parmy eux vn idole, qui se contentoit de les veoir, l'honorer, sans demander leur sang? vous sçauiez que cet idole, nommé serpent d'airain, faict & moulé des mains de ces enfans mignons, fut cause que nostre Dieu les feit tomber sous l'esclauage de leurs grands ennemis, & les rēdit serfs par plusieurs fois de ceux desquels ils auoient souuent triomphé, & pouuoient mesme lors les vaincre facilement. Et toutefois cette cognoissance certaine ne vous fait point naistre en l'ame vne tres-iuste crainte d'estre frappez bien tost des mainstoutespuissantes de l'Eternel pour tirer vn chastiment iustement rigoureux de l'offence qu'avez commise en esleuāt comme images d'honneur des idoles furieux, ausquels vous ne reddez pas seulement l'honneur qui est deuē à la seule diuinité, mais encores versez avec prodigalité insupportable vostre sang pour les rendre propices à vos desseins horribles, & mesme quant & quant & de pareil & mesme coup esgorgez vos ames le chef d'œuvre de nostre Dieu, quiluy a

tant cousté, pour leur servir de victimes
& de subiect pour exercer leur rage.

Au moins si ces idoles, que la licence
trop effrenée de vostre desespoir a tiré du
milieu des enfers pour tenir leur empire
sur nous autres François, se contentoient
de tenir en leur mains vn fer, qui n'eust
puissance que sur les corps, & ne peust
offenser que ce qui est en nous de gros-
sier & terrestre, la faute que l'on commet
en s'entretenant meriteroit bien à la ve-
rité des larmes continues de nos yeux, &
vn regret entier de nos cœurs: mais pour
le moins ne sembleroit elle pas du tout
irremissible, comme elle est bien souuēt
puis que ce fer maudit & infernal creu-
sant des playes dans nos poitrines, per-
ce iusques aux ames, & les naure iusques
à la mort. Car si le fils de Dieu nostre
Rom. 5. Sauueur a dict verité lors qu'il a dict que
tout ainsi que l'homme a fraié le chemin
au peché pour entrer en ce monde par sa
desobeissance, de mesme que le peché
a donné puissance entière à la mort sur
les corps & sur les ames: qui pourra au
preiudice de cet arrest du Ciel tant cele-
bre parmy les Theologiens scolasti-
ques & positifs, croire que l'ame de ces

champions de cruauté & barbarie, ne soit autant feruë que leur corps reçoit de plaies dedâs la lice ou preside leur auengle point d'honneur ? Et qu'autant de fois que ces cheualiers de faux honneur & sorte gloire, sont frappez en leurs entrailles, leurs ames par les playes mesmes, reçoient chez elles par tout des millions de pechez, qui les font precipiter dans le tombeau de la mort, qui les feront trebucher avec violence dans le plus sale repaire des enfers, pour y demeurer eternellement sous l'esclauage de Sathan ? Car si le moindre des pechez mortels a le pouuoir d'entraîner vne ame parmy les gehennes infinies, que fera le plus horrible de tous que fera celui qui tire sa naissance des Duels, qui prend sa vie dans la mort des humains, & tire sa nourriture de leur sang ? Si celui qui querelle son frere est subiect au iugement, celui qui l'offence de paroles aigres, merite le feu eternal, comme nous l'enseigne l'Euangile, quel enfer, quel supplice assez violent peut-on inventer pour celui qui le tue qui l'esgorge de ses mains propres ? Si celui qui est coupable de sa mort trouue vne beaucoup plus dure condition en l'autre mō.

*Diuidus
Augi
lib. 1. de
ciuit. c.*

17. &
21.

de qu'en celuy-cy: celuy qui s'arrache la vie pour se deliurer des miseres presêtes, se precipite sans doute dâs d'autres perpetuelles: celuy qui met fin à sa vie pour s'ampescher de tomber en quelque actiô deshonneste, est d'autant plus punissable qu'il estoit innocent en cette cause, qui la esmeu à ietter ses mains violentes sur luy mesme, ainsi que nous l'apprend saint Augustin, hélas mon Dieu! que deuiendra celuy qui, se sacrifie à vn idole infame, & repend le plus pur de son sang à ses pieds sans subiet, sinon fantasque & malicieusement imaginee? Quelles peines, quels feux, quels tourmens sont preparez à ceux, qui ont meurtri leur chair, cassé leurs os, brisé leurs testes rompu leurs membres contre le scandaleux & prodigieux image des Duels tâchant de se venger eux mesmes de leurs freres François, desquels ils s'imaginoiêt auoir receu quelque sorte d'offense? mais ie veux dire d'auantage, si celuy qui parle outre la modestie, & faict quelque sorte d'iniure aux princes terrestres & temporels, merite vn chastiment rigoureux, les enfers pouront ils bien fournir des tortures, des gehennes, des rigueurs assez

fez cruelles pour ceux ; qui tournent
 leurs armes contre celuy, sans lequel ils
 ne peuvent demeurer en leurs estre par
 l'espace d'un seul petit moment ? Pour
 ceux, qui descendent sur l'arene avec leur
 Dieu & createur, qui se presentent ef-
 frontez & furieux les armes au poing
 devant sa face, & percent aussi souuent
 son sacré sein, qu'ils trament leurs ef-
 pees dans le sang humain, & assassinent
 d'hommes ? puis qu'il est bien certain
 que celuy la, qui s'adresse aux parties &
 les blesse frappe tout ensemble dange-
 reusément le corps ; & que l'Apostre saint
 Paul dit que les hommes sont les mem-
 bres de nostre Dieu, voire mesme le
 corps pretieux de Iesus-Christ. He donc
 François, qu'elles sont vos pensees en
 adorant ces idoles inhumains, qui vous
 donnent du fer d'agereux pour les corps
 & pour les ames ? qu'en faictes vous de
 ce fer infernal, que tenez en vos mains ?
 vous en tuez les hommes, les François
 cōme vous ; vous en blessez avec cruau-
 té vostre Dieu celuy duquel vous te-
 nez vostre estre, vostre vie, vostre force :
 vous amployez les graces, les bienfaicts
 les liberalitez grandes, & mesme son

1. Cor.

12.

D

concours contre luy mesme, vous l'attaquez, vous le frappez des armes, qu'il vous a données. He miserables ! vous tuez le fils de l'Eternel, vous gastez son œuvre, pour lequel il a fait tant desfeys de sa puissance, vous brisez son chef d'œuvre admirable, & fait avec tant d'artifices de ses diuines mains, vous effacez le beau portraict, que la diuine essence a tité de sa main pour estre son image. François ! mais mechants, mais maudits François, satallites du diable, pensionnaires de Sathan, croiez vous qu'il y ait vn Dieu, vn createur de l'vniuers, qui du plus haut des Cieux regarde les choses qui se passent icy bas ? qui cognoist tous les plis & replis de vos ames, qui sçait iusques aux moindres & plus cachees de vos pensees, & veoit le bout de vos desirs ? qui a ses yeux sans cesse fichez sur vous & considere sagement tous vos pas & actions avec poids & mesure ? Non il ne se peut pas car autrement si vous y pensiez vne seule fois pendant le cours de vostre vie vous redouteriez les iugemens qu'il exercera sur vos ames avec tant de rigueur, & laisseriez cheoir de vos mains meurtrieres

Job. 34.

vos trop funestes armés sur le champ du combat, mesme en présence & à la veüe de vos plus grands ennemis au moindre souuenir de la vengeance horrible, qu'il prendra de vos sacrileges & assassins. Vous auriez peur d'arracher encores vn coup de sa tressaincte bouche, ce que la malice du premier siecle luy fait dire, i'ay regret maintenant d'auoir crée les hommes, ils se sont plongez dās le vice, & toutes choses sont corrompues, mais ie les chastiray bien-tost en les perdant entierement avec mon deluge vniuersel. Vous ne respndriez le sang, qui luy a tant cousté, qu'il a racheté si chèrement, qu'il a aymé avec tant d'excès d'amour, que de quitter son ancien throne glorieux, & descendre iusques dessus la terre, pour le faire monter avec honneur au plus haut lieu de tous les Cieux: qu'il s'est fait esclau des miseres de ce monde, pour l'affranchir de celles des enfers & le rēdre libre possesseur de ses diuines graces: qu'il s'est abaissé iusques au dernier degré de l'humilité, pour le faire paruenir au plus haut comblé de la vraye gloire: qu'il s'est fait le plus pauvre de tous ses peuples,

Gen. 6.

pour le rendre participant du Royaume celeste : qu'il s'est chargé du lourd fardeau de nostre humanité pour le soulagger & luy communiquer la douceur de sa diuinité: qu'il s'est ietté dās les fers de la seruitude de la mort & s'est fait son vassal & tributaire, luy qui estoit son souverain seigneur, pour luy briser les chaines, dōt elle l'auoit rudement garroté, & le faire iouir de la vie iusques à l'infini. Quoy qu'il en soit, vous ne pouuez vous exempter de grands blasphemes ; car si vous pensez qu'il n'y ait point de Dieu, hélas ! quel blasphème, iamais cette maudite opinion n'entra dans l'esprit des plus barbares, il ne s'est iamais recontré peuple si peu sensible aux miracles du monde, qu'il n'ait recogneu quelque souveraine puissance bien que souuent il s'en soit forgé à sa poste & sans raison. Si vous en aduouez vn; mon Dieu quel sacrilege, les Philosophes & Theologiens tiennent tous d'une voix, que tout ce qui dict de soy quelque perfection se retrouve en nostre Dieu, & vous luy voulez denier la iustice, la plus belle partie de son estre, sans laquelle il ne peut pas estre Dieu, pour la grande repugnance qu'il y a que

quelque chose soit sans toute son effance. Que si d'avanture vous reconnoissez vn Dieu iuste vëgeur des iniquitez; Ovanité des vanitez, vous pësez qu'entretant de nations vous serez exempts des verges de ce iuste iuge, qu'il alongera son bras puissant de son throne sacré iusques en terre pour chastier tout le reste du monde, & que pour vous il retirera, & fermera sa main, & retiendra son foudre pour qu'il ne tóbé sur vos testes pour punir vostre peché le plus sale, le plus enorme, le plus odieux deuât la diuine maiesté de to^o ceux qu'on peut s'imaginer.

Ouy ie dis que c'est le plus grand peché que les hommes ensemble scauroiët commettre que de tirer des coups mutuellement mortels dans le champ de ces sales idoles : car quel plus espouuantable, quel plus horrible & detestable que celuy des Duels, qui est contraire à la nature , opposé directement au droit des gens & lois humaines , & rebelle du tout aux saintes & sacrees lois de nostre Dieu? N'est il pas assez, & plus tost trop contraire à la nature , en ce qu'icelle ayant longuement trauaillé pour la generation de quelques corps

humains, à employer les formes tant substantielles qu'accidentelles, & les appliquer selon les dispositiōs presentes de la matiere, a disposer les mēbres chacun selon son rāg, a establir l'estomach pour digerer les viādes, les boyaux pour les recevoir & les purger, le foye pour faire & mesnager le sang, le cœur pour nourrir les esprits de la vie, le cerueau pour nourrir les esprits animaux, & les veines pour despartir le sang par tous les membres: à mettre toutes choses avec vn tel ordre & si belle proportion selon leurs charges & fonctions que les bras les pieds, le chef ne peuuent iustement se plaindre de ne recevoir du foye sage Echonome de nostre vie, ce qui leur est necessaire pour leur aliment ordinaire, encores qu'ils soient plus esloignez de luy que beaucoup d'autres par celles de nos corps. Et puis outre tout cela qu'elle a ainsi que le bon peintre, qui ne se contente pas de tirer les plus gros traits & premiers lineamens sur son tableau, mais encores adioustans les derniers artifices de ses mains, applique les hautes & plus viues couleurs, apres, dis-ie, qu'elle a donné les beaux traits de visage, les ornemēs

que l'on requiert pour la perfection d'un corps: En fin qu'ayant receu du Ciel des ames nouuellement tirées avec vn grand miracle de la puissance diuine de ce lieu ou l'on ne trouue que priuation perpetuelle, du neant, elle les a coniointes estreittement avec ces corps fruiets de son labour, pour en faire des hommes parfaits en leur nature pour estre qualifiez de deux belles & nobles puissances la raison, & la volonté: l'une tenant lieu de flambeau plein de lumiere, de guide clairuoiant pour les conduire & esclairer en toutes leurs actions & leurs faire descouurir les bonnes d'avec les deshonestes, & l'autre leur seruant d'instrument ou de ministre pour les exercer ou quitter. Deux puissances qui les rendent capables de cognoistre les diuers mouuemens des Cieux, les plus cachées & secretes influances des astres, d'apprendre les rares qualitez des elements, de sçauoir la nature des pierres precieuses, des animaux, des plantes & des herbes, de se cognoistre eux memes abregez de tout le monde, & œuvres de la diuinité, de sçauoir leurs inclinations, leurs qualitez, leurs puissances tant cel-

les qui despendent purement des sens charnels, que celles que possèdent nos ames & procedent de la raison : & mesme de penetrer iusques dedans les plus secrets conseils de la sapience infinie , & descouurir beaucoup de ses plus hautes pensees. Cette pauvre nature bonne & charitable mere de tous apres tant de trauail, se veoit incontinent violentée, & contraincte veille ou non, de quitter ces hommes, ces fils , mais ces chairs fils, pour lesquels elle a tant sué, elle a tant monstré de feux d'amour, & fait tant de coups d'aissay de son pouuoir : de les quitter à cet horrible, à cet espouuantable, & tant difforme mōstre des Duels, qui les arrache d'entre ses bras pour en faire ses victimes, qui la contraint cette pauvre mere affligée & pressée de douleur d'assister au scandaleux conuoy de ses enfans, sans qu'il luy demeure lieu ny subiect de consolation.

Encores si ce maudit & hideux monstre laissoit moyen à l'vn de ses meilleurs amis & plus proches parens de la consoler cette pauvre desolée & languissante, si son frere bien aymé, le Droit des gens, venoit à elle pour luy dire avec

douceur & amitié, patience bonne mere, cessez vos cris & vos larmes, croiez moy, j'ay interest en cette affaire, & pousserois autant de regrets que vous si ces hommes vos enfans estoient morts autrement qu'ils ne sont. Ils sont morts ie l'auouë, mais contraincts à ce faire par vne louable & sainte necessité, qui n'a rien eu de temeraire, poussez par la force de leur deuoir, qui ne peut rien commander que d'honneste & tout permis, & conduits au tombeau par l'honneur qui monstre sans cesse puissamment son pouuoir sur les ames vraiment genereuses & qui les rendra immortels & les fera cognoistre en la terre & aux Cieux. Ils sont morts, il est vray, mais leur mort est tellement conforme à la raison & à l'honnesteté, qu'elle leur seruira de commencement d'une autre vie plus releuée & non perissable, d'une vie qui les fera estre tousiours presés par tous les coings de la terre, & dedans tous les lieux, ou la bonne renommée se peut fourer. Car ils sont morts pour l'honneur de leur patrie, pour la cōseruation de leur estat, pour deffendre la couronne de leur Roy pour affermir son throne, pour estendre sa gloire, assister ses amis, estonner ses

ennemis, pour rendre cette Monarchie redoutable à ses voisins & honorée de tout le monde pour produire des hommes, qui ne font estat de leur vie & de la mort qu'en temps qu'elle est vtile à leur patrie, pour la manutention de la police, le soustien de la iustice, pour obseruer les bonnes loys, pour entretenir la paix & concorde vniuerselle. Mais il n'a garde, ce sage droit des gens, de venir proferer de tels mensonges à cette pauvre escheuelee, qui meurt dedans ses larmes sans pouuoir noyer nulle de ses douleurs: il n'a garde de consoler cette mere nature, luy qui n'est pas moins affligé qu'elle, luy qui est plongé comme au milieu d'une grande mer de desespoir pour la mort de ces hommes qui ont rendu leurs ames en combatans contre luy mesme, en le violens luy mesme le droit des gens. Et qui ne sçait que le droit des gens a esté rudement frappé, & blessé cruellement par vn million de playes à la mort de ces hommes? qui est-ce qui ne sçait pas qu'il a esté attaqué, percé de toutes pers en ce combat furieux d'homme à homme. Car premierement il a grand interest que tous les hommes vivent pour le maintenir, & faire subsister

par tous les lieux de la terre habitable, & ceux icy sont morts, & tellement morts & enseuelis dans la sepulchre de l'oubly, qu'il n'en sera parlé que lors que les gēs de bien detesteront vn faict si execrable, & que les Anges & sainctes ames en cri-ront vengeance deuant la iustice eter-nelle. Outre cela qui est celuy qui peut ignorer que ces hōmes mal-heureux en profanans leur vie dans le hazard des Duels, ont terni le lustre de leur patrie, & effacé sa memoire, pour laquelle ac-querir nos sayeuls ont tant sué de fois? Qui doute qu'autant de fois qu'il se dō-ne des coups mortels dans le champ de se tyran superbe, l'estat de la France ne soit aussi blessé & rudement esbranlé & que nul n'y est frappé que la couron-ne de nos Roys ne reçoie autant de playes dangereuses pour son affoiblisse-ment? Et Dieu sçait comme nostre Roy seroit maintenant inuincible, son throne imprenable, & vainqueur de toutes les puissances de la terre, si tant de milliōs de gentils hommes, sur lesquels le sort infame & mal-heureux des Duels est tō-bé: estoient à cette heure aupres de sa personne affectionnez au seruice de sa Maiesté.

Qui seroit celuy-là , qui pourroit ignorer quel'exercice de ces damnables, Duels est cause d'engendrer parmy les nations voisines & plus esloignées vn mespris grand de nos courages , quand ils considerent qu'ils sont si foibles & si amolis qu'au lieu de se garder pour vn iuste & bon subiect , & au premier commandement de leur Monarque , ils se laissent emporter à la violence que produict en leurs ames vn tour d'œil vn peu rude , vn coude poussé par l'autre sans y songer , vn mot vn peu plus haut qu'un autre , vn peu de fauce gloire , des fantaisies & chimeres en l'air. Et quand l'on auri bien considéré & espluché de pres l'on verra appertement que le droit des gens est cruellement traicté par les Duels , qu'il est du tout violé par ce monstre espouventable , puisque l'on cognoistra facilement qu'outre ce que nous auons à cy dessus dict : il n'y a rien de plus dangereux contre la police d'un Royaume que les Duels : ceux icy nourrissans le desordre , & abusans de tous en faueur d'un mesme sacrilege : celle-là commandant le bon ordre , & employant chacun selon son merite & qua-

lité. Rien de plus contraire à la iustice puis qu'elle est establie de Dieu mesme & par les hōmes, pour rendre à vn chacun les choses, qui luy appartiennent, disent les iurisconsultes: & que c'est vne habitude par laquelle les hommes sont portez a rendre leurs actions du tout conformes à la raison selon les Philosophes, & que ceux-cy sont inuentez pour faire tort à nostre Dieu, à la Nature, & à tous hommes en rendans leurs actions celles mesmes, qui auparauant se trouuoient bonnes & loüables: damnables, & reprouuees de Dieu. Rien de plus pernicieux à la paix & concorde des familles, des villes, des prouinces, des Royaumes, & des Empires, à la paix du Ciel, gages asseurez de l'amour de nostre Dieu le sceau de ses faueurs passees, & à la promesses de celles à auenir; à la paix fille biē aymée de Iesus-Christ qu'il a si souuent recondamnee aux peuples de la terre, lors qu'obeissant à son pere eternal, il accomplissoit icy bas ses decrets si remplis de merueilles, & mesme au temps de son despart glorieux & triumpant. A la paix, celle qui prenst tāt de peine à vnir les cœurs des mortels, &

fomenter entre eux vn amour fonderment de toute felicité, que ces Duels infernaux ou sont peris ces hommes, ces enfans de la nature, ces pilliers, mais meschans & sans force, qui deuroient soustenir le droict des gens : que ces Duels excremens des enfers, auortons de sathan, instrumens de tous les demōs ennemis du genre humain, qui ne seruēt qu'à allumer des feux de dissention dās les maisons, qu'a ietter des pommes de discorde dans les citez, qu'a rompre les plus estroites amitez, qu'à fourer la haine mutuellement mortelle dans les cœurs, & ainsi troubler le repos particulier & vniuersel. De sorte que cette miserable & dolēte nature, hélas combien ie la plains! demeurera baignante de dās ses larmes, sans qu'on puisse chasser cette amertume de son cœur, sans que le Droit des gens son bien proche parent la puisse souslager & tarir la source, qui coule de ses yeux par quelque consolation sur la mort de ses fils Car il est feru de mesme fer, il a receu des playes au mesme endroit qu'elle autāt affligé l'un que l'autre. & tous deux contraincts de gemir soubs vn grand mons d'ennuy &

de tristesse, sans pouuoir attendre soulagement aucun en leur mal-heur, qu'en temps que leur cœur poussera souspirs sur souspirs; sans esperer la fin de leurs angoisses, que lors que leur cerueau ne pourra plus produire aucunes larmes.

Car de quelle part pouroient ils ietter leurs yeux & leurs pensées pour en attendre guarison? regarderont ils vers l'Auguste droit diuin? imploreront ils son secours pour receuoir de luy quelque Anthidote contre le venim, qui brusle & consomme leur cœur? Attendront ils des troupes d'Anges & ames bien heureuses, qui leur viennent dire; Sus, c'est assez ploré, c'est trop regretté vne perte, vne mort, qui est arriuee selon la volonté de nostre Dieu. C'est vne resolution qui doit estre bien auant enracinée dedans vos volontez dès que vous auez la moindre cognoissance de vous mesme, que d'estre tousiours prests à recouoir les saintes volontez du tout puissant, & principalement quād il y va de vostre mort & de celle de vos parës & bons amis. Car c'est ce que l'hōme a de plus assuré en ce monde, c'est vn heritage que la pluie, le vent, le foudre,

& la tempeste ne luy peuuent raurir: c'est vn patrimoine bien clair, & pour lequel auoir, ou deffendre, il n'est besoing de plaider, s'opposer, appeller; toutes les actions que l'on pourroit intenter pour en oster la possession, seroient bien tost biffées, déclarées nulles, & condamnées par le Iuge Souuerain. C'est vn bien que le premier homme, pere de tous les autres, a trop bien acquis au pris de sa vie, de ses biens, de son bon heur, de sa felicité, des graces cœlestes, que Dieu luy auoit eslargi avec tant de liberalité. & abondance, des perfections, dont son createur l'auoit comblé sans que l'industrie humaine y peust rien adiouster, sans que l'homme mesme peust estendre ses desirs & ses pensees à de plus grandes. C'est vn bien permanent & sur lequel toutes les iniures du feu, de l'air, de l'eau de la terre & du temps ne sçauroient mettre la dent, & le diminuer tant soit peu: il ne peut perir, ny estre changé, encores que toutes autres choses puisse se corrompre, que la seuerité d'un beau iour se change en brouillards & nues espais, vn air doux & paisible en la force & impetuosité des vents, le calme &

bonace

bonace de la mer en furie & tempeste. Que la fortune heureuse vous rie à gorge desployee, ou la contraire vous grince les dents & se mocque de vous, que les richesses & thresors vous esleuent au sommet del'honneur mondain, ou s'esloignans de vous, vous rende les plus vils & moindres des citez, la mort vous est tousiours certaine, le tombeau vous attend tousiours prest de vous prendre chez luy & ne se rencõtre creature de Dieu, qui porte enuie au sepulchre de son voisin, nul ne luy voudroit raur, au contraire volontiers s'il pouuoit, il luy feroit avec grande liberalité present du sien. Que voulez vous donc dauantage plorer? la mort de ces hommes ne peut à la verité qu'elle n'apporte du ressentiment aux cœurs les plus durs & diamẽtins; mais neantmoins leurs derniers iours, le dernier instant de leur vie doit apporter à vos ames vne tres-belle resiouissance & grande consolation. Car ils sont morts comme de bons Chresttiens ramplis de charité, eschauffez du feu de l'amour de leur Dieu, en le remerciant des graces qu'ils ont receu de luy sans aucune apparence du moindre des me-

rites en le suppliant avec profonde humilité de destourner sa face de dessus leurs pechez & d'effacer de sa misericorde leurs iniquitez: comment diroient ils cela ces saints Anges & belles ames sçachât biẽ qu'ils sont morts en se battãs en Duel, en renians, blasphemans le sacré nom de Dieu, detestans ses puissances, & se mocquans de ses misericordes. Ils sont morts, mais sans haine contre leur prochain, sans rancune contre leurs freres, n'ayã rien eu en ce monde de plus chair que d'augmenter sans cesse leur amour enuers eux, que d'obeir aux preceptes de l'Eternel, disant: si tu vas faire offrande sur les autels, & en chemin il te souvient de quelque different entre ton propre frere & toy-mesme. Iette la ton present, & n'aproche pas de moy que ne sois reconcilié avec luy: tant s'en faut car ils sont morts transportez de haine, & bouffis de fureur contre leurs freres des François comme ils sont, & n'ont perdu la vie que pource qu'ils n'ont peu leur arracher la leur dedans le champ ou les Duels les ont trainez. Ils sont morts ie le veux, mais ç'a esté suivant les sages conseils de nostre Dieu, qui tasche de

persuader à tous les hommes d'endurer
 patiamment les iniures les vns des au- *Mat. 5*
 tres auertissans que si par hazard ils re-
 çoiuēt vn coup dedās le visage, ils tour-
 nent incontinent la face, & s'apprestēt
 d'en receuoir autant sur l'autre iouē,
 rien moins que cela, car ils sont morts
 voulans sacrifier à leur idole infame ce-
 luy duquel ils ont ouy vn, non, moins
 gracieux qu'autrefois, vn mot vn peu
 plus haut qu'vn autre, & descouuert vn
 regard vn peu rude. Ils sont morts
 mais ayant religieusement gardé le
 sainct commandement de la diuine Ma-
 iesté, lequel deffend expressement aux
 hommes de permettre aux desirs de
 vengeance de prendre place dedans
 leurs cœurs, comme chose qui n'appar-
 tient qu'à luy seul, & qui s'est reseruée
 en disant dans le liure de ses diuins ora-
 cles, laissez moy les vengeance & ie
 les prendray de telle sorte que vous en
 receurez du contentement: rien moins
 car ils ont esté tuez en se voulans ven-
 ger des iniures meismes qu'ils n'auoient
 point receues Ils se sont malicieusemēt
 imaginé estre offencez pour se battre
 en Duel contre vn homme comme eux

& ainsi assouvir leur appetit desfrégé de vengeance. Ils sont morts ces hommes, mais avec l'honneur de se pouuoir iustement venter, ainsi que Pericles, au dernier periode de leur vie de n'auoir iamais esté cause de faire porter le dueil à personne, & de n'auoir iamais souillé leurs mains dedans le sang humain, suivant la loy de Dieu, tu ne turas personne: tant s'en faut les voyla encores gisans sur terre couuerts du sang de leurs freres, ils tiennent dans leurs mains des glaiues dangereux pour les corps & pour les ames, du fer forgé dans la boutique de Sathan, rougi du sang qu'ils ont tiré avec furie & cruauté des corps de leurs parens. Ils sont morts, mais pardonnans à leurs plus grands ennemis, & inuocans la misericorde de nostre Dieu pour effacer leurs fautes, à l'imitation du Sauueur & redempteur des hommes: cela n'est point, car ils ont faict monstrier mesme leur amy sur l'autel de l'idole des duels pour l'y sacrifier & tacher leurs ames de l'atroce meschanceté d'un infame sacrifice. Ils sont morts encores vne fois, mais vous scauez bien que ç'a esté gardans soigneu-

sement la sacree loy de nostre dieu, la- *ad heb.*
 quelle dict ainsi, obeissez à ceux que i'ay ¹³
 nommez des Cieux pour vous gouver-
 ner dessus la terre, pour vous commen-
 der, pour estre vos Roys, sur peine de
 bleffervos consciences, d'encourir mon
 ire & d'attirer dessus vos testes mon fou-
 dre pour vous punir: Tant s'en faut, car
 au preiudice de tant de si solempnels E-
 dictz, de si grandes menaces, de si rigou-
 reux chastimens que nos Roys (mais
 principalement la grande ame de nostre
 grand Henry, ce beau flambeau, cette
 grande lumiere, maintenant esteinte à
 nos yeux, mais claire & brillante en l'au-
 tre monde, lors qu'il luisoit au milieu de
 nous) que nos Roys dis-ie ont proposez
 & establis pour arracher du cœur de leurs
 subiects la furieuse passion des'entretuer
 les vns les autres, qui rend honteuse la
 nature, & fait coupable nostre France
 d'une ferocité & barbarie, que les plus
 farouches, & cruels animaux de mesme
 espee ne scauent point: Ils ont dis-ie au
 preiudice de tels Edictz enuoyé le char-
 tel de deffi, ils ont assigné le champ du
 combat, ils s'y sont trouvez avec des ar-
 mes, qui enferrent ensemble & de mes-

mecoup les corps & les ames, il sont montez sur le Theatre des Duels pour y representer vne Tragœdie sanglante & bien horrible, & souiller leurs meurtriers mains d'un homicide, qui rougira long-temps sur le front de la nature, & de nostre Monarchie.

Et bien donc apres de tels discours ne m'aduourez vous pas qu'ils seroient bien abusez ces pauvres l'armoyans, ces attristez, & outrez de douleur, d'esperer quelque petit mot de consolation de la bouche du droit diuin & d'attredre de luy vn remede à leurs cris, puis qu'il pleure bien plus amèrement qu'eux deux ensemble, & se pleins rampli de beaucoup de tristesse pour se sentir blessé de toutes parts, pour estre deschi-
ré de tous costez & n'auoir partie entiere, pour estre violé & mesprisé entiere-
ment par la mort de ces hommes esgorgez selon les maudites loys d'un faux point d'honneur aux pieds du prodigieux & scandaleux Idole des Duels ?
Helas ! le cherche & recherche de toutes pars les moyens de consoler cette pauvre Nature bonne mere commune offensée, affligée, & blessée par la mort

de ses fils assassinez dans la fatale destinée des Duels : ie cherche dedans les loix tant diuines qu'humaines quelque soulagement, à sa douleur, et ne puis rencontrer par tout que subiets de tristesse. Car si cette mere Nature est rudement offensee par les coups mortels que ces hommes ses enfans ont receu entre ses bras et sur son sein, les mesmes coups ont nauré le droit des gens & loix humaines, en le foulans aux pieds et le mesprisans; les mesmes coups ont violé le Droit diuin & loix de Dieu, de sorte que tous ces trois se plaignent grandement, se déuillent avec passion, et deplorent amèrement leurs miseres presentes: la Nature dresse sa voix plaintiue au droit des gens, le droit des gens aux loix Diuines, les loix Diuines vers le Ciel, et tous ensemble poussent des soursirs en grand nombre, versent des larmes en abundance, et font sortir de leurs bouches vne clameur bien pitoiable, et digne de compassion. Voila les pernicieux effects de ces Idoles mignons de nos françois, qui ne scauent qu'ofencer la Nature, blesser les loix humaines & violer les diuines; effects

qui peuuër bien faire cognoistre à ceux qui s'arrestent tant soit peu à la contéplation des dommages qu'ils apportēt à toutes bonnes loix, que c'est chose tres-execrable & maudite deuant la magesté supreme que les Duels, puisque les causes sont tousiours telles que leurs effects, & qu'il est impossible que leurs effects soient produicts dissemblable en essence à leur principe. Effects trop suffisants de nous aprendre combien nostre Dieu deteste leur cause, cōme il chastira seuerement ceux, qui honorent les Duels, qui les maintiennent & qui les exercent : & qu'il scaura bien, lors qu'il sera temps iuuentuer autant de rigoureux supplices pour les punir comme il auront tiré de gouttes de sang des hommes par ces glaiues funestes en presence de satan desguisé sous le masque des Duels.

Mais ie reuiens à nos pauvres affligez & bien donc vous, ô mere du monde, pleurez en abundance, leuez les bondes de vos yeux, & faictes autour de vous vn grand Ocean de larmes : pleurez de mesme vous l'ornement des estats & le nerf principal de tous Royaumes.

plorez encores vous, ô richesses des belles ames, & secours de toute pieté. Plorez dis-je nature, le subiect le requiert, le cas est digne de vos larmes puisque vous avez ainssi avec malheur perdu vos enfans bien-aymez; dans les Duels : plores le droit des gens, car ces hommes vos peres & fondateurs sont morts miserablement aux pieds de leur Idole : plorez loys saintes & droit diuin puisque vous avez perdu vne partie du genre humain, puis que vous avez esté moqués & violez entierement par la mort de ces hommes assassinez en l'honneur de sathan; & tous ensemble redoublez vos pleurs, vos cris & vos gemissements pour le grand nombre & presque infini de ceux que vous verrez par cy après perir deuant vos yeux. Et vous substances espurees, vous Anges de Dieu choisis au Ciel, & enuoyez cy bas en terre pour auoir charge sur les ames de ce monde & les conduire & conseiller pendant leur vie; vous qui avez tant trauaillé pour retirer ces hommes du peché par vos sages remonstres pour leur faire hayr l'iniquité par tant de bons conseils : pour leur faire

aymer parfaitement leur Dieu par vos saintes inspirations, plorez encores vos peines, vos conseils sont perduz, vos hommes, leurs ames sont périés, dans le malheur des Duels. Vous belles ames brillâtes deuant la face de l'Eternel, comme claires Estoiles & Astres lumineux autour de leur Soleil, qui auez tant de fois au milieu & au plus fort de vostre ioye celeste, comme oublié vostre felicité pour implorer la bonté infinie en faueur de nos frâçois. & par l'offrêde de vos prieres auez acquis tant de grace pour eux; plorez, car aujourd'huy ils ne font cas des dons du Ciel, ils serient & abusent des saintes liberalitez de nostre Dieu, ils ne pèsent qu'aux combats d'homme à homme, ils meurent tous dans le camp des Duels, & se donnent eux mesmé a deuorer à leur vilain monstre alteré de leur sang. Maisons Royalles, Illustres familles, nobles, & anciennes lignees plorez de vous voir ainsi ramplies de plus de pommes de discorde que iamais le iardin Atlantide n'en produisit de pur or; de vous voir souilliez de meurtres & de querelles, de voir le plus pur de vo-

stre sang s'escouler & se perdre par ce maudit canal des Duels. Que tout plore, & que rien ne se defende des larmes, puisqu'elles sont si iustes en ce subiect; que le Ciel plore, que le Soleil retire ses rayons & cache sa face dedans des nuees noires & sombres; que l'air se rende obscur, que les vents & la tempeste troublent les eaux, que la terre tremble & se tourmente de regret, que la France ne soit qu'une maison d'angoisse & de gemissemens. Et bref puisqu'il n'y a rien, soit au Ciel, soit en terre, soit en la profondeur des mers. qui n'ayt interests à la mort de ces hommes esgorgez par la rigueur des Duels, que toutes choses plorent & accourent vestus de noir & de deuil, la larme à l'oeil, les souspirs à la bouche, & les sanglots au cœur pour servir de pompe funebre à ce convoi, qui iette non seulement les corps dedans les entrailles de la terre, mais aussi precipite les ames iusques au plus profond, & plus sombre lieu des enfers.

Car hélas ! ô ressentiment nouveau de mon ame affligée, que peuvent attendre autre chose ces ames qui ont

noye leur vie dedans les ondes de leur sang sur la place assignée par vn chartel, que d'estre reprouuez de la diuine magesté? sinon vn iugement à leur dommage, vne gehenne eternelle? puisqu'il est bien cerraïn que Dieu est iuste vengeur des iniquitez, & qu'il sçait & peut fort bien punir les faicts meschâts par des peines griesues; puisqu'il recompense à propos & en saison la longueur du temps de sa patience, par vne grauité poignante des supplices. Que pourroient elles esperer ces victimes des Duels & de Sathan, ces ames percées à coups de fer, lesquelles sont sorties de leurs corps sans considerer leurs fautes, sans toucher leurs poitrines, & regretter d'auoir tant offensé leur Dieu, sans ietter leurs yeux sur ses misericordes, sans implorer remission de leurs pechez. Ces ames malheureuses & meschâtes & qui sôt parties de cemôde au cōtraire de cela les homicides en la volonté, les blasphemés à la bouche, les renimens dessus les leurs, la haine au cœur, la vengeance en la poitrine, le fer aux mains, le sang iniquement respendu dessus les pieds, &

rien en la memoire, rien aux pensées, que les Duels : Ces ames qui ont quitté la terre atteintes & conuaincues du peché contre le sainct Esprit, irremissible pour estre selon le tres-docte Sainct Augustin & plusieurs autres Theologiens vne opignastre volonté de croupir en vn peché iusques au dernier point de la vie, qu'attendront elles dy-je sinon lvn Enfer bien chaud, des tourmens qui dureront autant qu'elles porteront quand & soy la coulpe de leurs offences qui veut dire à toute eternité? Car si les Iuges & magistrats terrestres, qui ont leur iurisdiction sur toutes les choses, qui sont participantes de la terre iettent les corps de tels desesperez & infames caualiers honteusement parmy les plus infectes & infames charongnes, leurs denians mesme la sepulture : ou penserions nous que Dieu le iuge souuerain des esprits, precipitat leurs ames sinon au milieu de celle la qu'il tiēt estroittement renfermees dans les feux infernaux pour n'auoir assez exactement executé ses sacrez cōmādemens & S^{tes} ordōnances si l'espouse, nostre mere l'Eglise, dedans ses diuins Conciles frappe dange-

reusement des foudres de son Anathème, ou excommunications, tous ceux-la qui assistent pour estre spectateurs des Duels: comment est-ce que l'espoux, nostre Sauueur, punira ceux qui y sont tuez? Certainement quand ie dyscecy, il faut que ie confesse iugement que tout le corps me tramble que ie n'ay goutte de sang dedans mes veines, qui ne change mille fois de sa place, tant ie crains le desastre, qui menace la France & les grandes calamitez, qui sont toutes eminentes sur le chef de nos François. Tant i'apprehende de voir arriuer deuant moy ce que nostre Dieu a predit dés long-temps par la bouche de son Prophete Osee, quand il a dit avec verité; les homicides se sont desbordez & ont fait comme vn grand deluge de sang humain, le sang est chut parmy le sang, & s'est augmenté dessus la terre & partât la terre gemira, elle se pleindra hautement & souffrira beaucoup, les hommes & habitans d'icelle seront frappez de ma iustice, ils seront affoiblis, & reduits comme à Neant. Neantmoins au plus fort de ma crainte, ie suis contraint d'aduouër franchement

Osee. 4

que quand tout cela arriuera , ils ne souffriront que par le iuste iugement de Dieu : & selon leurs demerites ou plustost i'aduouë que quand toutes les peines qu'on pouroit s'imaginer rōberoient toutes èsèble sur leurs testes pour les accabler , encores ne seroient-ils punis que legerement , & sans qu'il y eust du raport entre leurs fautes & les supplices. Car si ce que nous auons descript cy deuant est capable de nous persuader & faire croire asseurement que le Duel est vne hydeuse Image , & enorme peché deuant la face pleine de maiesté de nostre Dieu qui merite de rudes & extraordinaires chastimens pour estre composé de la bouë de toutes sortes d'iniquitez : la cause, ou le pretexte sous la faueur duquel il a esté inuenté , & tiré par Sathan du milieu de ses tenebres à assouuir ses maudits appetits de vengeance sur nous autres françois, ce pretexte desnaturé , disie adionste grandement à sa difformité. D'autant que si par hasard ie rencontre vn François courant à toute bride vers le temple des Duels pour y faire vne offrande d'vn de ses compatriotes , ou de luy mesme

& que ie face tant que d'arrester sa course & tafche par douces remonftrances & humbles prieres d'ampescher fon deffein & diminuer fa fureur en luy difant ainfi par amour. Mon Dieu, Monsieur ou allez vous, vous tenez vn chemin bien dangereux, vous allez fans doute vous perdre; les armes font trop iournalieres, les euenemens des combats font bien doureux. Ils donnent fort fouuent la victoire à qui leur plaift, & non à qui la merite : vous penfez aller bleffer vn homme, qui peut-eftre vous oftera la vie, & lors vous receurez vne fatis-faction beaucoup plus dangereufe & offenfiue que n'eft l'iniure pour laquelle vous eftimez eftre offencé. Outie cela fi le fort vous eft de cas fortuit fauorable, & que les armes fe rendent du tout propices à vos defirs, penfez vn peu les peines & & tourmens ou vous tomberez tout à l'heure : vous n'aurez point pluftoft fouillé vos armes & vos mains du fang de cét homme vofre ennemy, vous ne ietterez pluftoft vos yeux fur fon corps gifans fur terre & percé de vos coups, qu'un grand regret brifera vofre cœur

cœur de toutes pars; vous ne pourrez rencontrer lieu ny place, pour forte & munie qu'elle soit, qui vous puisse asseurer, sans cesse rongé du ver de conscience le bourreau de nos ames. Vous aurez remporté vne victoire, mais victoire mal-heureuse, qui vous rendra plus captif, plus vaincu, plus sans ame, & iugement que celuy-mesme, qui aura receu les loys de la mort de vostre espée: vne victoire qui vous fera esclaue de la crainte, la peur dominera vostre ame languissante & demye-morte: vous aurez peur des Atomes de l'aer, les fueilles que les vents feront branler au tour de vous, vous espouuanteront & vous feront pallir: vne victoire bien à craindre, & que vous deuez fuir, au lieu de la chercher au peril de vostre sang & de vostre vie puis qu'elle meritera des grosses larmes de vos yeux, des crys & gemissemens de vostre chere Espouse, de vos enfans, de vos amys. Car vostre femme sera tousiours en doute & soupçon perpetuel que soyez enquelque lieu de seureté ou que soyez descouvert par quelqu'un des amys de celuy-là que vous aurez sacri-

fié aux Demons : & pour ce subiect elle sera sans cesse tourmentée d'extremes afflictions , l'heure mesme de son repos luy fournira de grandes inquietudes & fascheuses agitations d'esprit : les songes & fantaisies , qui occupent souuent nos ames durant la nuit , la rendront pensives , la feront resuer profondement , & tireront de ses yeux des larmes bien ameres. Vos enfans , bien que ieunes & nō encores douez d'un sincere iugement , seront tous confus & desolez aux premieres nouvelles de cette victoire dangereuse pour vous mesme , tout leur discours & petit entretien ne sera que du danger auquel il vous verront estre tombé par le moyen de cette fauce victoire , ils penseront à la rigueur des loys de nos Monarques , au pouuoir & credit de celuy qu'aurez tué , de sa memoire , de ses parens & amys , & toutes ces considerations leur feront descourrir le commencement de leur ruynne totale. Et puis, Monsieur , si ces choses terrestres , mais bien puissantes toutefois sur vn mary , sur vn bon Pere ne sont suffisantes pour esteindre le feu de vostre Passion : Iettez s'il vous plaist

les yeux vers le Ciel, & considerez cō-
 bien il y va de l'interest de Dieu, si vous
 respandez ainssi prodiguement le sang,
 qui luy a tant cousté & qu'il a racheté
 si cherement. Employez vos pensees a
 contempler comme vous estes la vraye
 Image de nostre Dieu represētee au vif;
 comme celuy contre lequel vous allez
 maintenant les armes au poing ne l'est
 pas moins que vous, & que par ce moy-
 en vous ne sçauriez euitier, soit en vo-
 stre personne ou en celle de vostre en-
 nemy, que le portrait de Dieu ne soit
 frappé ne soit percé par vos funestes
 coups; vous ne pouuez vous tuer l'un
 l'autre sans briser quant & quant &
 tout d'un mesme coup l'Image, le nom
 de Dieu, & sans l'offencer luy-mesme
 grandement. Car l'homme n'est pas
 fait & moulé avec moins d'artifice &
 d'inuentions ingenieuses par son tout
 puissant createur, le nom; l'Image de ^{Pla. en}
 nostre Dieu n'est pas appliqué par tou- ^{ses vi-}
 tes ses parties avec moindres subtilitez ^{es.}
 & beaux rapports que fut autrefois. Le
 nō de Phidias le Tarentin a cette œuvre
 de ses mains, ce beau portraict de la
 Deesse Minerue, cette statue admira-

ble, qui a donné matiere, & fourny de subiects a tant de doctes plumes, laquelle on n'eust sceu rompre & desmêbrer sans mettre en pieces le nom de son maistre ouurier, ny semblablement en oster ce nom tant renommé, sans la dissiper & ruiner entierement. Or vous deuez sçauoir que si vous gastez & effacez les Images de nostre Dieu, vous serez aussi tost iustement accusé d'auoir blessé de mesmes coups le prototype, le patron de tels tableaux viuans, le Createur des hommes : ou pour le moins vous serez estimé semblable en cecy aux Princes des tenebres, qui ne sont ennemys iurez & capitaux du genre humain, que parce qu'ils ne peuuent exercer leur haine mortelle & sans mesure contre la diuinité; & qui ne pouuant attaquer & affronter les puissances infinies, se cōtentēt d'assouir leurs desirs de vengeance sur ces tableaux, sur les hommes foibles & imbecilles. Dauantage c'est chose qui doibt auoir assez de puissance pour vous esmouuoir & rendre vostre cœur amoly que de songer que lors que vous auez ainsi cruellement offensé vostre Dieu en

uant cet homme, vous tomberez aussi
tost entre les maius pour estre iugez &
condamnez de luy; imaginez vous
quel iugement, quel arrest vous pou-
ués attendre, puisque l'offensé sera
luy-mesme vostre iuge souuerain &
sans apel en cette cause. Et ne vous a-
busés pas en esperans à sa misericorde,
car si en Dieu toutes les vertus sont es-
gales, comme elles sont, puisque tou-
tes ne sont qu'une seule & mesme essé-
ce; sans doubte il s'ensuit fort bien que
sa iustice sera aussi grande que sa mise-
ricorde, & que tous ainsi que quelque-
fois, & lors que les hommes ont en
leurs ames vn grand regret de leurs
pechez, sa misericorde donne douce-
ment la loy à sa iustice: de mesme sa
iustice tres-exacte & rigoureuse, mai-
strise bien souuent toute sorte de pitié
& compassion au rapport mesme de
l'admirable en doctrine & piété Saint
Augustin. Il me respoudra ce brauache
ce furieux, ce desesperé; il me dira
brusquement, ces raisons sont belles
& bonnes; mais ie vous dis que quand
ie deburois perdre femme & enfans,
biens & amis, quand tous les suppli-

D. Au.
lib. de
fide ad
Petr. ca.
3.

ces, toutes les gehennes qui furent ordonnées exercées par les bourreaux depuis que les Cicux tournent, quand le tau-reau d'airain d'un Phalaris seroit tout prest de m'engloutir pour estre consummé dans son corps à petit feu, quand tous les diables d'enfer seroient presents, & prests d'arracher chascun leur piece de mon corps, quand ils deuroient emporter corps & ame, tripes & boyaux, quand tous les Anges descēdroient du Ciel pour m'empescher eux mesmes de me venger de ~~de~~ celui qui m'a offensé, ie vous proteste par le Dieu vivant que i'en ferois rien. Quoy, que pour la crainte d'affliger ma famille & mes amys, ie laisserois mon honneur engagé dans l'affront d'un desmenty? non, j'en auray la raison. Quoy, moy qui suis dans le monde avecq'une honneste reputation iusques à maintenant, qui suis sans cesse pres du Roy & chez les princes bien venu, ie souffriray une iniure mal à propos? non ie iure qu'il s'en repētera. Quoy, moy qui suis gentil-homme, mais encores gentil-homme françois qui ay l'honneur de porter une

espee à mon costé, i'endureray vn démentir au preiudice de nostre point d'honneur? non, cela ne sera pas, ie ferois tort, non seulement à moy-mesme mais aussi à tant de gentils-hommes d'honneur & qualité auxquels i'appartiens & suis proche parent; Il en mourra, ie luy monstreray que s'il sçait offencer mal à propos & sans raison les hômes d'honneur, ie sçay fort bié en tirer la raison, telle que les Caualliers qui cherissent l'honneur & le courage ont accoustumé de prendre, & si d'adventure i'y suis tué, il n'importe, tousiours faut-il passer vne-fois par la mort.

O Dieu, en quel temps viuons-nous, ô Dieu, quelles sont les mœurs de ^{Plu. en}hommes d'apresent, L'on n'a iamais ^{ses vies}veu qu'ũ Erostrate, qui ayt voulu s'acquérir vne gloire infinie par les cendres de l'admirable temple d'Ephaise, & nous ne pouuons trouuer le bout des homicides françois, qui cherchent sans cesse de l'honneur dans la ruyne ^{Hebr. 4}des hommes, qui sont autant de temples & domiciles de nostre Dieu, L'on n'a iamaistrroué durant ce grand Empire de Rome, qu'vn Antonin qui ayt

de sa main propre frappé mortellement son frere Geta dans le sein de sa mere larmoyante & desolée encores estoit-ce pour iouyr seul de la couronne imperiale : & les François par millions de miliace massacrent leurs freres dans les bras de la France leur mere , & rougissent sa face de leur sang , & ce pour vn peu de faux honneur , pour vn abus tres-malheureux. Les lyons affamez ont autrefois refusé de se souiller du sãg du bon Daniel , voyans dedans sa face tous les traits & ressemblance entiere de nostre Dieu leur createur , le recognoissant son Prophete & bõ amy , & voicy , les François tuent , font couler le sang de ceux qu'ils sçauent estre ses enfans tres-chers & bien-aymez. Le feu creature insensible ne voulut autrefois consumer les trois enfans iettez dans la fornaisie ardente de Babylone , à cause qu'ils aymoient leur Dieu , & estoient receuillis de luy cõme les fauoris : & voicy les peuples de nostre Monarchie percent & deschirent ceux qu'il sçauent bien estre les vrais membres de Iesus-Christ.

O patience diuine , que vous estes en-

durante maintenant, Vous avez autrefois enuoyé vostre deluge, & fait monter les eaux par dessus les plus hautes montagnes de la terre, parce dites vous dans la Genese, que la malice des hommes commençoit des-ja a croistre parmy le monde: vous avez fait deuorer à vostre feu celeste les grandes villes de Sodome & Gomorrhe, d'autant que le peché de luxure y estoit ordinaire: & maintenant vous souffrez, & longuement que tous les plus enormes pechez compilez ensemble & compris sous l'infame nom des Duels, dominant en France avec tyrannie. Vous ne voulez au temps que la consummation de ces grandes citez approchoit exaucer les prieres saintes, agreables à vos yeux par tant d'autres fois, du bon Patriarche Abraham & pardonner à ces villes si remplies de tous peuples, à cause qu'ils ne se trouua dix ames iustes entre tant d'habitans d'icelles: & a cette heure vous pardonnez à nostre France, biẽ qu'il ne se rencontre pas vn françois, qui soit exempt de ce damnable vice: encores que souuent la robe ou qualité empesche que telles meschantes volon-

Gen. 6.

tez produisent leurs effects , & que la crainte de se voir despouillez de leurs offices & estats les tiennent garrotez & les garde de se trouuer sur le champ ou preside l'idole des Duels pour repēdre à ses pies tout leur sãg & leur vie. Vous souffrez parmy nous ce peché que nous deuriõs autāt detester pour estre vn amas de toute iniquitez, que les Babiloniens ont au temps passé louë & hautement magnifié cēt arbre de la Palme, comme celuy qui leur a portoit trois cent soixante diuerses vtilitez. Mais, hélas! comment oseray-ie dresser ainsi ma voix plaintiue vers les Cieux, moy qui ne suis que cendre, ou vn peu de poussiere? Quelle audace a moy chetīue creature d'arraisonner ainsi mon Dieu grãd en puissances & par tout infini? Seigneur pardonnez moy, car vous sçauiez, vous deuant qui rien n'est caché, & qui auez toutes choses presentes, voire mesme celles, qui ne sont point encor: vous sçauiez qu'il n'est pas moins difficile qu'une ame outrée de douleur rende ses plainctes tousiours discrettes & raisonnables, qu'il est mal-aisé que nos cœurs limitent la ioye, qu'ils cõçoient

a la rencontre de plusieurs choses fau-
rables. Pardon mon Dieu, & ne permet-
tez à vostre ire de se tourner vers moy
vostre hūble creature, puisque c'est mon
ame affligée iusques a l'extremité, la-
quelle adresse sa plainte a toutes choses
qui viennent en sa pensée: & c'est le pro-
pre de l'humaine imbecilité de faire per-
dre a nos ames leur trampe, pour forte
qu'elle soit, dans le feu des cuisantes af-
flictions. Pardonnez moy, afin que ie
retourne à la respōce furieuse & brutale
de ce françois desespéré, qui m'a cy de-
uant dit avec vne impudence insupor-
table, qu'il sçauoit bien tirer raison de
ceux, qui l'offensoient, & faire mourir
les hommes, qui osoient luy faire iniu-
re sans subiect, & ce pour conseruer son
honneur & continuer sa bonne reputa-
tion. Helas! quelle vaille de sçauoir
mal faire, quelle puissance de pouuoir
nuire, & d'oser commettre vn massa-
cre en vne chose si digne comme est l'-
hōme? N'est ce pas vn tres-pernicieux
pouuoir, que celuy qui trouble le re-
pos public & particulier, & renuerse
les citez? Il dict, ce brauache,
que ce luy sera toufiours vne douce

Senec.
lib. de
clem.

Senec.
in epist. punition que d'employer sa vie pour
 faire voir à tout le monde qu'il n'est
 point sans courage: mais il se rompt
 grandement car l'homme vertueux &
 plein de vray courage ne veut pas que
 son ame sorte du corps, auquel Dieu la
 pose pour faite exacte sentinele, &
 s'empescher de tomber en la main &
 puissance de son ennemy Sathan, &
 euit ses ruses & artifices malicieux,
 sans congé & mandements expres de
 son chef souuerain, il ne veut point le
 vrayment galent-hôme, fuyr honteu-
 sement de cette vie par vn trou faict
 mal-gré & en despit de la nature, mais
 en sortir avec honneur, aprez le cours
 ordonné de nostre Dieu. Qu'elle pure
 folie, cét insensé, cét entrepris de
 corps, & d'esprit desmentira tant de
 grands Philosophes curieux en la re-
 cherche de la cognoissâce des choses na-
 turelles & au preiudice de leurs raisons
 certaines & infailibles il se forge vne for-
 cede courage mal à propos & cōtre tou-
 te aparence, ils s'imaginent que la grâdeur
 de courage consiste en la violence des-
 mesuree d'une passion, qui ne resente
 que le desespoir, & ce en despit du

Docteur Angelique S. Thomas & du D. Thom.
 grand Aristote qui disent tous d'une sec. 9. 129
 voix que la force de courage est vne act. 23.
 vertu morale; laquelle a de coustume
 de rendre son posesseur meilleur & son
 œuvre grandement louable, & à pour
 son obiect la crainte & l'assurance.
 Mais disent-ils ces grands hommes,
 n'ont pas toute sorte de crainte, ny
 d'assurance, car bien que nous crai-
 gnions toutes sortes de maux, si est-ce
 toutesfois qu'eux tous ne sont pas tou-
 jours l'object de la vertu, de force, de
 courage: parce qu'entre les maux, il
 s'en retrouuēt aucuns, qui sont bien des
 plus fascheux, comme la pauvreté, &
 beaucoup d'autres qui ne sont point
 produits par les vices, & ne nous arri-
 uent nullement par nos fautes: mais
 lesquels neantmoins n'estans point vi-
 cieux, il est autant louable ne les point
 craindre, comme il est honneste &
 bien-seant d'en fuir des autres. Et
 tout ainsi que ce n'est pas toujours vne
 marque de grandeur de courage de
 craindre & fuir beaucoup de maux,
 qui nous arriuent: de même il n'est
 pas a propos ny raisonnable de se tenir

Arist.
lib. 3.
Ethic
cap.

tousiours prest auecques ferme resolution de recepuoir toutes les iniures & miseres qui se pequent sans cesse représenter aux hommes. Car dit le mesme Aristote prince de philosophes, tant s'ë faut que ce fust vn acte de grãd courage qu'au contraire ce seroit vn signe euident de sottise & d'imprudence inexprimable, si celuy qui est trainé par la ville pour estre auec scandale & infamie battu de verges, se tenoit ferme & roide contre son malheur. Sans que tel infamie fust capable d'apporter à son cœur vne grande tristesse, Car ce n'est point en de telles actions ou s'employe la vigueur, la force d'esprit, & vray courage son obiect, la matiere, ne s'estant pas iusques là, elle se contient dans les bornes de l'honesteté, & se contente des choses, qui luy aportent de la gloire & de l'honneur.

Mais bien est-ce vne vraye grandeur de courage de demeurer constant au milieu des plus cuisantes afflictions, qui ne sçauent point tacher nos ames de peché à leur arriüée, de demeurer en mesme estat sans rire d'aise, ou pallir de regret a la rencontre de plusieurs fa-

ueurs de la fortune , ou bien en l'esloignement de tous contuntemens mondains , ainsi que des Socerates , des Heraclites , des Diogenes Cyniques , desquels on n'eut sçeu des couvrir la ioye ou la tristesse , pour auoir tousiours vn visage de mesme , & par tout egal. C'est ^{Plus en ses vies.} force de courage quand cachans dedans le sein vne douleur extreme , qui consume le cœur , & le bourelle rudement l'on demeure froid sans changer sa couleur ordinaire , & qu'il semble veritablement deuorer l'affliction , laquelle arrive lors que les choses les plus fauorables deuiennent contraires , & que l'on est mesme battu des mains desquelles l'on a-tredoit secours. C'est grandeur de courage de souffrir ioyeusement la mort pour le salut de sa patrie , pour la gloire de son Roy , pour la conseruation de son Estat de raconter avec vne constance ses miseres & calamitez , la mort louable de ses amys , de ses parens , de ses enfans sans d'autres larmes que du cœur , a l'exemple de cette tât vertueuse Cornelia fille du grād Scipiō l'Africain & mere des Gracches tant renommez. C'est en cela

D. Tom.
2. sec.
quest.
125. 4. et.
23.

Arles.
lib. 3.
Ethicor.
cap. 6.

que consiste la grandeur de vray' courage, & non pas en l'exercice des Duels qui n'est autre chose qu'une passion furieuse & desesperée, qui rend les hommes sans raison & beaucoup pires que les plus farouches animaux; qui les souille d'une infamie honteuse pour estre par leurs Duels du tout contraires aux volontez de nos Monarques, & bonnes ordonnances de leur iustice: qui les rend odieux à la Nature en se tuans les uns les autres au preiudice ses loix anciennes; qui les gaste & remplit de pechés dangereux pour leurs âmes, en violans par leurs combats les saints cōmandemens de nostre Dieu.

Et par ainsi ils sera suffisamment aisé de recognoistre cōbien tous les françois sont abusés de chercher dās les duels les marques de grādeur de courage car ainsi que nous auōs dict, l'obiet de cette vertu royale est bien la mort, mais c'est celle que l'on attrappe dans les iustes combats, pour la defence de sa patrie, pour maintenir son Roy dedans les droicts que Dieu, la nature, & ses armes luy ont iustement acquises. Ils se trompent les françois, ils n'ont plus

plus de courage, ils pensent embrasser
 Iunon la belle Royme, mais ils ne trou-
 uent qu'une noyre & sombre nuee, ils
 n'ont le cœur grossi que de courroux &
 de fureur, parens bien proches d'auda-
 ce & de temerité. Ils sont semblables *Her. li.*
 aux Atheniens abusez par ce rusé trom-
 peur Pisistrate, qui receurent en leur
 ville d'Athenes avecques solemnité &
 grande resiouissance vne pauvre & sim-
 ple femme nommee Phya, qu'il con-
 duisoit montee sur vn char triomphant
 & reuestue des habtis & ioyaux ordi-
 naires à leur belle Deesse la docte &
 vaillante Minerue, & l'honorèrent de
 clameurs & cantiques de ioye comme
 Minerue mesme. Ils pensent, nos frä-
 çois, que l'idole des Duels que sathan
 malicieux a introduit en leur Royau-
 me soit l'image du vray honneur, qu'il
 soit la iuste recompence des hommes
 vertueux, & la pierre de touche qui es-
 prouue ceux qui sont dotiez de bon
 courage & de generosité: Mais non, ce,
 n'est point le portrait de l'honneur, bié
 qu'il soit paré de ces precieux habits
 represeté avec ces traits & beaux linea-
 mas de coprs & de visage, qui n'est autre

deuise que l'acquisition de gloire, de la
defence du point d'honneur, qu'il tiène
dans sa main vne e spee qui semble estre
semblable à celles avec lesquelles l'on
cherche dās les cōbats permis de Dieu
& des hommes vne victoire glorieuse:
Il est faux cēt Idole, c'est vn diable dé-
guisé, ses preceptes sont pernicioeux, &
ses effects trop contraires à la vertu,
comme le sçauent bien cognoistre les
plus aduisez & moins remplis de passi-
on. Il trompe les françois, cēt idole
maudit, ce Sathan desguisé de les faire
chercher avec le fer rude & funeste de
la gloire & bonne renommee dans les
entrailles de leurs semblables, d'où il
est impossible de tirer autre chose qu'v-
ne mauuaise odeur, laquelle les rendra
odieux par tous les coings de la terre
habitable. Car l'honneur & la gloire ne
peuent recepuoir leur naissance des
faicts enormes & vicieux, ainsi que les
beaux lys au teint d'argent sortent sou-
uant des fumiers plus pourris vestus
d'vne candeur merueilleusement douce
& agreable: Ils ne ressemblent au bou-
ton vermeil de la rose, qui iette au nez
de ceux qui s'en aprochent vne odeur

plus douce & de meilleur ressentiment
 lors qu'il est enuironné, & comme em-
 prisonné en la forte & infecte senteur
 des poireaux & oygnons. Les hommes
 ne sont pas comme les Ciuettes & les
 foines en quelque saison de l'année, les-
 quelles deuorans & prenans nourritu-
 re de diuers carnages & vilaines cha-
 rongnes ne laissent de jetter sur la terre
 des excremens qui seruent aux curieux
 de parfum & de recreation à leurs nari-
 nes : leur gloire ne s'aquiert pas en sa-
 oullans leurs sales conuoitises, en ser-
 uant leur aueugle ambition, en se plon-
 geant dans les delices & doulces vo-
 luptez, comme est celle de vengeance.
 Et quand bien la nature cederoit au mi-
 racle, que de la douceur du desir & acte
 de vengeance naistroit vne sorte de gloi-
 re & bonne renommee, Il est certain
 qu'elle ne seroit pas de longue duree,
 puis que les choses doulces se pourrissent
 aisement & se corrompent. Car ce n'est
 point vn fondement que l'ordure des
 voluptez (& la vengeance n'est rien que
 pure volupté) propre pour soustenir le
 lourd fardeau de l'honneur & de la
 gloire qui ne peuuent recepuoir en eux

de diminution mais subsistent seines & entieres à toute eternité. Il ne faut pas d'assez chercher la baze, & le pillier d'une gloire permanente dans des actions molles & effeminees comme sont les actes de vengeance; dans des actions communes aux ames les plus lasches, & aux cœurs plus poltrons; dedans les Duels, qui trennent, veille ou non, par la force de leur maudite loy sur le chap du combat les hommes les plus craintifs, & bien souuent avecques vn visage pale & de couleur de suif, des yeux esgarez, vn detournement d'esprit, vn cœur palpitant outre mesure, & par tout le corps vn tremblemēt commun. Au contraire le vray honneur veut sortir des actions rudes & espineuses, & estre fondé sur celles-la qui tirent du sang & de leau des frons de ceux qui les exercent: il se veut acquerir, cēt honneur, par des hommes douēz de courage tel que nous auons cy deuant dict, pleins d'industrie à entreprendre laborieux pour soustenir les efforts des difficultez, constans aux disgraces & mescontentemens qui arriuent à toutes heures aux grandes entreprises, mo-

derez en leurs actions, garnis de bon conseil, fournis de bon & sain iugement pour leur seruir de clair flabeau pour les conduire dans le chemin raboteux & mesme quelquesfois glissant qu'il faut trauerser pour arriuer à son palais & domicile. Et sur tout il est tres-necessaire que tels hommes soient, resolu de quitter la douceur des voluptez & s'adonner entierement aux choses assaisonnees d'un travail, tel que celui qui a rendu des Alexendres, des Pompees, des Cefars, des grands Henrys dignes de memoire eternelle. Car ces grosses & sales mouches qu'on nomme des Taons qui suivent les ruches des abeilles pour se saouler de leur miel & contenter leurs appetits de sa douceur, ne replissent leurs trous que d'une liqueur grosse, & plustost malfaisante que profitable. Mais au contraire les Abeilles nourries de tant de choses, ces petits animaux tant salutaires à tous viuans, qui quirent bien souuent la douceur des roses, des lis, des oeilllets des hyacintes & autres fleurs tres-gracieuses, pour se ietter dessus le thyn, qui est d'un goust picquant & aspre, com-

blent leurs maisonnettes, leurs chambres, leurs cabinets, & tout leur héritage d'un miel tant cheri de tous les peuples de la terre, pour les commoditez grandes qu'il apporte quant & luy. Ces choses à mon aduis sont plus que suffisantes de faire croire que nos françois ne peuvent se rendre recommandables par les Duels, d'autant qu'il n'y a qu'un desir de vengeance qui les porte à se battre les uns les autres lequel ne peut produire que des effects honteux & subiects à vne soudaine corruption pour sa douceur; puisqu'il est vray, qu'il n'ya rien de si facile à aualer, rien de si doux que de tirer vengeance de celuy de qui l'on croit auoir receu quelque sorte d'offance. Et puis c'est chose trop commune que les Duels pour estre vertueux, la vertu ne se communique pas ainsi à tout le monde, elle est de plus difficiles accords que cela, ainsi que nous l'ont enseigné tous les anciens, qui tous d'un commun accord nous la représentēt tousiours sur le sōmet d'un haut rocher, roide & mal-aisé à monter où plusieurs taschent bien de grimper, mais peu y peuuent aborder, &

ceux la seulemēt qui sōt les plus adroits
 les plus agiles, les plus forts & robustes
 au trauail, les plus constans, resolu à
 la peine. Mais de nos Duels tout le mō-
 s'en mesle, l'on n'a iamais veu aucuu
 les refuser sinon ceux la qui sont moins
 hommes que les plus couārdes femmes,
 il n'y a homme si malheureux, si mal
 basti, si imbecille, si hebeté, si failly
 de courage, si poltron, & si peu resolu
 qui ne se foure parmy ces monstres tant
 hideux, & ne veuille combattre soubz
 leur estendart & tirer des coups mor-
 tels dedans leur camp infame. L'aer
 de la france donne cela, & semble *Plu. eis*
 que tout ainsi que le Crocodile ani- *ses vies.*
 mal rauissant & inhumain faict preu-
 ue de ses petits, & les cherit comme
 ses legitimes, lors que naissans & sor-
 tans de leurs cocques ils happent &
 engloutissent ce qui se presente de pre-
 mier deuant eux: de mesme que nos
 françois s'epreuent eux mesmes dès
 leur tendre ieunesse, & recognoissent
 s'ils sont françois en essayant de la cru-
 auté des Duels; & bref il n'est requis
 que le nom françois sans marque de
 valeur, ou bien d'autres vertus pour

estre subiect & esclaue de cet Idole. Car bien que les plus braues caualiers, les meilleurs capitaines d'a present, & ceux qui ont durant leur plus verte ieunesse & depuis employée toute leur vie au seruice de leur grand Roy, & au salut de leur patrie; ceux qui pour le bien de l'estat n'ont point doubté de se ietter dans le peril de grands combats, des sieges des villes & assauts furieux, des batailles rangees & des rencontres: Ceux qui iamais n'ont manqué aux occasions de faire bonne preuue de leurs personnes & grandeur de courage, soient maintenant esgalemēt serfs de ce tyran, contraint de luy faire les mesmes hommages, que ceux qui iamais ne se trouuerent à vne bonne affaire, qui n'ont encores veu leurs espees nuës ny donné tesmoignage de leur valeur; si est ce toutesfois qu'ils ne vont point sur l'horrible camp des duels pour augmenter leur gloire, pour conseruer leur ancienne reputation, & s'acquerir nouuelle reuommee. C'en'est point l'honneur qui les y mene, ny le desir de faire espreuue encores vn coup de leur courage & de leur adresse aux

armes : ils ne vont que pour suiure la maudite loy de nostre temps ne songeant pas que nostre Dieu a dict que tous ceux qui seruent à leurs aines selon le malheur de nos ciecles, les perdent, & les ruinent entierement selon les diuines volontez. Au contraire ils regretrent avecques souspirs inexprimables le malheur qui se presente a eux pour leur faire prodigement, & avec infamie respendre le plus pur de ce sang, qu'ils ont eschappé victorieux du milieu des gresles d'arquebusades, du foudre des canons, & de l'effort d'un million de coups de main; & desplorent qu'il faille a cette heure que de leur sang ils ternissent le beau lustre de leur vie pafsée, & de l'honneur qu'ils ont deuant acquis au pris du mesme sang. Et tout ainsi qu'un Quintius homme vaillant & vray Romain, se repentoit de s'estre laisse continuer au Consulat à Rome, lors que les Ecques & les Volsques yindrent iusques aux portes de la ville de Rome, regrettant bien des fois dene s'estre contenté de l'honneur grand qu'il s'estoit acquis avecques vertu les annees preceden-

Ti
3 d

tes pour ne point voir luy estant Consul encores vn coup l'Empire en tel danger: de mesme ils deplorent, & se despitent contre eux mesmes d'auoir pendant le feu des guerres combattu si vaillamment pour s'empescher de rendre les derniers souspirs dedans le lit d'honneur, aux pieds de leur grand Henry pour sa defenée, & qu'ils soient maintenant forcez de pourrir dans l'ordure & l'infamie, Ils se plaignent & accusent leur ancienne valeur d'auoir au temps passé vaincu de si grâds ennemis, si brauez, si vertueux pour estre sacrifiez a present aux pieds d'un demon infernal, & souuent par la ieunesse ignorante & sans experience aux armes, par la vraye lacheté de cœur & la poltronnerie mesme, mais aidée a ce faire par l'esperance du hazard & l'assurance que les armes sont iournalieres, poussee & violente par la force d'une passion desesperée. Car Dieu sçait si la ou le hazard vnique a absolue puissance, l'experience y peut quelque chose! & c'est la subtile inuention de Sathã vieux cinge malicieux, & rusé de donner plain pouuoir au sort parmy les Duels, pour attraper

plus d'ames a ce sien piege : autrement sans doute plusieurs peu doctes en la science des combats, chercheroient les plus hōnestes excuses pour s'exempter de si horribles esbats , mais il est bien certain que tous se fient beaucoup plus au hazard ordinaire , qu'ils ne redoutent les vieux coups , & la doctrine de leurs ennemis. Et cela n'est que trop suffisant pour me faire librement adouuer, qu'ils ont raison ces grans guerriers ces nourrissons de Mars d'ainsi dresser leurs plaintes à la bonne fortune & à leur experience , qui les a menez comme par la main au trauers des plus fortes embuches de tous leurs ennemis durant le feu d'une guerre ciuille, qui ne laissoit sans estre consomméz , que les choses qu'il rencontroit trop dures : cest adire qui ne pardonnoit qu'a ce qu'il n'eust sceu vaincre pour estre trop vigoureux, trop braue, trop vaillant & inuincible , & maintenant durant la paix, durant vn repos vniuersel , estre les ordes victimes des Duels. Ils ont raison , & neantmoins ie les accuse de suiure ain si le temps , de suiure les autres qui les deuantent , n'appartenant qu'aux bestes

brutes de se laisser comme emporter a celles de leurs troupeaux, qui marchent les premieres: ie les accuse de permettre que cette fureur enragee leur serue d'vne inuiolable loy, de favoriser les Duels, de les maintenir & exercer, Mais ie deteste ceux, qui sont si loin de la raison, si idiots & insensés que de penser meriter des louanges avec des homicides, se rendre glorieux & dignes de memoire en faisant iniure à leur patrie, en faisant tort à Dieu à la Nature & aux hommes, en se battans en Duel. Car, ie vous prie, quel honneur, quelle gloire de voir deux hommes tous deux pourtraicts de la Divinité, tous deux moulez des doigts sacrez de nostre Dieu pour estre dessus la terre ces Images: deux hommes tous deux François obligez de s'aymer comme freres, tous deux nourris & eleuez dans vn mesme aer & par mesmes parens se porter avec rage & fureur sur vn champ alteré de leur sang se deuorer l'vn l'autre des yeux & des pensees, se meurtrir la poitrine; & de leurs mains funestes arracher leurs vies de leurs corps, & mourir l'vn sur l'autre troublez d'esprit, & pires que bestes en-

ragees. Tout le monde veult fuir les Ours & les nō mer felonnes d'autant quelles iettent leurs pates sur quelques animaux pour en faire leur carnage & s'en nourrir ; L'on fait la guerre au loup & est nommé de tous animal rauissant, a cause que la faim le force bien souuent de se ruer sur l'innocēt agneau pour assouuir son appetit ; le Lion bien qu'il soit recommandable pour de belles vertus & rares qualitez, est toutesfois en horreur à tous les hommes, parce qu'il meurtrit de ses dens ce qu'il attrappe de premier quand la faim luy contrainct ; l'on appelle ces animaux cruels, l'on les deteste, chacun est leur ennemy & n'y a personne qui ne s'emploie tous moïens de les chastier, & mesme de les tuer, & neantmoins il ne font rien contre leur naturel, ils suiuent seulement en cela l'instinct que Dieu mesme leur a donné &, leur conserue tous les iours, & jamais ne s'oublierent tant que de se ruer sur ceux de leurs especes, bien que priuez de iugemens. Mais les françois plus cruels que les Ours, plus carnaciers que les loups mesme, plus inhumains que les lions & les tigres, voudroient se rendre

venerables par des vices, desquels ces bestes farouches ne voudroient nullement estre tachez; se rendre dignes de loüanges eternelles en tuës & dechirans ceux de leur espece, des hommes, des François comme ils sont, en massacrât leurs amis, leurs aliez, & quelques fois leurs plus proches parens. Qu'on cherche, qu'on recherche, qu'on tourne les feuillets de toutes les histoires qu'on me die s'il fut iamais mention de tels moïens pour acquérir de la gloire & de l'honneur: si non en France & depuis quelque temps que le bon ordre y est du tout peruertý, qu'on laisse la vertu pour cherir, & embrasser le vice, qu'on a quitté le vray courage pour se souler de desespoir, qu'on a comme fuy l'exercice des iustes armes pour adorer ces maudits duels? Les anciës Romains qui n'ont eu pour bornes à leur honneur que le plus hault des Cieux, que les plus reculez & derniers lieux de la terre eux desquels la memoire heureuse s'est rendue immortelle, ont ils iamais esté tachez de ce vice maudit? Nos ayeuls & premiers François, qui auoient tellement esleué en dignité leur

monarchie, qu'elle estoit au comble de la gloire, sans que l'industrie humaine y peust rien adiouster, ont-ils iamaïs durant leur temps, durant leurs conquestes, durant leurs victoires; durant qu'ils iettoient les fondemens d'un honneur permanent, qu'ils acquerissent, qu'ils augmentoient, qu'ils entretenoient une sainte renommée par tout le monde; ont-ils iamaïs, dysse, tourné leurs armes contre leurs freres, contre eux mesmes? ont-ils quelquefois employé leurs espees à tirer du sang de leurs cœurs? se sont ils seruy des duels? non certainement, ils n'auoient garde puis qu'ils ne cherissoient que les bonnes mœurs, qu'ils ne faisoient estat que du vray courage, de la vertu, de la iustice, de la pieté, de la deuotion, de la misericorde enuers les affligez, de la consolation pour leurs ennemys vaincus par leur puissance. L'on a bien veu à la verité à Rome des freres, les trois Horaces descendre sur l'arene, se ietter dans la lice pour tirer des coups mortels contre les Curiaces trois autres freres, mais c'estoit des freres estrangers & ennemis

iurez de l'Empire Romain, c'estoit par ordonnance de leur sage republique, par arrests solemnel de tout l'estat pour affranchir leur Empire, leur patrie de la seruitude des peuples de la ville d'Alba. L'on a veu vn Valerius homme romain se ruer sur vn Tarquin citoyen de mesme ville pour le tuer de sa main propre, mais il estoit chassé de Rome, & déclaré del'Auguste Senat criminel contre la republique, on luy faisoit la guerre pour estre vn des parens du superbe Tarquin banny de Rome pour ses enormes efforts contre la pudicité d'une chaste Lucrese. L'on a veu de nos anciens françois demander le combat d'homme à homme contre quelques romains, mais c'estoit leurs ennemys cruels & capitaux, c'estoit à la teste des deux armées contraires prestes de se choquer, & plustost pour donner les armes du combat general, que pour tesmoigner vn ressentiment particulier d'estre offencés. Mais il ne se trouuera point que parmy les romains, les anciens françois, & toutes les nations plus esloignées de nous, & plus remplies de cruauté, le vice dénommé des

des duels ayt esté malheureusement exercé comme dans nostre france depuis le siecle dernier de nos peres.

Qui donques saisi d'horreur ne detestera la fureur desloyalle qui nous arme ainsi contre nous mesmes? Qui ne maudira ces furies infernallas, qui premieres ont inuenté de dresser des idoles alterez du sang humain par tous les coings de nostre pauvre france? Qui ne voudroit du mal à ceux qui premiere-ment ont fait voir que nostre Monarchie produisoit, que son aer esleuoit & donnoit nourriture à des monstres dõt elle estoit exempte entre tant de natiõs? Mais encores a des monstres affamez du sang des hommes & tousiours insatiables; des monstres, qui n'ont autre ^{Plus en} ^{les vies.} pensee que de ruiner la France? des monstres, qui comme le Crocodile va versans ses vrines sur les chemins passans affin que tous les hommes ignorans sa malice rusée tombent par terre en y passant les trouuant trop glissans & difficiles à marcher, & que ainsi il les attrappe & deuore plus aisement: de mesme se delectent grandement à respandre le sang des hommes

H

par toutes les pars de ce Royaume pour faire renuerfer nostre Estat, & ainſi le noyer dedans le ſang de ces parties. Des mōſtres, qui ſe fourent furieufement par tout, & ne laiſſent maiſon, ny petit coin de cette grande Monarchie qui ſoit exempt du malheur qu'ils traient quant & eux, & rendent leur loy maudite ſi commune & neceſſaire a tous, que ceux meſmes, qui inspirez de Dieu s'en voudroient exempter, ne peuvent reſiſter ſuffiſamment à ſa rigueur & encore s'il ny auoit que ceux-la, qui contraires : a eux meſmes, & ennemis de leurs corps & de leurs ames ſe rendroient facheux en leur abord, hautains & brauaches en leurs diſcours, rudes & deſplaiſans en leurs regards, inſolens en leurs actions & parolles, & par tout & à tous inſupportables, qui fuſſent en danger de ſubir la rigueur de cette loy, l'on tacherait au moins de pallier & donner quelque luſtre & couleur à ce malheur des Duels. L'on diroit qu'il ſeruiroit à ramener tels hommes facheux en leurs humeurs vicieuſes à vne vie plus douce, & à des mœurs plus ſociables & accortes, ou bien à chaſtier leur opiniatre volonté

demeurer tousiours au milieu de leurs vices : mais non c'est vne loy laquelle bien que mechante & pernicieuse au bien & repos de l'estat, est neantmoins semblable aux plus saintes & salutaires en ce qu'elle estant son pouuoit sur tous & est pour tous esgale. Il ne sert de rien à qu'elqu'vne de nos frâçoisd'estre tousiours gracieux l'abord, modeste en ses discours, agreable & doux pendant son entretien discret en ses actions, moderé en sa cholere, & par tout sage, retenu ; & grandement aymable, puisque l'vn de ses voisins & bons amis en faueur du lien de bien-veillance & amitié qui les conioinct estroitement ensemble, l'oblige veille, ou non, d'aporter luy mesme son sang, sa vie, son corps, son ame aux pieds de cet Idole, de ce monstre infernal pour estre sa victime. En quoy ceux qui sont encore esclarez de quelque petit rayon de la lumiere que nous fournit l'entendement, peuuent clairement voir la subtile inuention de sathan, qui se sert d'vne chose si sainte, comme est l'amitié particuliere des humains les vns avecques les autres, pour les engager aux Duels, & leur cacher de ce

voy le tres iuste en aparence (, sçauoir d'assister son amy), les causes & subiets qui selon Dieu & la raison les deueroiēt empescher de souiller leurs mains du sang de ceux desquels souuent ils n'ont receu aucune offence, qu'ils ne cognoissent nullement, ou bien sont de leurs amys, & quelquesfois parens bien proches.

O maudit Idole! combien ta loy est dommageable, monstre hideux & detestable, que nostre Dieu te regarde en fureur, qu'il te face sentir des coups de sa main puissante & iuste, qu'il estende son bras du Ciel en terre pour te briser, te ruiner, & tellement confondre que nostre pauvre France soit affranchie de toy & des malheurs que tu luy cause. O sathan pernicieux en tes inuentions? que le sauueur des hommes tō souuerain seigneur & maistre te frappe & chastie rudement, qu'il ouure sa main remplie de iustice & equitez, & laisse tomber sur ta teste diforme le plus brulant de tous ses foudres pour se venger de tant de millions d'ames que tu luy as rauies par les duels, pour rem-

plir tes enfers : qu'il te poursuiue, qu'il
te rembarre, qu'il te remferme dedans
ton gouffre puant & infect parmy cent
milles gehennes dignes de tes for-
faits.

Et vous François, que diray-ie de
vous, de croire ainsi le pere de mensō-
ge, de suivre le chemin qu'il vous en-
seigne, luy qui ne cherche que vostre
perte ? ou est doncques vostre esprit,
ou vostre iugement ? vous souliez au-
tresfois ayder de vos sages conseils tout
le reste del'vniuers, & maintenant vous
estes tellemēt abastardis par to⁹ vos vi-
ces la raison de vos ames s'est rendue si
imbecille, qu'elle n'est seulement pas
capable d'en recepuoir d'aucun. Mes
amys, mes freres chairs & bien-aymez
il est grandement temps de mettre fin
à vos furies & massacres, il est temps
que soyez rassasiez de vostre sang : c'est
assez souiller vos mains & vos consci-
ences des homicides, c'est assez ternir
le lustre de vos ayeuls avecques des
sacrileges qui ressentent plustost la cru-
auté de tels barbares, qui ne furent ia-
mais ; mais qu'on pourroit se forger en
l'esprit que la can deur anciēne du natu-

rel François, que la douceur de ses mœurs.
C'est assez, mais hélas c'est trop abuser de
la France, celle qui fut autrefois l'œil
du monde, la perle des royaumes, le do-
micile de toutes vertus & école de vraie
Religion & piété le Louvre & la demeu-
re des grands Roys; celle qui fut le theatre
ou plus tost le throsne de l'honneur, c'est
assez en faire vn eschaffaut couuert du
sang de ses enfans, & sur lequel on re-
presente des tragedies pleines de sacri-
leges horribles & pitoyables. Mes bōs
amys dessillez vos yeux, & considerez
comme cette France desolée est rou-
gie de toutes parts de vostre sang, voy-
ez comme elle est desia sur le dernier
periode de sa vie pressée & opprimée
de la trop grande abondance du sang,
qui sans cesse coule de vos veines per-
cées a coups de fer que tenez en vos
mains meurtrieres; voyez comme cet-
te pauvre & miserable mere est con-
trainte de pousser les derniers sanglots
pour auoir vsé de charité enuers vous
ses chers enfans, elle vous a donné
vostre sang avecques tant de liberalité,
elle vous a donné soigneusement les
choses necessaires pour vous le con-
seruer dedans vos veines, & mainte-

nant vous l'arrachez de vos corps mesmes , vous luy iettez dedans la face pour luy servir de poison violent & mortel. O que la douleur est grande quand les enfans s'oublient en leur debvoir , & causent sans regret la mort à leurs parens, à leurs meres ! françois desbouchez vos oreilles , & escoutez vn peu les paroles dernieres que la France vostre mere pousse dessus les lèures avecques le desordre d'une ame entierement affligée.

Helas ô grand Dieu consolateur des affligés que n'a il pleu à vostre bonté infinie de me laisser iusques à l'éternité en l'estat où'estois lors que par vne simple & seule action de vostre volonté vous tirastes toutes choses de la confusion du Chaos pour en faire vos creatures, ou que m'ayant liberalement departy de vos graces en me donnant vn estre, contraire a ce rien que'estois, vous ne me donnastes quant & quant le priuilege de demeurer inhabitable & remplie seulement, comme la Libie, & autres lieux deserts, d'animaux les plus farouches. Je ne serois ô souverain createur de toutes choses, à cette

heure contrainte de plorer amèrement & gemir sous le faix de mes douleurs extremes : ie ne ferois ainsi forcee d'aualer le sang, boire la vie de mes enfans, qui chasse la mienne de mon corps en s'escoulans dedans, ainsi qu'un clou repousse l'autre par ses efforts, & qu'un iour est chassé de parmy nous par l'Aurore & premier point d'un autre ; ie ne verrois à cette heure ces miens enfans se mettre en piece entre mes bras & iusques dedans mon sein. Mon Dieu que la douleur me presse ; hélas s'il est vray que la souuenance d'auoir esté heureux accroist le sentiment des miseres presentes, qui peut estre plus affligé que moy ? Iay veu autresfois que i'estois chérie & honorée de tous les peuples de la terre pour les singulieres vertus de mes enfans, chascun desiroit de me voir & prendre nourriture entre mes bras, & ceux la seulement estoient recommandables & aymez en leurs patries qui se pouuoient venter d'auoir par quelque temps respiré l'aer françois.

Si l'on demandoit par tous les coins du monde où demeurait l'honneur ;

on respondoit ; en France , si l'on auoit affaire à Mars ce grand Dieu des combats , l'on venoit le trouuer dans la France , si les voisins & estrangers auoient affaire de bon-heur , ils venoient en France pour s'en fournir ; si quelqu'un ne sçauoit pas bien viure , il venoit en France pour l'apprendre , ceux qui manquoient de charité , de deuotion & pieté , accouroient en la France , & bien-tost sentoient leurs cœurs eschaufez d'amour diuin , & leurs poitrines pleines de charité , & sainteté. Bref qui vouloit se rendre recommandable pour quelques sortes de vertus que ce fust , le frequenter entre les François luy donnoit en cela contentement par fait , ce que ie ne dirois à d'autres qu'à mes propres enfans crainte d'estre accusée de vanité , & maintenant ie suis le but où chascun dresse son trait de moquerie , la risée , ou plustost l'horreur de tous les peuples de la terre & des Cieux en haine & en despit de leurs rages & furies. Nul ne me plaint en mon affliction , personne au tour de moy ne regrette ma perte ; pas vn de mes voisins ne soupire à la veüe de mes mi-

feres , mais au contraire tous les Empires & Royaumes qui sont à mes costez, se delectēt grandement à ma ruine & reçoivent en leurs cœurs par mon desastre & infortune des ioies inexprimables, & telles qu'ils n'en eurent iamais. Imitans en cela la lune & les estoilles, qui commencent à rire, & monstrent vne face brillante & gaië quand le Soleil, qui pour estre beaucoup plus excellent & plus lumineux qu'elle les faisoit oublier & rendoit leur lumiere tenebreuse & grossiere, commence à se cacher & est comme chassé d'aupres d'elle pour faire place à la nuit & aux tenebres. Chacun se gausse de me voir disgraciee de la fortune & accablee d'un horrible malheur, & tellement atteinte de calamité que les regrets ne sont mesmes pas libres dedans mon ame. Encores l'homme meschant, le meurtrier, le brigant, l'assassin condamné pour ces vices sans ressource d'apel, & trainé dans la place publique pour estre déchiré & mis en pieces avec vne exēple honteux & infame pour souflager son mal par ses regrets & ses larmes: les sospirs pour despraués qu'ils soit ne luy sont point deffendus, sa

bouche luy demeure libre & tousiours franche, & si'l ne peut rien gagner dessus les hommes, Il peut au moins beaucoup par ses pleurs & regrets de son offense sur le Ciel, & la bonté Diuine. Mais moy plus miserable que tous les miserables, plus cruellement traittéepar mes propres enfans que ne furent iamais les criminels mechans & couaincus par les bourreaux: par mes enfâs inhumains & sans respect qui versent sur moy leur sang en si grande abondance, qu'il me couure & cache entieremēt la face qu'il me suffoque, qu'il m'oste la parolle, m'enpesche les souspirs, & repousse mes larmes, de sorte que tous moiens de soulagement m'estant ainsi cruellement ravis mon pauvre corps sert de prison estroictē à toutes mes douleurs, & les contrainct de sans cesse ronger mon cœur, & mon esprit, & toute ma substance peu a peu ainsi qu'on voit le feu se consumer soy mesme & perir dans sa cēdre. Ofrāçois mes enfans que vous estes changez. Doctē & diuin Philosophe, Platon prince des beaux esprits, vous auez eu grande raison de laisser parmy vos diuins escripts que tout ainsi que les

grandes natures, les grands hommes produisent des vertus grandes : de mesme ils font de grandes fautes, & se chargent de vices bien enormes, ie l'espreue maintenant, a ma honte & confusion. Mes enfans, iettés vn peu les yeux sur vostre mere triste & languissâre considerez le pitoiable estat auquel vous l'avez mise par la cruauté de vos coups mutuels : consolez moy au moins d'une douce parolle, ie suis vostre mere, qui n'ay iamais esté sans vn excès d'amour pour vous, ie vous ay enfanté, ie vous ay nourris & esleuez de ma propre substance, & pour la recompence de tels bienfaits & de m'estre comme partie en autant de morceaux que vous estes de diuers hommes vous voulez a cette heure affliger mon cœur iusques à la mort en me rauissant ce que i'ay de plus chair, en arrachant d'entre mes bras vous mesme pour vous massacrer les vns les autres avec ignominie a ma face, deuant mes yeux, dedans mon sein. Mes enfans, si vous n'avez les cœurs plus endurcis que des Rochers de diamant pleignez tant soit peu mes douleurs causees dedans mon ame par vostre barbarie, apportez moy quelque soulagement en

quittans vos haines mutuelles, vos combats, vos tueries ordinaires? guarissez mes dangereuses playes, en ettenchant le sang qui coule de vos vaines, chassez la mort de moy, en conseruant vos vies, retirez moy doucement du tombeau vers lequellie pencheil yalontemps en fuiant le maudit camp où preside vos idoles; permettez que mon cœur & mon ame reçoient quelque resiouissance apres tant de grandes conuulsions, en banissant de vous la crainte des Duels. Mes enfans, ie n'ay maintenant recours qu'a vous, vous seuls me pouuez consoler, & ne puis recevoir guarifon de mes blesseures si vous mesmes qui m'avez blessé iusques à l'extremité, ne ressemblez à cette tant renommee lance d'Achiles, qui scauoit aussi bien elle mesme guerir les playes qu'elle faisoit, comme elle pouuoit les creuser, & les rendre dangereuses.

Car les peuples mes voisins iamais ne tascheront de me sauuer, au contraire ils attendent le iour de mon dernier mal-heur, & l'heure de ma ruyne totale, pour tirer de mes infortunes & encombres l'augmentation de leur honneur faisant côme le lierre qui préla vie

son accroissement dedans les ruines des plus superbes bastimens, & riches edifices. Mais hélas ô mon Dieu la parole me manque tout mon cœur est fasi de tristesse.

Et bien françois, auez vous ouy les regrets de vostre bonne mere? auez-vous compris les iustes subiects de sa douleur? auez vous point aprins combien vos Duels sont pernicioeux & dâna-
bles d'apporter la ruyne entiere à vne telle Monarchie comme est la nostre? contentez ie vous prie cette mere charitable, la nature vous en prie comme moy, les bienfaicts le requerent, tout le reste des gens de bien vous y inuite, la terre le demande, les Cieux vous en coniurent, & Dieu vous le commande absolument. Quittez les Duels, la ruyne de tout bonheur, fuyez les vous noblesse de France; car c'est principalement à vous que i'adresse ma voix & mes complaints puisque c'est vous qui les chersissez & fomentez par tous les coings de ce Royaume plus que tout le reste des françois. En quoy ie trouue bien subiect de vous blasmer, & de vous souhetter autant d'extremes pei-

nes & supplices infinis comme vos Duels, vos faux idoles meritent des execrations & maudissons des belles & saintes ames. Car de songer que vous, qui auez autresfois apporté de l'honneur à la france qui auez esté son frere, son appuy & la force plus seure, qui auez esté l'ornement de l'Estat, les mignons de nos Rois: leur fidelle defence en leurs necessitez: vous qui par vos heroiques faicts & vertus signalees auez merité d'estre honorez de ce nom de noblesse, comme si l'on disoit l'excellence du Royaume, les premiers en vertu, la perle de l'estat: vous qui l'auiez agrandy, & fait voler la renommée de ses merites au dela de l'Europe, luy ayez de vos mains propres, ou plustost par vos vices & cruautéz enormes, machiné sa ruyne vniuerselle, & faict naistre le môstre hideux des Duels pour le deschirer & mettre en pieces, c'est chose bien honteuse. C'est proprement ressembler au regnard animal infect & rauissant qui efface de sa queue ce que ses pieds ont deuant traissé sur la terre, c'est ressembler aux cinges malicieux; qui tenans ce qu'ils ont engendré &

esleué par quelque temps sous pretexte
 de le chérir & caresser avec passion l'es-
 touffe entre ces bras & oste ainsi la vie a
 ce qu'il auoit nourry: c'est ressembler a la
 terre maudite, pour le peché du premier
 homme, laquelle apres auoir produict
 & esleué dedans son sein vne fleur belle
 & d'agreable odeur, fait naistre apres
 tout al enuour des chardons & espines
 qui l'accablent & flestriffent la beauté de
 sa couleur. Partant, françois, refueillez
 vos esprits, & rentrez en vous mesmes,
 que les angoisses de vostre pauvre frâce
 apportent vne douleur curate par toute
 les pars de vostre corps pour vous reti-
 rer de ceste letargie, qui vous tient il y a
 si long temps insensibles aux malheurs
 de ce Royaume, & puis arrestez voz pé-
 sees a cōtempler de combien vous estes
 descheus de ce beau & haut degre d'hō-
 neur ou vous estiez mont z. Considérez
 comme vous estiez les vrais temples de
 gloire & de vertu, maintenant que vous
 n'estes qu'autāt de sales repaires de tous
 les vices par vos Duels: comme vous
 estiez de belles fleurs nourries & espa-
 nouies dans le parterre de nostre france
 iettans doucemēt vostre odeur par tout
 le

le mōde , ou elle estoit receüe de tous les peuples avec beaucoup de ioyë & alegresse , & qu'à cette heure faisant litiere de vos corps dedans le champ des Duels parmy l'ordure , vous n'estes qu'un fumier pourri & plein d'infectiō d'agereuse & capable de desgouter vos meilleurs amis de vous vouloir du bien . Quelle honte l'on ne vid iamais les Aigles se chāger en laides pies , les lyons en pourceaux , les Abeilles en gros Taons & frelons , & vous meschans françois pires que tous les animaux de noblesse vertueuse que vous estiez vous n'estes que sales roturiers bouffis d'horribles vices : de belles & douces fleurs : de l'ordure & du fumier : de parfum delicieux , du poi-

*Plus en
ses vies.*

son qui fera mourir vostre estat , de gentils hommes braues , vertueux , & vaillans serez vous faicts des porcs villains & sales par l'exces de vos vices , comme fut autrefois Grillus par Circé vieille sorciere . He françois , ouurez les yeux de vostre esprit , & employez vos pensees a contempler comme du temps de vos ayeulx vous n'estiezen ce mōde que pour en chasser bien loing les vices , les monstres , les bestes d'iformes & mal faittes

comme d'autres Hercules, & que durant ce siecle vous estes les peres des Duels prodiges les plus horribles & pernicious qui prirent iamais naissance dessus la terre; le receptacle des effects de vos maudits Duels, des pechez contre la Nature, les loix diuines & humaines, & bien souuent contre le glorieux S. Esprit Cōsiderés, disie, cōme autre fois vous estiez autāt de sacrez tēples de cette sage Deesse la Vertu, ne cherchans rien autre chose que d'exercer des actes genereux & dignes de memorable louāge, m'esprisant les choses basses & sans honneur & que maintenant estant abastardies par ces Duels, & esloignez de cēt ancien courage, qui a rendu vos peres immortels, vous ne faictes plus rien qui soit digne du nom françois, rien qui esclate en honneur, ains seulement vous recherchez avec passion d'esperer, & rage plus que brutalle, le sang de vos corps mesmes, le massacre de vos freres & amis, & a faouler vos maudits Duels, & resēblez en fin aux yeux malades & offences qui renoncent aux hautes, gūaies & plus viues couleurs, s'apliquāt seulement aux sombres & noiraistres. Pensez encore

comme vous avez eu dedans vos cœurs
des feux de charité , vn excès de vray
amour enuers nostre Dieu, qui bien sou-
uent vous a fait quitter librement & de
bon cœur vos femmes, vos enfans, vos
maisons, vos familles, & vostre patrie
mesme pour vous ietter dans le danger
des flots d'une mer couroucée, & passer
iusques au milieu des ennemis de vostre
saincte & vraye religion pour augmenter
au prix de vostre sang l'empire de vostre
Dieu & createur, pour estendre sa gloire
par delà vos limites Françoises pour plâter
l'estendar de sa croix tres sacree, & la fai-
re adorer dedàs les lieux qui n'en auoiēt
encore eu la congnoissance, & luy fai-
soient la guerre a toute outrance : & que
maintenant vous employez ce mesme
sang à saouler vos Idoles des Duels, ces
mōltres affamez de vos vices. Tescmoin
de vostre zele anciē est ce se celebré voiage
de la terre St. soubz le regne de Rihilip-
pes premier par la conduite de ce grand
Godefroy de Buillon, ou tout le corps
de la noblesse, tous vos ayeulx soustin-
rent courageusement le heurt & les ef-
forts de tant de grands dangers & de
maux tant par mer que sur terre, & tous

*Du Ha.
lib. I. de
Serres.*

emploierent leurs vies guaiement pour la querelle de nostre Dieu, & pour la def-fécede son nō contre les Sarrasins les ennemis iurez. Tesmoing est le voiage dessoubs Philippe Auguste, auquel vos predecesseurs cherissoiēt leur mort pour faire viure leur foy parmy les infidelles, & enseigner l'Euangile de Dieu dans les pays esloignez & barbares. Tesmoing celuy entrepris soubz Louys le ieune pour deliurer les Chrestiens de l'oppression des Turcs. Tesmoing celuy de Charles-magnes contre les Saxons, lors qu'assisté de vos peres il contraignit ces infidelles de bannir leur idolatrie & embrasser la religion Chrestienne. Tesmoin celuy du grād saint Louys iusques dans la Sirye, & tāt d'autres beaux voia-ges, que ie ne vous puis nōmer pour leur grand nombre, qui vous faisoient aymer de Dieu, & cherir comme ses enfās & à cette heure vous luy seruez de fleaux, d'Attilas superbes foulans aux pi-eds la religion & persecutans ses amys. O playe cruelle de mon cœur quel chā-gement! que ceux qui ont esté autant de boucliers pour parer les coups furieux de tāt de superbes puissances, qui auoient

resolu de ruiner l'Eglise vniuerselle, de renuerser entierement le saint siege Romain, de saccager les Papes, & abolir toute religion & ceremonie diuine: que ceux qui ont au temps passé par le feu de leur amour acquis le nom de fils aînez de l'Espouse de Dieu, & achepté de leur sang & de leur vie le tiltre tant honorable de tres-Christiens, soient des enfans reprouuez, qui par leurs homicides attirent tous les iours des mains de leur mere l'Eglise sur leurs chefs, le foudre dangereux de ses Anathemes, qui par leurs massacres & sacrileges, ont renoncé à la bonté & quitté leur part en ses heritages celestes. O changement cruel & desplorable! ô François fils de vos peres & nepeueux de vos ayeulx, mais du tout disséblables à vos peres & aieulx en vertu, en courage, & bonnes mœurs. Philosophes, taisez vous pour vn temps & ne me dites plus que les enfans sont les images, la vie, la memoire, & l'immortalité de leurs peres: qu'on ne me dyc plus que c'est vne grande consolation à vn bon pere chargé du faix de plusieurs ans gisant au liét touché de ma adie extreme, tenu comme d'vne main de la

mort, & desia demy froid & transi quād il tourne sa veuë desia ternie & esgaree & aperçoit vn fils qui tire encore de ses yeux languissans des larmes de ioyë, & le fait respirer au milieu de ses douleurs, qui luy fait croire en fin qu'il s'en va de ce monde sās mourir puis-qu'il laise quel qu'un qui est de sa substance, du tout semblable à luy, & que sa vie passe seulement en la sienne pour le rēdre immortel. Qu'on ne m'abuse plus de tels discours puisque maintenant ie voy deuāt mes yeux nos frāçois n'auoir riē de leurs peres & qu'au cōtraire par leur vie desordonnee ils font mourir tous les iours leurs peres & aieulx, & par leurs vices leurs Duels inhumains ils ternissent sās cesse le beau lustre de leur memoire ācienne & l'effacent de l'ame de tous les peuples nos voisins. Et pleust au grand Dieu que ces premiers frāçois nos peres & aieulx eussent vescu au monde aussi steriles comme le sable de la mer, ou que les vētres de leurs fēmes nos meres eussent serui de sepulchres à leurs enfās leurs deniās le moien d'entrer au mōde pour y respirer l'ær & iouir de la lumiere du Soleil; afin que nostre Monar-

chie eust cessé de viure quant & eux, & eust entré dans le tombeau qui les contient enseuelis au milieu de leur gloire & honneur. Au moins nostre Empire fust mort & eust cessé son estre accompagné d'un million de victoires & de triumphes son cercueil eust esté embely de cēt mille lauriers, ses funeraillies remplies de louenges & cantiques d'honneur, & ses cédres arroussées d'un grand nombre de larmes, que ses voisins eussēt versé dessus en baisant par amour le marbre de son tombeau, & regrettans la perte du prince des Empires il fust mort dignement & n'eust ainsi malheureusement & avec infamie esté noie dās le sang des frāçois ses membres & parties tiré par leurs mains propres sur le champ & aux pieds de l'Idole des Duels; & tous nos peres & aieulx ne se fussent trouuez apres leur mort de pire condtion que tous les animaux qui se rencontrent parmy les Elements. Car il est bien certain que iamais on ne veit les lyōs produire autres petits que des lyons semblables a eux en courage & generosité & non pas des renards puans & s'arrestans seulement aux charongnes: iamais les Aigles ne couuerēt

autres poussins que des Aiglons princes comme eux de tous autres oiseaux conseruans cherement de peres en fils le rare priuilege d'approcher de fort pres la grande voute des Cieux: & non pas des hiboux difformes & hideux, & amis seulement des plus sombres tenebres. Iamais Dauphin n'engendra d'autres poissons que des Dauphins inuincibles comme eux au trauail & bons amis des hommes, & non pas des serpens inutiles a tout bien, faineans, & ennemys iurez de tous les hommes. La palme mesme iamais ne porta que des dattes bonnes & singulieres, le figuier que des figues, la vigne que des grappes remplies de la douce liqueur de vin: & nos peres & aieulx ont laisse des enfans, qui portent bien leur nom & s'ot deguisez en frâçois, mais le changement de leurs mœurs & de leur vie, le mepris qu'ils ont de leur vertu, de leur deuotion & charité, l'honneur qu'il portent à l'Idole des Duels & a ses loix infames & superstitieuses tesmoigne assez qu'ils ne sont point françois comme estoient leurs peres & aieulx ou qu'ils sont bien empirez. & que leur Nature est gastee & corrompue.

Ce qui me fait dauantage arrester sur la consideration des malheurs de nostre temps , & crier a haute voix, françois quittez les ces Duels, ces maudits Duels, ces Duels damnables, & reprouuez de Dieu, qui vous descriët tellement deuant la supreme maiesté & tous les habitans du Ciel & de la terre. Cessez de vous rougir de sang, pour reprēdre la cādeur de vos ayeulx; cessez de suiure le desespoir qui vōus apporte des loix toutes contraires à celles de nostre Dieu, pour receuoir la cincerité de foy & du bon zele: laissez sathan, laissez la mort honteuse, pour recueillir les graces de l'eternel, pour receuoir dans vos poitrines le Sauueur de tous les hommes & meriter l'augmentation de vos iours; quittez les Duels quittez le sang ou il vous fera perir. Car sās doute tout ce sās ainsi malicieusement respandu par tous les lieux de ce Royaume par vos coups funestes & mutuellement mortels ne vous menace de moindres effets de la iuste vēgeance de nostre Dieu, que fist autēps de la seruitude des enfans D'Israel celuy, qui se trouua par toutes les sources de l'Aegpypte. Car alors Dieu se seruit de tous les ele-

Exod. 7

mens pour punir avec rigueur ces peuples aveuglez en leur erreur; de la terre & de l'eau, et en tirant vn nombre infini de sales grenouilles & moucherôs importuns, qui leur porterent tant de sortes de maux, que ces pauures Égyptiens furent contrains de dire hautemēt

Exod, 8 que c'estoit le doigt de Dieu, qui auoit
9.10. mis des forces inuincibles en ces petits & chetifs animaux.

De l'aer & du feu, en iettans d'en haut des grosses nuees de gresles, des foudres & feux ardents, sans que la grande & extraordinaire chaleur fist dissoudre la dureté des gresles, ny semblablement que la froidure insupportable des gresles & frimats attiedit tant soit peu la chaleur des foudres & tonnerres. Et puis ayant puni cette nation refractere à ses diuines volōtez par ces playes & autres iusques au nombre de neuf, il les affligea d'vne dixiesme, laquelle seule les rendit plus comblez de tristesse & ennuy que les autres ensemble, la mort de tous leurs fils aînez à cōmencer depuis les moindres en honneur & qualité, iusques à ceux des princes & du Roy. Ce sont les playes que nostre Dieu amployra à vo-

stre chastiment, ce sont les verges, qu'il trempera dans vostre sang ainsi prodigement respandu aux pieds de vos Idoles des duels, & en visitera ce Royaume en sa fureur, Il se servira du feu, de l'aer, de l'eau, & de la terre, comme d'instrumens de sa iustice pour dōner les peines deües à vos iniquitez, & sur tout cette dixiesme & derniere playe ne sera nullement oubliée.

Car vous tous qui estes fils aînez tres-chretiens, mais reproquez par voz atrocites sacrileges, passerez par le fil de l'espee tranchante & asseree, & comme celui qui védoit de la fumee perit en fin dans la fumee; ainsi vous, qui durant le cours de vostre vie, avez souille vos homicides mains dans le plus pur du sang des hommes, & donné de vostre fer funeste & plain d'un venin plus que mortel à tous esgallement de cœur, où par effect vous mourez par le fer, les espees seront vostre chemin pour passer de cette vie en l'autre, & serez contrains de noyer vostre vie dans un fleuve de vostre sang. Et par ainsi vous estes en grand danger, le peril vous suit de pres, & desia la mort cōmence de vous frapper. Neanmoins

Gen. 9.

si vous voulez reuenir en vous mesmes
il y a encores vn peu moien de vous sau-
uer, vous pouuez retirer vostre vie des
pates de la mort, & garantir l'Estat
françois de la ruine, qui luy est euidente.
Dieu vous fait cette grace qu'il ne fit ia-
mais aux fils aînez des peuples del'Æ-
gypte au temps de leurs seueres chastî-
mens, s'ils eussent receu vne telle libe-
ralité de luy ils l'eussent amployé selon
son merite: il vous donne le loisir de fai-
re vostre paix par la patience, il vous con-
iure par ses saintes inspirations d'auoir
pitié de vos ames & detestans vos duels,
ieter les yeux vers le Ciel que vous auez
si souuent irrité, le regarder avec la con-
tenance d'une ame touchée de grande
douleur. Il vous exhorte doucement
d'auoir les larmes aux yeux, le regret bi-
en auant dans le cœur, les sospirs en la
bouche, les prieres tres-humbles dessus
les leures, & par toute vostre ame vn re-
pentir general d'auoir au preiudice de
ses sages conseils & saints cōmandemēs
souillé vos mains & vos consciences du
sāg humain. Et sur toutes autres choses
il veut qu'ayez en vostre volonté vne fer-
me resolution si auant enracinee, que

nul effort des passions humaines ne la puisse esbranler, de fuir les querelles, mespriser les loix infames & superstitieuses qu'a introduit vn faux honneur inuenté par sathan: il veut que despoulliez vos cœurs de cette liaine bourelle de vos ames, qui vous transporte si loin de vous, qu'elle vous fait commettre des pechez que les plus farouches bestes auroient honte de se les imaginer. Il veut ce Dieu puissant que quittiez les massacres & assassins, que detestiez les duels instrumens de sathan, dont il se sert pour rēdre nostre france deserte & peupler ses enfers; que brisiez ces Idoles, que vous auez esleuez de toutes pars cōme Images d'honneur, renuerriez leurs autels, ostiez leurs sacrifices, & bannissez de vous ces horribles demons, lesquels n'ont rien qui soit digne de vous, & ne font que vous tromper & abuser. Appelez le nostre Dieu à vostre ayde il ne scait pas moins retirer son bras, quand les hommes recognoissent leurs fautes, qu'il scait bien auancer sa main & montrer le foudre, duquel il frappe les peuples oppigniātres en leurs iniquitez implōrez le, il n'a point oublié les ancien-

nes misericordes, tant s'en faut il frappe
la porte de vostre cœur, il vous inuite à
l'escouter; ouurez luy vostre cœur, vo-
stre sein vos oreilles, vos yeux, vostre
entendement affin qu'il entre par tout
chez vous, & que vous remplissant en-
tierement, il vous donne moien de vous
sauuer & vostre pauvre france.

*Diu
Aug. li.
de fid. ad
Petrum.
cap. 3*

*Michée.
cap. 6.
& 7.*

Priez le il vous exaucera sans doute,
car comme Saint Augustin nous ensei-
gne, ce seroit biē en vain que nostre Dieu
auroit luy-mesme ordonné les prieres &
oraisons, si les pecheurs en le priant du
fond du cœur, n'obtenoient remission
de leurs offencez, Et escoutez-le il vous
dict ce qu'il disoit autre fois à son
peuple par la bouche de son Prophete
Michée; mon peuple, que vous ay ie
fait, ou en quoy vous ay ie donné sub-
iect de mecontentement? la terre ne
nourrit plus de saintes ames, & entre
tous les hommes il ne s'en retrouue plus
de iustes; chacun coniure contre le sang
& les freres mesmes deliurent leurs fre-
res à la mort, & tous louent hautement
les faits enormes de leurs mains, cōme
choses bonnes & saintes. Escoutez cō-
me il se plaint ce souuerain Createur de

toutes choses, & dit de vous ce qu'il a quelques fois reproché au peuple d'Israel dans Esaïas son Prophete bien aymé comment ie planté ma vigne avec tant de soing & diligence, ie l'ay cultiuee & arousee selon ses necessitez & les saisons ie n'ay point manqué de luy donner toutes les façons requises pour la faire charger de fruiçts delicieux, & lors que ie pésois cuillir le fruiçt de mes labeurs, & recevoir des grappes en grād nombre pleins de la douce liqueur de vin, ie n'ay trouvé que quantité de fauces grappes remplies seulement d'un ius noir, espais & bien amer. Comme s'il disoit ce tout puissant, quelle pitié, j'ay cré l'homme, ie l'ay mis sur terre avec les moïens de se nourrir & cōserver en cette vie, j'ay ouuert les sources de mes graces, & les ay faict couler sur son ame pour la maintenir en estat d'innocence; j'ay versé sur son chef les douces influences de mes saintes benedictions ie luy ay donné outre cela mes sacremens, qui tous luy sont autant de ruisseaux de mes graces, & de moïens bien asseurez pour secourir sa conscience en ses vrgentéz necessitez: & voicy que quand ie pensé demander compte de

Apoc. &
cap. 2.

mes liberalitez, & a voir le nōbre de ses merites & bonnes œuures, ie ne rencontre que sang, que massacres & assassins effectés de ces Duels, qui regnent parmy le monde. Mon peuple songez à vous, vous auez quitté vostre charité ancienne vos premieres vertuz, voyez de quel degré vous estes tombez, faictes vne penitēce entiere, & retournez à vostre innocence passée: car autrement ie viendray bien-tost à vous & renuerseray vostre chandelier de son lieu; c'est a dire ie tireray vostre vie de ce monde pour la ietter dans les tenebres.

Mais helas! ô douleur de mon ame; que me sert il d'ainsi leuer ma voix & consumer la force de mes poulmons pour faire entendre les iustes plaintes & doux aduertissemens de nostre Dieu à ce peuple françois hors de luy-mesme & forcené; puis-qu'il se rēd tout sourd à mes parolles puisque tous les demons ensemble travaillent pour l'arrester en son peché, & que les vns luy troublent le cerueau de crainte qu'il ne viēne a quelque cognoissance de ses fautes passées, les autres luy seichent le cœur de haine, & le rendent si durement trempé que toutes les

les saintes inspiratiōs de nostre Dieu, ne le peuuent amolir, & luy bouchent les oreilles afin qu'il ne puisse entendre les feueres menaces de nostre Dieu, les autres luy ferment les yeux de peur qu'il ne voye les verges que la iustice infinie appreste pour le frapper & chastier rudement; & tous ensemble le portent aux Duels, & à ruiner entierement sa patrie par l'abundance de son sang.

Et partant France autresfois tant recommandee, pour la douceur de ton naturel, pour la pureté de tes meurs, la beauté de ta police, la valeur de tes armes, la quantité de tes victoires, la grandeur de ton courage, la verité de ta religion, le feu de ta charité, l'excez de ta pieté : France la premiere des Monarchies, le Royaume des Royaumes, le sang continuera de t'affliger, il croistra sur ta face, & tous les iours se rendra plus pesant, il te fera plier sous le faix gemissante, il te fera chāger, il te fera perir, il te fera mourir, il te seruira de tombeau, qui sera bien tost apres toy corrompu & reduit à neant, Ainsi ton nom sera effacé de la memoire des peuples de la terre, la lumiere de tes vertus anciennes sera esteinte, ton

lustre premier sera terny, le bruit de tes victoires sera perdu, tes memorables faicts seront mis en oubly, la candeur de ton innocēce antique, de ton naturel, de tes mœurs sera salie, & les penlees de ton changement, le souuenir du subiet de ta mort sera en horreur deuant Dieu & le reste du monde. hélas ! il te faut bientost perir, & desia ie vois ce sang qui te suffoque ; ce sang, bien que rouge de sa nature & de honte pour se voir ainsi repandu sur la face de sa mere, te fait pallir : desia i'aperçois tes nerfs retires, tes yeux esgarez,, tes narines resserrees & ta bouche entrouuerte pour laisser eschapper les derniers sanglots ; ie sens ton pouls sans force, ton cœur affoibli, tes membres froids & demy-morts. Mon Dieu ! que mon cœur souffre bien maintenant des douleurs qu'il ne scauroit exprimer que par mille souspirs, quand à moy. Paymerois autant dès cette heure te donner le dernier baiser, & te dire a dieu pour Iamais, puisque tu es si preste de ton naufrage. A-Dieu donc France ma chere patrie, adieu ma charitable mere, a Dieu l'honneur du monde, a Dieu les delices des hômes, a Dieu la gloire des

armes, a dieu l'espee de Mars, a dieu la mere des vertus, a dieu le rempart des Chrestiens, a dieu la seure deffence du sainct siege Romain, a dieu le maintien du Clergé, a dieu la fille aisnée de Dieu. A dieu encores vn coupla perle des Royaumes, la plus glorieuse & la plus grande Monarchie que le monde ayt iamais veu; grande en armes & en puissances, grande en victoire & en triumphes, grande en Iustice & equité, grande en police & en bon ordre, grande en amour des lettres & en hommes sçauans grâde en pieté & vraye deuotion, grande en Roys & en vaillans Monarques, grâde en Clouis, en Charlesmagnes, en Philippes, en S. Louys, en François, en grâds Héryys; a Dieu par tout, & en tout grâde, a dieu pour la derniere fois. Ainsi dōc il faut que trebuchent les cedres du Liban, les Collosses de Rhodes, les pyramides de Memphis? ainsi les chefs d'œuure de Dieu, les effets de sa toute puissance, les miracles de sa bonté diuine païront le tribut au changement, & seruirōt de pelottes & de iouets à la mort ainsi le plus puissant, le plus florissant Royaume pour lequel le Soleil ayt pro-

duit sa lumiere & sur lequel il ayt versé
 ses graces & douces influances, se verra
 terracé, & renuersé de fonds en cōble
 par les duels maudits, sans qu'il en de-
 meure rien aux hommes, qu'un continu-
 el regret, un repentir entier de l'auoir
 veu si beau, si grand, si admirable, pour
 le voir prendre fin par son sang par la ra-
 ge des duels, par ces peches enormes.
 Assis plein de deuil, remply d'ennuy, &
 respendans mes larmes sur nostre Frâce
 bien desolee & desia perissate, i'emploie
 mes pensees a contempler cette belle &
 loüable coustume de ces anciens Ro-
 mains, qu'ils gardoient comme inuiol-
 able: ie considere tout dolent & saisi de
 tristesse comme les cheualiers de Rome
 estoient tenus, apres auoir gardé par
 quelque temps les cheuaux, qui leur
 estoient baillez par la chose Publicque,
 de se trouuer dessus la place chacun te-
 nant le sien par les reines prest de le ren-
 dre aux magistrats. Outre cela ie consi-
 dere comme il falloit que deuant tout le
 peuple il tinsent compte de leurs faicts,
 & declarassent soubz quels chefs & capi-
 taines ils auoient rendu combat, en cō-
 bien de batailles, en quels assauts de vil.

*Plus en
 ses vies*

les, en combien de rencontres ils auoient monsté à l'ennemy qu'ils estoient du nombre des Romains inuincibles, afin que suiuant le tesmoignage de leur chef, suiuant le merite de leur valeur, ils receussent des Hymnes d'honneur en leurs loüanges, ou fussent honteusement blasmez. ie me souuiens de cette coustume passée en force d'une loy. & sa memoire me faict ietter les yeux sur le tableau de nostre temps, dās lequel ie puis voir representee au vif vne image de cette encienneté: car il est bien certain que lors que nostre Dieu iugera sagement que ces partisans des Duels auront assez ou plustost trop habité dessus la terre, il ne se contentera pas de retirer d'eux mesmes la vie qu'ils ont eüe comme en depost pour leur en seruir en son honneur & au salut de leur conscience.

Mais encores les assemblant sur la place publique en la vallee de Iosaphat, deuant son Throsne rempli de magesté rigoureuse & non cognüe aux hommes, il leur demandera compte avecques exactiō extraordinaire du moindre de leurs faicts & de toutes leurs actions depuis leur vsage premier de la raison, iusques

au dernier periode de leur vie. Il leur demandera sous l'estendart de quelles vertus ils auront combattu le vice & fait vne iuste guerre à Sathan, combien de fois ils auront resisté aux efforts du prince des tenebres, & brauement vaincu ses puissances rusees; & lors leur donnera des recôpences dignes de leurs merites, ou des peines equipolantes à leurs iniquitez. Cette pensee bourelle bien mon ame, & la met en vn desordre que ie ne puis exprimer que par des sanglots: icy ie retrouve des ressentimens nouveaux pour mon cœur affligé, icy l'excez de ma douleur me commande de me tair, & du tout m'osteroit la parole, si ie ne faisois force à moy-mesme. Mais ie suis bien content de faire vn excez en ma puissance pour ne permettre que ma iuste douleur ne coupe le fil de mon discours, ores qu'elle perce mon ame: & de donner d'auantage subiect à mes larmes, puisque la cause le merite, & qu'elles sont si generales que personne ne s'en deffend, en representant selon mon petit & trop foyble pouuoir, combien ses ames malheureuses qui auront combattu sous

Penseigne des Duels infames , seront empeschez en ce iour d'horreur pour elles , & tout contraire de leurs desirs. Car desia il me semble que ie vois , mon cœur refuse de le dire par ce que ce sôt françois , des grandes troupes de ces ames qui ont si longuement nourry de leur sang l'idole des Duels paroistre deuant la face de nostre Dieu plein de fureur , & de vengeance , laides & difformes , contrefaiçtes & hydeuses. Elles ne sçauent comment se presenter deuant cette chere de iustice , elles souhaitteroient pouuoir de rechef se cacher dans leurs tombeaux au milieu des entrailles de la terre : mais c'est chose impossible. les trompettes du Ciel ont sonné , les Anges de nostre Dieu ont donné l'assignation à tous les morts & ont fait retentir leurs vois par tous les coings du monde , il faut que toutes ames sortent maintenant de leurs vieux trous , & se presentent laides , ou lumineuses dans le parquet de leur souverain Iuge. Elles voudroient bien faire pencher la misericorde de l'Eternel de leur costé , & que sa iustice fust la plus foible : mais leurs pechez parlent con-

tre elles, leurs consciences les accusent & les Duels mêmes crient vengeance dauant Dieu, prests d'accuser sa iustice si elle se laisse gangner par elles indignes de pardon, & venoit à leur remettre leurs offences enormes. Elles cherchent tous les moiens de parer les coups du foudre de nostre Dieu, & d'euitier vne sentence pleine de rigueur: mais c'est bien en vain, car le ver de leurs consciences les ronge continuellement, & les contraint de s'auoüer coupables, de telle sorte que deses peres du tout de leur salut, elles tournent leur rage contre elles mêmes, & s'acüient toutes ensemble. Les vnes se plaignent deuant le throsne de Iustice de celles, qui ont souillé leurs mains dans le sang de leurs freres & de leurs peres: & celles-la au mesme temps accusent ces complaignantes d'auoir meurtri d'auoir sacrifié aux pieds de l'Idole maudit des Duels leurs amys & plus proches parens. L'on en void, qui demandent Iustice à haute voix des iniures, qu'elles ont receu mal apropos estant encores en ce bas monde & d'autres au mesme instant, qui s'ecriët avec passion, qu'elles ont receu de leurs

maines propres des playes cruelles dedās le sein suffisantes pour y satisfaire. D'autre costé il s'en retrouuēt, qui en accusēt d'auoir esté cause, qu'elles sont parties de la terre sans vn regret en l'ame, & repentir de leurs pechez : & telles accusés les detestent reciproquement pour les auoir à coups de fer separees de leurs corps ayant la haine au cœur, & les blasphemés à la bouche ; & toutes ensemble sont conuaincues de massacres & sacrileges, sont declarees coupables d'Idolatrie & fauce religion a cause de leurs Duels. Il me semble que ie voys des cette heure ces ames en telle peine, & en conçois vne douleur inexprimable, mais ie tramble, & n'ay cheueu aucun, qui ne me dresse en la teste, quād ie m'imagine l'estonnement, qui saisira ces malheureuses ames & maudites, les heurlemēs & cris espouuātables, qu'elles poufferōt parmy l'aer, lors qu'apres ces voix de cōfusion, elles leuerōt avec crainte leurs yeux sur nostre Dieu, & luy verront vne face horrible & pleine de vengeance des yeux estincelans & enflambez du feu d'vne iuste cholere, des mains remplies de glaiues bien trançhans, & des fou-

dres les plus ardës , les plus redoutables qu'elles eussent iamais peu s'imaginer. Puis quand outre tout cela elles apperceuront sa sainte & sacree bouche preste de prononcer vn Arrest plein de rigueur , plein de peines infinies contre leurs pechez des Duels & leurs massacres : vn Arrest , qui les condamnera d'estre precipitees dans les enfers , pour y estre la nourriture des flammes eternelles , & pour y recevoir des peines de sathan leur ennemy mortel , qui a tant trauaillé pour les acquerir à sa puissance & a prins tant de soing a employer la haine , les blasphemés , les Duels ses pl^e affectiōnés & fidelles seruiteurs, pour les faire tomber entre ses pates.

Luc. 23.

Que diront elles ? que feront-elles ? sinon d'inuoquer les montagnes de se laisser tomber dessus leurs teltes, les collines de les acabler, la terre de s'entrouvrir pour les deuorer & ruynier de telle sorte que iamais ne soit faict mention d'elles, l'aer les estouffer , le feu de quitter la moyenne region de l'aer pour les venir vistement consumer & reduire en vn bien peu de cendre.

Car de fonder quelque esperance sur

les anges de Dieu, de prier les saintes
ames de leur ayder & d'inuoker la bô-
té de l'Eternel de leur porter faueur
encores vncoup, & leur seruir comme
d'eau de senteur pour encores vnefois
effacer leurs pechez, il ne sera plus tēps.
Il ne sera plus besoing qu'elles crient
pardō mon Dieu, misericorde, Seigneur
ayez pitié de nous vos pauvres creatu-
res, car nostre Dieu souuerain faueur
des hommes, n'aura plus de remission
pour elles, à cause, di& le très-doctes.
Augustin, qu'elles ne pourront plus cor-
riger leurs meschantes volonte, bien
que le ver de conscience les ronge cou-
tinuellement, & que leurs cœurs con-
çoient des douleurs grandes par la
cognoissance de leurs fautes. Et puis ie
dys outre cela que au partir de ce mōde
auront applicqué le sceau au registre de
leurs œures & actions, il aura esté scelé
à l'instant de leur mort, & de telle façon
qu'il ne se pourra plus ouurir pour l'aug-
menter de quelques nouveaux faicts : il
ny aura plus que Dieu leur iuge vnique
qui pourra penetrer au trauers, & con-
siderera avecques poids & mesure tou-
tes les lettres, les syllabes, les mots, les
lignes, & tout ce qui y sera contenu.

Il regardera de près, & espluchera bien tout, mais il ne trouuera rien de bon, il ny aura rien, qui l'esmeue tant soit peu à compassion, il ne rencontrera que des oeuvres qui meriteront estre reprouuez & condēnez par sa iustice: non que ces ames malheureuses, ayent passé le cours entier de tous leurs iours sās faire quelques actions meritoires, mais d'autant que ce maudit cachet, qui aura fermé le liure de leurs comptes, estant vn fer dur & pointu, vne espee bien trāchante, aura percé tout a trauers, & deschiré tout ce qui y estoit de bon & saint. Elles aussi par les trous de leurs espees, leurs horribles cāchers descouriront le grand nombre de leurs pechez, qui ne feront point contrebalancez d'aucunes bonnes oeuvres, & ainsi s'accuseront elles-mesmes, & auoüront meriter des peines infinies: & pareillement la bande entiere des celestes esprits, qui seront autour du Throïne de iustice comme tesmoings fidels, recognoistra ces ames criminelles de laise magesté en premier chef. Partant ces saintes substāces n'ayans rien en leurs pensées qu'vn amour extreme enuers leur Dieu & Createur,

ne respirans que les choses, qui chanteront ses loüanges, elles auront en horreur le peché ennemy capital de leur souuerain bien, elles detesteront ces ames meschantes & pecheresses & mille fois ingrattes, qui auront au preiudice des biens faiçts qu'elles ont receu du fils de l'homme, & de ces liberalitez, de ces graces, de sa vie, de son sang, de sa mort, aymé ardemment l'iniquité & mesprisé ses saintes remonstrances : suiui leurs sales voluptez, obei à leurs desirs desreglez de vengeance, & oublié ses tourmens extresmes, sa croix, sa passion douloureuse. Les Anges & Arcanges, les Throsnes & les Puissances criront à pleine voix vengeance, & requerront avec profonde humilité que Iustice soit faiçte de ces ames pourries & gastees de peché de ces vilaines ames, qui auront cheri les Duels Idoles du plus horribles de tous les vices source de tous malheurs & fui la paix don du Ciel, & gages assurez de son amour enuers les hōmes. Ils se plaindront ces mignons de nostre Dieu, & se rendront parties contre ces ames refracteres à tout bien, qui ont contre toutes raisons, contre leur Nature

mesme obeï avecques tant de passion furieuse à sathan ennemy superbe & capital des humains, qui se sont enfermez dās les espees, dans le fer de sa seruitude, & contredit à leur Dieu & bienfauteur, & refusé son iour delicieux & doux, & foulé comme aux pieds l'obeissance qu'elles luy doibuent naturellement. Car c'est chose bien certaine, disent mesme les Philosophes, que comme le nom de pere persuade l'amour, celuy de la mere la tendresse de cœur à l'endroit de ses enfans, celuy de fils vn entier respect enuers ses pere & mere: ainsi celuy de creature commande vne inclination naturelle a recepuoir volontiers & de bon cœur depuis les moindres iusques aux plus hautes volonteiz de son createur. Les douleurs de ces ames françoises, de ces supports des Duels, croistront sans cesse & seront comme sans mesure auāt l'arrest de nostre Dieu; voyant toutes choses leurs estre contraires, & celles mesme qui leurs auoient au-parauant esté tant fauorables: tout ce banderacōtre elles, outre les esprits pleins de raisō & de lumiere, les creatures insensibles le feu, l'aer, l'eau, & la terre viendront à

leur tour pour declamer contre ces criminelles, & conspireront ensemble pour tirer des mains de nostre Dieu des peines rigoureuses & horribles pour les chastier. Pour cet effect ils representent en premier lieu cōme telles ingrates ames ont tant esté preferees à toutes autres creatures par l'Eternel lequel a ramassé en elle les plus rares beautez, les plus grandes perfections, les plus belles qualitez, qui se retrouuent au reste de ses œuvres. Comme il n'a point esté content de leur donner vn estre simple, & tel que celuy des pierres & rochers; mais vn estre accompagné de vie, non point semblable encores à celle des plantes & des herbes, ou mesme seulement sensitiue, cōme les animaux priuez de iugement en ont, mais vne vie capable d'ediscours, vne vie qui peut bien araisonner son Dieu & Createur, & l'entretenir souuēt avec vne hūble priuauté, vne vie guidée de la raison. Dauātage ils mettrōt en auant cōme d'autant que cette vie auoit pour cōpaigne vne puissance auēgle, laquelle eust peu les precipiter en plusieurs sortes d'erreurs, à sçauoir leur volonté, & beaucoup d'autres inferieu-

res puissances , comme leurs inclinations & appetits sensuels , par le moyen desquelles, elles eussent facilement quittées les bonnes actions, pour faire vn choix des pernicieuses & desreglees , il leur a osté toutes sortes d'excuses , & donné les moyens faciles d'embrasser la vertu, en leur donnant vn autre puissance plus parfaite & superieure , l'entendement pour leur servir de flâbeau & de lumiere dans les tenebres de leur volonté , & de frein à ces inferieures puissances subiectes a estre libertines.

Ils remontreront comme elles creatures insensibles , sans lumiere, sans raison , n'ont iamais enfreint les loix de Dieu: le feu dira , qui iamais a peu iustement douter de la chaleur enma lumiere depuis le commandemēt premier que i'ay receu de Dieu mō createur d'eschauffer toutes choses? si quelques fois i'ay cōme oublié ma vertu , & refusé de consumer les choses , qu'on me donnoit a deuorer , m'en peut on accuser cōme coupable de desobeissance, puisque c'estoit par vn second cōmandemēt du tout puissant; comme quand ie cōserué les trois petis enfans, & les rafraichis de mes flâbés

bes dans la fournaise de Babilone? L'ær
 chātera hautement, sans superbe tou-
 tes-fois, qu'il n'a iamais manque d'estre
 mediateur fidelle aux cratures d'icy bas
 pour les faire iouir des influāces des
 Cieux & de tous les astres & estoilles:
 que tousiours il a receu la lumiere du
 Soleil, & la despartie esgallement aux
 habitans de la terre qu'il a trouuez capa-
 bles de la receuoir; & que si l'on a veu
 quelques iours obscursi en plein midy,
 c'estoit pour desplorer avec le Soleil &
 les Cieux la mort honteuse, & pleine de
 riguer non meritee, qu'on faisoit cruel-
 lement souffrir à son souverain conser-
 uateur, & en fourer le duëil bien auant
 dās les cœurs de toutes creatures. L'eau
 se vantera que ses furies plus grādes n'ôt
 point eu de force asses pour la faire passer
 par dessus ces limites ordonnez par
 nostre Dieu aux premiers iours du mô-
 de, bien que souuent l'on l'ayt veuë tel-
 lement couroucee & enflée par ces flots,
 qu'il semblast qu'elle fust du tout preste
 de renuerfer par ces horribles efforts
 toute la terre à vn coup: & qu'elle ne
 peut rougir ny receuoir de blasme d'a-
 uoir monté sur les plus hautes monta-

gnes, & mesme de les auoir surmontees de quinze coudees en hauteur vnefois en la vie, d'autant qu'alors elle seruoit d'un instrument, à son superieur vniue pour punir les hommes refractaires à ses sacrez commendemens. La terre cette bonne mere vniuerselle, appellera à telmoings toutes ces ames mesmes accusees deuant Dieu, les animaux de toutes les especes, & les oyseaux de l'air pour declarer si elle n'a pas toujours avecques fidelité & entiere obeissance gardé le commendement qu'elle receut de la tres-sacree bouche de l'Eternité, au iour de son estre premier; si elle a manqué de produire les verdures les plantes, & les arbres, & de fournir nourriture suffisante à toutes choses iouyssantes de la vie. M'a-ton veu, dira elle, depuis que le Soleil fait son cours rôdement dedans les Cieux, & iette sur ma face ses lumineux rayons, ne point liurer en temps & en saison les alimens & les viures requis pour le soustien de toutes creatures, sinon lors que Dieu mesme a mis la puissance de ses doigts dans les rayons de ce prince des Astres, pour leur donner vne chaleur exceden-

te leur nature, afin de consumer & rendre du tout mes labeurs inutiles ou bien lors qu'il a versé sur moy les iniures du Ciel, les grésles & orages pour ruyner mes ourages, & arracher de mes mains les doux fruits, que j'aprestoys pour presenter à tous mes nourrissons, & principalement aux hommes? Et puis après conformément les vns aux autres, & tous enséble demandent iustice à nostre Dieu, de la grande ingratitude de ces meschantes ames tant fauorisees de luy, tant aymeas, & plus cheries que son sãg propre: tant honoree & esleuee par dessus les autres Creatures, qu'il sembloit que tout le reste n'eust esté que pour leur seruice ordinaire, pour leur plaisir, pour leur vtilité. Les-quelles neãtmoins n'auront laissé au preiudice de tant, & de si rares bienfaits de s'adonner à des pechez enormes, de suiure les ennemis de leur Dieu, d'adorer sathan dedans vn champ couuert de sang humain & faire sacrifice de leurs persones sur les autels des Duels. Ils criront, Seigneur, vous estes le grand Dieu de vengeance, vëges, s'il vout plaist, l'iniquité inexprimable de ces sales vaisseaux de peché, ils vous ont offensé avec outrage, ils ont foulé

aux pieds vostre sage volonté, & mesprisé vos oracles diuins. ilz ont esseié de fouiller le pl⁹ pur de vostre tres-pretieux & tres-sacré sang, que vous auez respādu sur la terre avec tant d'exces d'amour, tant de feux de charité, tant de douleurs & tant d'angoisses pour en effacer les sales taches de leurs pechez: ils ont voulu mesler la bouë, la pourriture de leurs maudites veines parmy le plus beau de vostre sang en se tuans & déchirans pour repaistre leurs Duels sur la terre, laquelle a serui de funeste eschafault à vostre mort trop langoureuse. Il vous faut à cette heure venger, puisque des le iour de l'éternité vous auez resolu de garder la vengeance de leurs fautes en ce iour-d'huy Iour de Iustice. Car autrement nous eussions tous coniuéré contre eux, & n'eussions enduré qu'ils eussent si longuement affligé vostre patience par tant d'atroces & sacrileges, l'un de nous eust vistement quitté la grande voute des Cieux pour les venir deuorer & reduire à neant; vn autre eust tellement abandonné leurs poulmons, qu'ils n'eussent peu rafraichir leur foye, & ainsi fussent seichez de chaud, ou bien se fust ietté dans leurs entrailles avecques violence si grande,

qui les eust tous suffoquez en vn moment. L'vn se fust enflé de couroux & passant ses limites, les eust esté chercher aux derniers coins de la terre, & là les eust tant, & si long-temps tournebouléz, & iettez deçà delà parmy ses flots, qui les eust veu finablement creuer & seruir de pasture aux plus cruels monstres & plus hydeux qu'il eust cachez dedans ses ondes. L'autre eust enrouuert son corps de toutes pars, pour liurer des passages bien emplés aux plus sales esprits des enfers, qui les eussent enleuez dès le temps de leurs premiers massacres, pour les trainer & precipiter dans les feux les plus ardens, qui se retrouuent dedans leur tenebreux & brulant Empire.

Mon Dieu quel changemens ! quel creueccœur à ces ames françoises, quand elles verront ainsi les choses, qui leuts estoient auparauāt fauorables & qui sembloient n'auoir place en ce monde que pour les seruir en leurs necessitez, leur estre alors du tout contraires.

Qui pourroit s'imaginer la douleur de leurs cœurs à la rencontre de tant de iustes accusations ? combien grande

tristesse les accablera , quand elles entendront les quatre Elemens , leurs amys leurs parens , leurs bonsanges , les saintes ames , & tout le sacré conseil de nostre Dieu coniurer contre elles ? & qu'il ny aura plus que les demons les princes de leurs Duels , qu'elles honorent , & adorent tous les iours en despit de la raison , pour offencer leur Dieu , & blesser leurs consciences , qui les regarderont d'un œil affamé de telles ames confites en peché , qui sauteront de ioye en entendant toutes ces plaintes , & seront en impatience de ietter en diligence leurs griffes dessus elles.

Mais quel ressentiment les bourrellera toutes , quand apres tant de menaces , & tant de grandes accusations , elles verront leur grand iuge armé de foudres & de tempestes prononcer cét Arrest , lequel est dès long temps enregistré dedans le corps des saintes E-
 Mat. 25. uangiles ? vn arrest qui sera du tout espouuètable & plein d'horreur : Allez ames maudites de Dieu mon pere , allez bruler eternellement dedans les feux , qui vous attendent dès le commencement du monde. Allez , vous auez lais-

sé mes commendemens , & vous estes
mocquez de mes graces , vous avez re-
fusé le sacré sein de mon pere Eternel ,
que vous pouuiez facile ment acquerir
& vous en faire vn liét d'honneur & de
parade . ou vous eussiez receu vn grand
& doux repos & parfaict soulagement
pour les trauaux qu'eussiez souffert en
semant sur la terre les vertuz , que par
tant de fois j'ay presen té à vos yeux ,
& comme fourré par force dans vos en-
tendemens : & maintenant , & a iamais
vous seruirez de manifestation à ma iu-
stice , vous croupirez sans cesse dans l'or-
dure des Enfers & serez tourmentez de
peines tres-griefues , & de tels suppli-
ces , que nul esprit cree ne pourra con-
cepuoir leur extreme rigueur . Vous avez
mesprisé les remonstrances & beaux e-
xemples de ces bien heureuses & sain-
ctes ames , lors qu'elles estoient , par-
my vous sur la terre , vous les fuyez cō-
me si elles eussent esté idiotes , & insen-
sees , elles estoient mocquées de vous
autres meschantes ames & reprouuees ,
& les estimiez creatures sans honneur ,
sans courage , & indignes du tout d'estre
regardees par le ciel , d'autant qu'elles

crioient sans cesse contre vos Duels, qu'elles haïssoient plus que mortellement les loys maudictes de vostre faux point d'honneur, & detestoient entierement les massacres & turies. Vous pensiez qu'elles fussent folles & brutales refusant de rendre des hommages à vos idoles infernaux, & de se sacrifier à leurs pieds comme vous, vous n'avez rien à blasmer que leur vie & leurs mœurs: & voycy maintenant qu'elles assistent à vostre iugement eternal, la candeur de leur innocence vous éblouyt la veüe, & leur sainteté vous fait rougir de honte & creuer de despit. Elles sont à cette heure les rares delices de Dieu mon pere, elles me suiuront à mon retour dedans les cieux, pour se plonger dans des liessees sans mesure, & iouyr de la gloire eternalle la recompence tres-seure de tous ceux qui se rendent de bon cœur executeurs avec exaction de mes saints cōmendements. Vos supplices, vos gehennes, vos tourments infinis leur feront dauantage gouster leur beatitude, & me chanteront des cantiques d'honneur & des loüanges avecques plus grande affection,

Dis.

Aug.

cap. 94.

lors qu'elles recognoistront la grande difference qu'il y aura entre vos peines, & leur fœlicité. Allez, fuyez de moy meschantes ames, que ces Demons, que ces idôles des Duels tant honorez, & tant cheries de vous, lors qu'estiez sur la terre, vous enferrent encores vn coup pour tout iamais, qu'ils vous enfilent de leurs espees ardentes, qu'ils vous happêt de leurs pates bourrelles de tels esprits que vous, qu'ils vo⁹ estônêt de leurs cris & hurlemêts espouventables, qu'ils vous deschirent de leurs cruelles griffes, sans diminuer nulle de vos parties, qu'ils vous facent transir de peur par leurs grimasses & regards contrefaits, qu'ils empoisonnent vos cœurs de leur haleine infecte & puâte sans empescher leur mouuement perpetuel, qu'ils vous brulent des feux qui les tourmentent sans vous consumer ny amoindrir, & vous retiennent parmy eux, & leurs supplices dedans les fers de leur puissance & esclavage iusques à l'infini.

O grand Dieu qu'elle sentence ! Seigneur, que ce iugement sera rude, bien qu'il soit iuste & tout plein d'equité ! he-las ! que n'est il permis de souhetter main-

tenant pour ces tant miserables tisons d'enfer, qu'ils n'eussent iamais esté tirez du Neant, pour estre participans d'une vie si langoureuse, & tomber soubz L'empire de sathan. Mon Dieu ! cōbien ces Duels sont detestables, qu'ils sont dāgereux ces Duels, qu'ils ont d'espouvantables & pernicieux effects ces maudicts Duels ces Idoles de nos françois, de tuer les hommes, de blesser mortellement leurs ames, & quant & eux, faire cesser la bonne volonté des creatures d'icy bas, l'amour des ames bien heureuses, & la clemēce de Dieu souverain & tout puissant pour le regard de leurs sales victimes : de rendre les choses, qui plus aymoient les hommes contraires & ennemys, & d'arracher le foudre des mains, desquelles ils attēdoient leur secours plus prompt & assuré. Commēt ce peut il faire que les hommes d'apresent representent à leurs esprits les rigueurs de ce Jour de pleurs & grincemens dedens, sans que les diuers supplices, qu'ils decouvrirent par de telles pensees leurs estre preparees par sathan leur ennemy, ne soient autant de durs marteaux pour amolir leurs cœurs, &

briser entierement la haine, qui les possede l'un contre l'autre? pourront ils nos françois, apres la decouverte de tant, & de si grands malheurs, que le prince des tenebres leur machine sans cesse, l'aimer & honorer avecques tant de passion desreglee, sous l'image du point d'honneur? Serat'il bien possible que la lumiere de leur entendement soit tellement esteinte, & qu'il leur reste si peu de raison, & sincere iugement, que d'adorer davantage leurs faux idoles, de continuer de respēdre leur sang sur leurs autels infames, & de se battre en Duel, puisqu'il est ainsi qu'ils doibuent apres leur mort estre encores vn coup enferrez par sathan, & arraches de la bouche sacree de Dieu tant de si rudes parolles contre leurs ames? car ce n'est point mocquerie, ce ne sont point des comptes faicts en l'aer, & qui preinent naissance par ma seule inuention quand ie dys que nostre Dieu, en ce Iour de Iugement vniuersel, sera contre elles & les chassera de furie dans les enfers. Si elles veulent outre qu'on leur enseigne Iournallemēt, feuilleter les saintes escriptures, elles trouuerōt que l'eternelle ve-

rité a des lōg tēps couché dās l'Euangile
cet Arrest tant rigoureux : & cōtre elles
principalement (bien qu'il soit donné
pour toutes ames, lesquelles aurōt quit-
té ce monde chargees de leurs pechez,
dautant qu'elles seront coupables, ainsi
que cy deuant nous auons dit, des plus
grands crimes qui peuuent irriter no-
stre Dieu.

Mais que diront nos Roys à ce Iour
de Iustice ? que dira la grande ame de
nostre grand Henry ? ne fera-il point
comme fit autre fois ce braue Roy de
Perse, ce guerrier Xerces pere du grand
guerrier Artaxerces, lors que menant
contre la Grece vne puissante armee, &
voyant tout l'hellez pont couuert de ses
nauires, & la terre Abydeniēne remplie
Her. l. 6. de ses soldats & subiects, il plora ame-
rement en considerant que tant de peup-
les seroiēt frapez par l'inhumaine mort
& n'en resteroit aucun sur terre dās peu
de temps, leur ruine saprochant d'eux
de Iour en Iour, d'heure a heure, de
moment en moment ? sera il biē possible
dy-ie. qu'au milieu mesme de sa plus
grande beatitude, il n'oublie point ses
delices, & interrompe vn peu son agre-

able felicité , pour pousser de son cœur de grands souspirs , & faire rouler de ses yeux des larmes bien ameres ; quand il verra ses peuples , ses subiects bien aimes pour lesquels sauuer de l'obeissance d'autres peuples leurs voisins , & les conseruer en pleine liberté dessus la terre , il a tant de fois arraché des gouttes d'eau de son frōt Royal , & des parties de tout son corps , il a tant trauaillé & respendu dans les iustes combats le plus pur de sō sang , tomber en l'esclauage de la superbe , de l'orgueil , des miseres infernales , de sathan en vn mot , qui les fera sans cesse cruellement mourir ? ou plustost ne ressemblera il point à ce grand Roy d'Ægypte Psammenitus , lequel voyant sa fille estre traitée barbarement par Cambyses son superbe vainqueur , & ses fils bien aymez estre cruellement trainez a la mort par son commandement , ne peut que se ietter la face en terre sans pouuoir souflager sō extresme douleur par des larmes , ny mesme par des souspirs , tant il estoit atteint de tristesse & pressé de regret ? ne fera il pas de mesme ce grand Roy , ce pere de la patrie françoise ? quand il verra les françois , les

chers enfans estre condamnez a souffrir des suplices horribles & tourmens infinis? ne demeurera il pas comme pâmé de tristesse, & transporté hors soy mesme? ses douleurs extrêmes pourront elles arracher des larmes de ses yeux, des regrets de son cœur, des soupirs de sa bouche? non certainement, le feu de sa passion sera trop grand & violent, il seichera trop son cerueau & le réduira aride il pressera son cœur estroictement, il fermera sa bouche, & luy osterà tous moiens de se soulager en son affliction. Mais i'ose dire, ne rougira il point ce grand Monarque, quand il verra ceux desquels il a esté grand Roy, sur lesquels il a eu en ce monde absoluë puissance & pleine auctorité, estre ainsi reprouuez de Dieu, qui l'auoit choisi dans son conseil & mené au trauers des plus fortes barrières de tous ces ennemys, au throsne Royal pour tenir de ces mains le gouuernail du Royaume françois, pour y regner paisiblement & avec resiouissance de toutes nations, pour auoir soing de tout son peuple & de leurs consciences? n'aura il point de rudes resëtimens a lors de n'auoir, cependant qu'il luisoit icy

bas parmy nous comme vn Soleil terrestre, banni du cœur de ses subiects la rage de s'entre-tuer les vns les autres ? car bien qu'il ayt esté comme vne pierre de vray laspe pour estancher le sang, qui sans cesse couloit sur le theatre de la France par les coups mutuels des ces Athletes furieux & plein de desespoir : si est-ce que ce a esté vn peu bien tard, & ses edits si solemnels n'ont point paru que sur la fin de ses iours; resembtant en cela à la Cigogne, qui pousse parmy l'aer vne haleine plus douce & profitable qu'au-parauant, quand elle aproche de la mort & veut finir sa vie.

Que diront tant de grands maistres de Police, tant de grands magistrats ? s'ils n'auoient desia passé par l'examen de leurs consciences, & rendu compte de tous leurs faicts, ne se feroient ils point coupables ? n'aprehenderoient ils point le Iugement de Dieu ? pour estre en partie cause de la perte de ces françois, pour auoir trop souffert cette licence effrenée des Duels ? & sans doute plusieurs seroient du nombre des affligés, pour n'auoir fait garder avec soing & diligence les Edits sacrez de nos Roys, pour ne les

auoir rendus inuiolables ; pour au contraire auoir porté visiblement eux mesmes les vns en ces vices inhumains , fauorisé les autres , dissimulé de sçauoir tels combats ennemys de Dieu & de Nature , & violé l'integrité de sa Iustice , pour rendre les fauteurs des Duels exempts des peines ordonnees par les loix, & nourrir par leur tacite consentement, ces pestes , cette mort des ames & republiques.

Mais cessons de troubler le repos de ces ames en renouuelant leurs playes anciennes & represtās à leurs yeux leurs vieilles fautes : si elles ont en ce monde quelques fois souillé leurs consciences de pechez , elles ont trouué des cette heure en l'autre siecle des feux capables de les purger , leur cœur n'a point permis à leur vie de sortir de chez luy sans vn regret entier de leus fautes , & pourront eternellement ietter leur veüe sur l'Auguste Trinité, contempler ses immenses vertus , & en tirer par ce moien leur contentement parfait. Dressons seulement nostre voix vers ces grands hommes , qui maintenant gouernent le timon de l'Estat, vers ces venerables & tres

tres augustes Senateurs à ce qu'il maintiennent, qu'ils observent les loix, qu'ils gardent comme choses bien saintes, & du tout inuiolables les solempnels Edicts du grand Henry, tant de fois cōfirmez par nostre Louys vray rayon du Soleil, qui l'a laissé dessus la terre pour reluire à nos yeux, lors que luy brilleroit la haut deuant la face del'Eternel. Qu'ils punissēt ceux-la, qui cruels à eux mesmes, nourrissent de leur sang les Idoles des Duels, qu'ils sauuent leur pauvre france du peril qui la talonne, en banissant loing d'elle cette licence desnaturee & honteuse, qui trauaille à sa ruine & la frappe par le pied il y a ia long tēps. Car s'il est vray qu'une trop grande licence parmy les peuples peut blesser d'ageusement les estats, qui se peut estonner de voir la france en telle confusion, qu'elle est, & ce verra par cy apres? qui doutera qu'elle ne tombe bien tost enseuelie dedans ses ruines, puisque durant ce dernier siecle la licencey a reigné sans mesure, & sans raison? puisque l'on y a vescu avec tant d'insolence, tāt d'impudence, tant de mespris de toutes loix diuines & humaines, que ce n'a point esté

assez de faire iniure à son prochain & de hayr publiquement ses freres : mais encores il a fallu dresser de toutes pars des Idoles , qui comme des sangsues , tirent le sang des veines de nostre Monarchie & l'affoibissent de moment en momēt. Il a fallu esleuer de tous costez des autels aux Duels infames & pernicieux, & que chacun y portast ses offrandes , que chacun y fist son sacrifice , & qu'il n'y eust, a ce qu'il semble , que les poltrons , que les idiots , que les hommes de paille, qui voulussent s'en rendre exempts.

Et pour s'imaginer avec combien de force & d'auctorité cette grande licence a son cours parmy les françois, il ne faut que remettre en ses pensees comme au lieu , qu'on deburoit s'opposer saintement à cette manie & fureur infernale, il n'y a personne qui ne face cas des duels on ne parle que d'eux , point de discours plaisans , point de doux entretien & agreable, que lors qu'on fait mention des Duels. Il faut pour estre bien venu dedans le monde pouuoir monstrier ses mains souillées de sang , son front taché des marques de prestres & victimes de sathan, & lors on est receu avec applau-

différent, on est honoré de tous grandement, l'on quitte son lieu pour placer ce taché de sang humain, l'on reçoit de la resiouissance à sa rencontre, l'on dit celuy. la est braue gentil-homme, il est vaillant comme son espee, il ne redoute rien, la peur s'en fuit de luy, ils s'est battu quinze ou vingt fois; il a tué tels & tels & tousiours est reuenu victorieux. Mais de le punir selon que le commādēt absolument toutes les loix naturelles, diuines, & humaines, de chastier ses massacres & homicides l'on'en parle point; tant s'en faut, il aura facilement sa grace, car il est de maison, il a de bons amys, il a bien des parens auancez en credit; & puis apres sa partie n'est pas forte. Ou pluystost difons, il n'en moura pas, il aura asseurement sa grace, car il a commis vn sacrilege, il a tué vn François, il a sacrifié vn homme comme luy aux demōs, il a brisé de son espee le chef-d'œuvre de Dieu, il sera bien tost absous il sera haurement magnifié: puisqu'il n'a fait que ce qu'on ayme en france, il sera recompensé, ses merites seront bien recogneus, & s'il vaque quelque belle charge ou riche gouuernement, il en se-

ra gratifié; brefil ne peut manquer, le voila en honneur puisqu'il s'est battu en duel, & a violé d'un funeste coup de pée toutes & chacunes loyx & ordonnances. Car c'est la plus ordinaire coutume, de la Monarchie françoise de choisir plustost pour les grades & qualitez plus relcues, ceux qu'on trouue ayāt encoires l'escume dans la bouche, le fer dedans les mains, le sang sur le visage, & par tous le corps les marques des plus mechans que la terre ayt nourry; que ceux qui sont remplis de toutes les vertus, qui se conseruent & se tiennent tousiours prests de servir leur Roy fidellement, de le deffendre cōtre ces ennemis, & d'employer mille fois pour un Jour tout leur sang & leur vie pour le salut de leur patrie.

Psal. 9.

Et que veut dire cela, si non que nous esprouuons la verité des saintes escritures, qui dit que le pecheur est loüé hautement aux desirs de son ame, & que celuy qui cōmet les faicts les plus enormes est beny de tous les peuples? sinon que l'Idole des Duels a tantost tiré a soy tout le sang & la force des françois, qu'il s'en est rendu maistre, & leur com-

mande absolument ? ils s'ont bien pourueus nos François, eux qui auoient accoustumé de commander à la vertu, ils sont maintenant contraints de rendre les devoirs de vassaux au plus sale de tous les vices, à un Idole si superbe en sa puissance tyrannique qu'il s'approche luy tenebreux & grossier, des estoilles plus brillantes, qui se retrouuent dans le ciel de la cour autour de nostre Soleil François, de nostre puissant Roy, & leur faire despouiller leurs principautez plus esclatantes pour luy rendre des hommages & en faire ses esclaves. Qui est cause de cette tyrannie, sinon cette trop grande licence, laquelle luy a permis d'estendre de iour en iour ses puissances, & les faire excéder, toute la largeur de la France ? L'on luy a permis de prendre sa naissance parmy nous, l'on luy a souffert de viure & respirer l'air de nostre France, l'on l'a laissé croistre en sa force, & voyla maintenant qu'il nous maistrise, qu'il abuse de nous : l'on n'a point châtié ceux qui premiers ont escript leurs noms dedans son rolle, pour combattre sous ses enseignes, & voycy qu'il multiplie encores sa puissance superbe de iour à

M iij

autre, & le nombre des chevaliers infames, qui font gloire de combattre sous ses drapeaux pour la deffence du faux point d'honneur s'augmente tous les *Gen. 19.* iours. Et tout ainsi que la clameur des villes de Sodome & Gomorrhe se multiplia tant autrefois, qu'elle passa toutes les distances, qui se retrouvent entre le Ciel & la terre, & donna iusques au special domicile de nostre Dieu; a cause, dict l'escripture sainte, que leurs forfaits ne demeuroident pas seulement impunis, mais dauantages estoient approuuez avecques applaudissemens & resioiissances du publicq comme des choses bonnes & saintes: de mesme par la licence des Duels ont estably leur puissante anctorité par tous les cœurs de nos françois, ils parlent hautement, l'on n'entend que leurs voix, qui retentit & commende par tout. Et ces maudites voix des Duels se font d'autant plus librement entendre dedans les Louures, dans les autels, dans les maisons, dans les villes, dans les prouinces, dans ce Royaume, qu'elles cognoissent bien qu'il ny a point de loix executees contre elles, qu'on ne punit

nullement leurs champions, sinon ceux la, qui ne sont point presens, sinon par tableaux, & en bien petit nombre. Car de ceux la, lesquels apres des massacres & homicides cruels demeurent fermés dans leurs maisons, ou mesme à la cour pres du Roy & des Princes, pleins d'impudence & mesprisants les solénels edits que nos Monarques font sur la terre & dans le Ciel sont confirmez par nostre Dieu, il ne s'en parle point; ils sont trop venerables pour les saisir de la main de iustice: au contraire ils la brauent cette belle Deesse la iustice, cette fille aysné: de nostre Dieu, ils s'en moquent & luy vont demender pardon avecques force & main armée, ils se rendent les maistres chez elle pour abuser de sa iuste puissance, & arrachent avecques violence incognuë au reste de l'vniuers de sa bouche, & de ses mains, vne entiere abolition de leurs forfaits. Ils sont, dis-je trop venerables, ces meschants, ils sont marquez, & tous souillez d'un sang qui empesche les effects des loix tant du Ciel que de la terre, & ne peuuent estre repris: tout ainsi cōme autrefois l'Ange vangeur des ini-

Exo. 12

Miiij

quitez que commettoient les *Ægyptiens* endurcis en leurs offences contre leur Dieu, ne pouuoit employer les rudés chastimens de mort sur ceux, qui se trouuoïent ferrez dans les maisôs, qui portoient sur leur frond, & a leurs portes le sang destiné à leur deffence par nostre Dieu.. Aussi qu'en ferat-il ? il arriuera que comme la clameur des villes de Sodome, & de Gomorre s'esleua en fin iusques dedans les Cieux pour irriter la supreme Majesté, ainsi ces monstres, ces Idoles des duels affamez du sang humain & tousiours infatiables criront tant, & commenderont si hautemēt par toute la France que leur horribles cris approcheront du Ciel, & voudront mesme donner iusques au sacré Throsne du fils de l'homme pour l'attaquer & luy faire paroistre de plus pres l'orgueil desmesuré de leurs puissances tyranniques. Mais comme la clameur de ces grandes citez de Sodome & Gomorre arracha finablemēt du Ciel des feux ardens qui les reduirent à neant & leur seruirent de mort & de tombeau: de mesme sans aucune doubte ces maudits duels feront en fin tōber des mains

de nostre Dieu des foudres sur leurs testes, qui les briseront en autant de morceaux, qu'ils auront humé & englouty de gouttes de sang de nos françois. Et quant & quant des tempestes & orages tomberont de là haut, qui batteront en ruine nostre estat, qui mettront en piece ce grand Empire françois, connu, ay-mé, & redoubté par tout le monde, & le feront gemir sous ses encombres; Il sortira de terre des legions de demós, lesquels voyans qu'ils ne pourront plus se faire aymer & adorer sous l'image des Duels sur la terre par leurs anciens champions, ils les precipiteront dans les enfers aydez par la sentence de rigueur, dont nous auons parlé pour s'en seruir comme ceux qui se sont enrrollez sous leur charge, pour demeurer leurs serfs & esclaves à tout iamais,

Ce sont les desseins de sathan, & ne se souciera pas de recepuoir à lors des coups du Ciel, pourueu qu'il ruine les françois, & se les aquere entierement; il ne s'estonnera pas: ce prince & pernicleux auteur de nos Duels; d'estre frappé des mains de nostre Dieu, il y a ia trop long temps qu'il reçoit des blessures des

verges, desquelles il visite & chastie les melchants cōme luy; mais il le faut empêcher ce dangereux sathan, il faut faire perir ses malheureux desseins mesme auant leur naissance, & faire auorter les estranges conspirations qu'il machine en son aine contre le genre humain. Car l'homme est bien cree pour vn autre subiect, son createur le moule de ses mains sacrees pour vne fin plus releuee, que pour seruir a l'ordure & aux tenebres: il l'a fait pour l'auoir, & le garder eternellement deuant sa sainte face, & se resiouyr en contemplant vn œuvre de ses doigts si accompli.

Ou pour mieux dire il a tiré l'homme de l'auugle neant, non pas pour en tirer à soy quelque chose de mieux; car il ne se peut, toutes choses bonnes & belles sont contenues dans son essence, mais pour luy donner à cognoistre qu'il estoit le vray & souuerain bien, qui desire tousiours de se communiquer, comme disent les Philosophes, pour le faire participant de sa gloire infinie, & luy faire recepuoir en contemplant ses bontez, ses misericordes, ses beautez, sa iustice, & toutes les vertus singulie-

res qu'il possède sans mesure, vne ioye, vne foelicité, vn contentement qui ne pourra iamais finir.

Faisans doncques en sorte que nostre Dieu ne soit point quelque iour frustré du fruit de ses labeurs, taschons que les françois qui sont des hōnes ouurez par les diuines mains, ne soient point chafsez du Ciel ordonné pour leur demeure, & ne soient point priuez de cette fin tant desirable pour laquelle ils ont esté faicts & moulez par l'ouurier eternal; & qu'ils puissent au contraire iouyr vn iour de ceste ioye celeste du tout incomprehensible à ceux d'icy bas, qu'apporte quant & soy la frequentation parmy les sainctes ames, les Anges glorieux, & la consideration du haut, & releué mistere de l'auguste Trinité. Mais pour se faire il est besoing que tous y apportent du leur, il faut bannir de cette Monarchie la trop grande licence, laquelle y regne depuis long temps: il faut oster les glaiues des mains de tous ces insensiez, ces transportez d'ire & de fureur, il faut diligemment casser le col de ces maudits idoles des Duels, les briser entierement, & en faire vn sacrifice solemnel à nostre Dieu.

Il faut que nostre Roy cōtinue ses Edicts
sages & saintes loix , qu'il augmente de
iour en iour ces menaces , & multiplie
ces seueres chastimēts contre tous ceux
qui visiteront par cy apres les autels des
demons pour y reprendre leur sang en
se battans en Duel: qu'il arreste & estan-
che le sang de son Estat , en punissant
ceux-la esgallement , lesquels au preiū-
dice de l'obeissance estroite, qu'ils luy
doient mesme pour leur conscience, se
seront laissez entrainer à leur passion
scandaleuse, & aurōt taché leur: mains
& leurs ames du sãg humain. Il faut que
tous les princes & seigneurs ferment
leurs portes à ces infames & furieux
Atlette; de sathan , qui vivent com-
me bestes furieuses & enragee, toute
soüillee du sang des hommes, qu'ils ont
esgorgez , se ietter dans leurs hostels,
comme dans des Assiles trop asseurez; &
que leurs regards de trauers seruent de
fortes barrieres pour empescher qu'ils
n'aprochēt de leur grãdeur pour implorer
secours de leur faueur & credit. Il faut
que tous nos grands & sages magistrats
emploient tout soing & diligence a ex-
secuter les iustes voluntez de leur Mo-

nar que garder les bonnes loix, & obser-
 uer les saincts commandemens ! a punir
 selon la rigueur de iustice les refracteres
 a chastier avec exēple ces perturbateurs
 du repos particulier & vniuersel, qui
 remplissent les maisons, & les prouin-
 ces de querelles & massacres : qui coup-
 pent de leurs espees funestes les plus fer-
 mes liens des meilleures amitez, & font
 que la bienueillance ne trouue point de
 place par tout ce grand Royaume qui
 luy soit asseuree mesme pour vn momēt.
 Il faut encores que ces grands officiers
 de la fille bien aymee de nostre Dieu, ces
 venerables prestres de la Iustice cette
 belle Deesse, rendent les loix & leur ri-
 gueur commune à tous, autrement elles
 seroient comme bastardes, & non point
 vraiment iustes & legitimes : qu'ils reti-
 rent leurs pensees des grandeurs & ne
 songēt qu'a punir, ou biē absoudre, tous
 ceux qui le meritent. Il faut qu'ils fermēt
 leurs yeux à la presence des richesses &
 qualitez plus releuées, qu'ils bouchent
 leurs oreilles aux recommandations &
 prieres, & se gardēt sur tout de faire vn
 peu pencher leur iugemēt du costé de la
 faueur & clemence quād il sera question

de massacre arrivee par les Duels.

Par ce moien l'on bouchera les venes de la fiance ouvertes par tant de playes cruelles l'on estanchera le sãg de nostre Estat, qui se pert avec tant de malheur & felonnie, l'on fera reuenir nostre grande & tres puissãte Monarchie de la syncope, en laquelle elle est cheute il y a l'ongue suite d'annees, & sera guaratie des douleurs & conuulsions qui la tournent, & l'ont cõduite biẽ pres du dernier periode desõ estre. Ainsi ayant chassẽ du corps françois ces grieues & dangereuses maladies, sa santẽ reuiendra prendre sa place ancienne, sa vie luy sera entierement redonnee, sa force premiere luy sera renduẽ, & ses Iours luy seront prolongez de plusieurs siecles. Et Dieu mesme defendra des Cieux pour le venir benir de ses doigts, pour luy departir ses saintes graces & faueurs plus exquises avec plus d'abundance qu'il ne fist jamais, pour luy rendre ses premieres beautẽz, son lustre dorẽ, sa splendeur esclattente: & au double ses vertus, ses victoires, ses triũphes, sa bõne renommẽe par tout le monde, & le fera plus ieune en sa viellese, qu'au premiers iours de sa

naissance, & plus grand sur sa fin, qu'il ne fut onques ; afin que luy, qui est le Soleil des Royaumes terrestres, soit en cecy semblable au Soleil qui roulle dans les Cieux, lequel a de coustume de paroistre beacoup plus grād à son coucher qu'à l'heure de son midy. Il fera, nostre Dieu, que nostre Louys, ce grand fils du grand Henry, ne meritera pas des moindres hymnes d'honneur en sa louāge pour auoir preserué la Monarchie françoise du naufrage, que les vndes agitées de son sang luy preparoient ; & luy auoir réduit son lustre & ses puissāces desia peries dans ce maudit malheur des Duels, que son pere de memoire tres-heureuse & iamais perissable a esté benit de tous les habitans de la cité celeste, & admiré de tous les peuples de la terre de l'auoir sauuee des douteux euenemens des batailles, des mains de ses ennemys, du feu de sedition & des guerre ciuile & pour l'auoir vaincūe de ses mains & de ses armes pour la rendre la plus victorieuse de l'vniuers. Il fera, ce tout puissant, qu'apres que ce Royaume aura encore continué son cours par vn long temps ; il sera en fin chāgé (puisque c'est

vn priuilege qu'il a luy mesme donné a la Nature, de prendre ses droits sur toutes cratures d'icy bas sans que aucune en soit exempté (mais pour le moins il ne sera changé contre la volonté de nostre Dieu, son chagemēt ne demētira point ce bel ordre establi par la sage Nature, lequel est de finir sa course lors qu'on est arriué au bout de la carriere assignee par l'eternelle prouidence. Il sera change nostre Estat, mais non pas par des moiens contraires à Dieu & à Nature, mais bien ensuiuant la loy du monde, qui veut que no^r suiuiōs la mort & chāgement, quand il ne no^r reste pl⁹ de force assez pour resister à leurs violens efforts, & que nostre chef souuerain nous commande de quitter la terre, pour passer en vne vie, qui n'a rien que de celeste. Ils tomberont, nos françois, en vn chāgement, ils seront changez; mais ce sera de pis en mieux, ce sera pour quitter cette vie pleine de miseres & langueurs, de chagrins, de calamitez, & d'inconstance; cette vie en laquelle on ne reçoit la moindre parcelle de ioyē & de contentement, qu'elle ne soit aussi-tost eschapee, aussi-tost enuolee de nos cœurs

cœurs & de nos ames , qu'elle y estoit
 entree : on l'on ne possede que des cho-
 ses subiectes aux disgraces & reuers
 de la fortune & de son inconstance, pour
 entrer en vne autre remplie de vraye
 douceur , de liesse, de repos , de bon-
 heur , de felicité permanente & sans in-
 terruption, Ils quitteront ce monde, il
 est vray ; mais pour se guinder legere-
 ment dans le Royaume de nostre Dieu
 ou ils recognoistront combien heu-
 reuse pour eux tous aura esté cette heure
 en laquelle ils auront sainctemēt resolu
 de fuir les haines , les querelles , les mas-
 sacres, les Duels : pour penetrer les Ci-
 eux , & venir iusques en la cité diuine
 pour y estre faicts bourgeois ; belle &
 sainte cité ou la victoire n'est autre
 chose que la verité mesme ; la dignité, la
 sainteté de vie ; la paix , la felicité des
 ames ; & la vie, vne entiere eternité. Ils
 beniront cette heure pour auoir esté
 cause de leur bon-heur, pour leur auoir
 fraié vn chemin large dedans les Cieux,
 pour leur auoir brisé les fers de l'horrible
 seruitude ou sathan les auoit attachez
 pour les tirer dans ses enfers, & ouuert
 la porte de felicité & de gloire eternelle.

N

Exo. I. Ils seront lors paruenus à la fin, pour laquelle nostre Dieu les a crees, & bastis avec tant d'artifices ingenieux & beaux rapports, ils n'auront plus rien à faire, qu'à ietter les yeux sans cesse sur s^{on} eternité, qu'à contempler sa bonté infinie, & admirer sa grandeur s^{ans} mesure: qu'à se remplir de toutes pars par leurs yeux & leurs pensees de sa diuinité, pour en estre comme substantez & nourris iusques à l'infini. Ils seront au comble de tous contentemens, sans mesme qu'on y puisse desirer dauantage; contens en leur entendement puisqu'il iouyra bien pleinement de son entier obiect de Dieu souuerainement vray & la verité mesme contens en leur volonté, puisque pareillement son plein obiect luy sera present, & qu'elle sera proche de son Dieu le souuerain & vnique bien de toutes choses: & par tout contens, car ils reposeront dans le sacré sein de leur createur, de leur mediateur, de leur sauueur, de leur Dieu de leur tout, & tous ensemble luy ch^{er}teront des louanges à pleine voix.

Et bien françois, tant de grands bi^{ens}, qui vous attendent, & sont tous prests de combler vos ames de ioye celeste &

beatitude, si vous quitez vos enormes pechez, ne seront ils point suffisants d'amolir vos cœurs, & faire prendre en haine vos maudits Duels & massacres? seriez vous bien si contraires à vous mesmes, que de quitter & renoncer entiere-ment à tant de riches possessions, pour assouvir vn appetit sensuel, vn desir desreglé de vengeance, qui arrachera sou- uentes fois apres des cruels repentirs de vos cœurs, & de vos ames: voyez, il ne tient qu'à vous que n'aqueriez à vos ames, ces celestes heritages, vous pou-uez si vous voulez, en prendre possession aussi tost que ferez las & desgoutez de ses terrestres, qui vous causent plus mil- le fois d'ennuys, qu'ils ne vous peuuent secourir en vostre vie. Il ne faut que cesser d'attaquer vostre Dieu, & le blesser par vos offenses, sa bonté, sa douceur, tous les bienfaits qu'auéz receus de luy vous y conuyent assez: Il ne faut que vo- resoudre de iamais ne faire hommage à vos Idoles, quitter vos homicides & mas- sacres inhumains.

Il ne faut qu'abandonner, & fuir de bien loing vos maudits Duels, qui ser- uent de masque à sathan pour se desgui-

fer vn peu , & ne paroistre à vos yeux si hydeux & horrible, & se voiler du faux pretexte de conseruateur du point d'honneur pour cependant se fourrer parmy vous & ietter par cette ruse les fondemens d'vn plus grand empire sur vos âmes, pour augmenter de vos ruines & miseres sa puissance tyrannique & insolente & se tenir de vos fureurs & passions execrables, comme de pieges bien subtils pour vous faire tomber en ses enfers. Il ne faut en fin que faire vn iuste changement de la haine fraternelle, qui brule, & seiche vos cœurs, en amour enuers vostre sauueur, il vous sera facile de le faire si vous voulez tant soit peu amuser vos pensees a considerer avecques quel amour il vous a vous-mesmes, ayez, quels feux de charité il a nourry dans la sainte poitrine pour vous sauuer & vous rendre participants de sa diuinité.

François mes chers freres, & bons amys, croyez moy, quittez vos Duels, & renoncez à leurs loys & sacrifices tant inhumains, croyez moy, puis qu'il n'y a qu'vne affection plus que tres-grande, qui me commande de vous parler de cette sorte, ie vous ayme tous

comme mes freres, & ne souhaite pas
vostre bien avecques moins de passion,
que ie fais le mien propre, croyez moy
ie vous en prie du profond de mō cœur.
Ou plustost crovez nostre Dieu, qui vō^s
asseure luy-mesme de ce que ie viens de
vous représenter, qui vous promet de le
donner a vous, & vous faire auoir part
en luy-mesme toutes & quantes fois
que vous voudrez, quand il vous dist
avecques douceur & amitié, conuertis-
sez vous à moy, & aussi-tost ie me con-
uertiray à vous. Comme si elle disoit zac. i.
cette bōté mesme, mes creatures. l'œu-
re de mes doigts, mes enfans bien ay-
mez, ayez ferme assurance que lors que
vous vous retirerez de l'ordure du peché
que vous fuyrez la veine gloire & vani-
té du monde, & ietterez les yeux vers
le ciel pour implorer mon secours, & de-
mander mes graces pour uous en seruir
comme d'armes tousiours victorieuses
& triomphâtes contre les efforts de sa-
than : au mesme instant ie tourneray
ma veüe sur vous, ie feray donner les
rayons de ma face sur vos testes, i'ou-
vriray les sources de mes graces & fa-
veurs plus exquisés & les feray couler

abondamment dessus vos ames, qui les rendront redoutables à tous vos ennemis : j'enuoyeray vn esclat de ma diuinité dans vos entendements, lequel les rendra espurez & pleins d'une belle lumiere, ie me conuertiray en vous, & serez en quelque sorte ce que ie suis.

François considerez ie vous supplie ce que c'est de participer à la diuinité : aduisez, s'il vous peut arriuer vn plus grand bien, & si ce ne seroit pas vne grande perte pour vos ames, si continuant d'adorer vos idoles prodigieux, & de vous sacrifier sur leurs autels infames, vous estiez priuez d'un tel don de nostre Dieu. Non, mes chers amys, ne le faictes pas, fuyez les, ces maudits Duels, qui ne demandent que vostre sang pour se saouler, & vos ames pour exercer sur elles la rage qu'ils voudroient bien vomir sur nostre Dieu : fuyez les, & courez apres celui lequel vous cherche par amour pour vous remplir du bon-heur & parfait contentement : & courant ainsi portez dessus vos leures des prieres, & des louanges sans aucun nombre, & escoutez en passant les vœux, que mon cœur dresse vers l'Eternel pour vous.

O grand Dieu, qui auez avec tant de liberalité départi l'estre à l'homme, en le faisant vn portraict de vostre diuinité représenté au vif; qui auez tiré toutes les choses qui se retrouuent depuis la moindre hisoppe, iusques aux plus hauts Cedres du Liban, de la confusion du Chaos, ou elles estoient sans auoir estre aucun; qui auez fait le Ciel & la terre, & les auez remplis de tant de sortes de miracles, pour seruir à cette creature plus excelente que toutes autres, a cét homme vostre cher fils; ne permettez qu'il soit plus longuement le plus vil & abiet de toute la grâde varieté de vos œuures parces Duels, qu'il soit l'esclaue des choses sur lesquelles vo⁹ auiez dōné pouuoir & entiere puissâce, que sathā & ses sēblables vos ennemis plus cōtraires se rēdēt des tyrās de son ame soubz la faueur des Duels, & en facent leur victime. Vous, mon Dieu, qui auez emploie iusques a vostre substance tres-sacree, a vostre sang tres-sainct pretieux pour le purger de son premier peché; qui auez voulu par vn excès de charité, que vostre ignominie, fust la source de sa gloire; vos liēs & vos prisons, l'origine de sa liberté:

vostre croix & vos peines trop douloureuses , la cause de la santé de son ame affligée de maladie mortelle : vostre mort scandaleuse & pleine de resentimens qui ne se peuvent exprimer que par des sanglots , le principe de la vie immortelle & biē heureuse : ne souffrez maintenant que cēt homme-la mesme , pour lequel vous avez fait tant de preuues de vostre amour se flattās en la fauceté d'vn point d'honneur pernicieux , & s'opiniastrant en l'erreur de ses Duels , se perde luy mesme , s'eloigne de vous son vnique salut , & se rende du tout indigne des grās effects de vos celestes graces , & des fructs de vos peines & labeurs. Autrefois les larmes de douleur que vostre mere tres-glorieuse faisoit rouler amerement de ses yeux affligez a la veuē de tāt d'horribles coups , qui dechiroient avec cruauté vostre corps delicat : les sospirs que pouffoit vers le Ciel la bande entiere de vos Anges , portās au tour de vous vne partie de vos douleurs par leurs regrets ne peurent iamais gagner sur vostre amour de vous faire quitter cet hōme ou il estoit priuē de vos graces diuines par son offence ny vous faire exem-

pter de seruir a tout le monde d'un spectacle si pitoiable, que de mourir cruellement pour luy au milieu de toutes vos autres creatures non coupables de vostre mort, & gemissantes pour vos douleurs: & maintenant, Seigneur, le laissez vous exercer son execrable rage des Duels, & croupir dans ce maudit peché si dāgereux pour son ame, qu'il la fait des cette heure pencher du costé des enfers? il vous a bien offēcé, ie le cōfesse en soupirant, mon cœur en signe de regret, & croit que son peché est mille fois plus grād, que celuy de nostre premier pere, qui merita de vous tirer en terre pour l'effacer: car il brise tous les Iours le plus beau de vos œuures en se tuans luy-mesme, & celuy que vous preniez plus de plaisir a regarder cōme estāt vn ramas de tous vos beaux miracles, & le chef d'œuure de vos mains: mais quoy, mon Dieu, cest son imbecillite, qui luy fait faire: c'est le malheur de sa Nature, qui souffre ainsi qu'il se porte presto a la ruine de son ame, qu'a sa felicité: c'est que sa premiere qualite est d'estre miserable pecheur. Vous le scauez, mon Dieu, & le dites vous mesme par la bou-

Psa. 50.

che de vostre biẽ aymé Prophete Royal
Dauid, quand il se plaint a haute voix
d'estre entré en ce monde par la porte
du peché, chargé d'offence & d'iniquité
auant mesme qu'il eust veu la lumiere
du monde, & que son ame fust capable
de la cognoistre pour la fuir, ou accep-
pter: & vous demande comme raison
en sanglotans & pressé de douleur, de
quoy sa mere la conçu en peché, & a
côme pestri dans le repaire de l'iniquité
mesme, & au lieu de son infection. C'est
pourquoy il a besoing de vostre aide &
secours, & ne peut rien sãs vous: secou-
rez le cét homme, c'est vostre creature
comme il estoit alors de vos douleurs
pour son salut, vous l'auiez de rechef ac-
quis par le pris de vostre sacré sang: ba-
nisez deluy ces Duels, qui caulent la
perte de son ame: frappez & redou-
blez vos coups a la porte de son cœur,
pour le faire souuenir de vos miseri-
cordes faictes vn miracle pour chas-
ser de son ame le peché, puis-qu'il y est
entré prodigieusement afin qu'il y ayt
du rapport entre le mal & le remede: il
vous est facile de le faire vous qui scauez
fort bien tirer de mesme cause diuers ef-

fects, qui scauez redresser nos mauuaises affections par vos afflictions poignantes, & qui tirez de la vipere de nos vices venimeux, la salutaire teriaque de la vertu. Pardonnez luy a cét homme, ses fautes passees, vous qui avez autrefois pardonné à des larrons a des femmes pecheresses, & à ceux mesmes lesquels ont fait couler le plus pur de vostre sâg sur la terre avec tant d'iniustice & felonnie leur peché estoits plus grands que celuy des frâçois, pour lesquels i'implore maintenant vostre bonté: car ils profanoient la diuinité, & souilloient leurs pecheresses mains du sang sacré, du sang celeste, du sang de leur Dieu & Createur: & pour le moins si l'on respand du sang parmy la france, ce n'est que sang humain, sang profane, sang qui n'est fait que pour estre subiect à corruption, & seruir en fin de pasture aux plus sales bestiolles de la terre. Et puis, mon Dieu, quand leur pechè seroit plus mechant & enorme cent fois, que nul esprit humain en scauroit inuenter, vostre puissance le surpasse en grandeur, & le peut effacer de leurs ames plus aisement, qu'ils ne le commettent: vostre clemence ne

voit iamais le bout de ses effets, les pardons coulent d'elle comme ruisseaux qui ne peuuent tarir, faictes en part a nos françois, versez sur eux les plus rares faueurs de vos misericordes, assistez leurs esprits, benissez leurs desseins & les conduissez heureusemēt dās le vaisseau de ce Royaume sur les vagues de ce bas mōde, & parmy les orages, qui heurtēt & attaquent les ames d'icy bas, pour en fin les faire tous arriuer apres vne longue nauigation sans bris & sās naufrage au port plein de salut, & rempli de liesse pour y estre courōnez & affranchis des miseres de cette vie.

FIN.



372708

Extraict du Priuilege du Roy.



AR grace & priuilege du Roy
il est permis à Toussainct du
Bray Marchand Libraire iuré
à Paris, d'imprimer ou fai-
re imprimer, vendre & distri-
buer vn liure intitulé *Discours*
contre les Duels. composé, par Charles Bo-
din seigneur du Freteil pres de Tournam
en Brye, Et sont deffences faictes à tous
Libraires & Imprimeurs de ce Royaume de
les imprimer ou faire imprimer, sans le con-
gé & consentement dudiect du Bray, pendant
le temps & terme de six ans entiers & accom-
plis à peine de confiscation des impressiōs qui
en seront trouuees & d'amende arbitraire en-
uers lediect du Bray avec tous ses despens dom-
mages & interests ainsi que plus-amplement
est contenu & declaré es lettres dudiect priuile-
ge. Donné à Paris le septiesme iour de Ianuier
1618.

Par le Conseil.

Signé, V E R S O R I S.





BIBLIOTECA